

WANTOK

NIUSPEPA BILONG OL PAPUA NIUGINI STRET

Ernst & Young audited/
circulation 15,177

36 pes


Namba 875

Wik i stat long Fonde Epril 11, 1991

40 toea

Marasin sot long ol haus sik long provins na Nesenel Fraud Skwat Sekap long Helt Dipatmen

Tarangau wilwilim Madidu



• Joe Madidu bilong Paga Panthers tim long Mosbi i holim bai strong tru na laik iraim brukim banis bilong Tarangau. Tasol em i no strong tumas na ol boi bilong John Wagamble i autim ol wail pusi 38-20.
Foto: Ivan Bayagau.

BERNARD MALADINA i raitim

OL PLISMAN i holim wanpela wok painimaut nau i go insait long Helt Dipatmen. Dispela i bihainim ripot bilong planti provinsal helt senta olsem ol i sot long marasin bilong sik olsem malaria na bilong pasim sua. Na tu ol dokta bilong katim man i nogat marasin bilong wok.

Wok painimaut i bihainim tu strongpela toktok em Helt Minista Gerald Beona i sutim iong Dipatmen. Em i tok dipatmen i wok long yusim nating bikipela mani.

Planti provinsal helt senta long kantri i sot nau long marasin bilong sik, pasim sua na bilong ol dokta i save katim man long yusim. Planti taim ol dokta i no save katim stret sikman, meri o pikinini taim em i kamap long haus sik. Bikos ol i nogat marasin bilong mekim olsem.

Tupela wik i go pinis, ol plisman bilong Nesenel Fraud Skwat i kisim wanpela tok orait pepa bilong sekap long opis bilong dipatmen seketeri, Dokta Quinten Reilly na ol narapela opis long bikipela haus sik long Mosbi.

Insait long dispela operesen, ol plisman i bin kisim tasol ol buk na

pepa bilong dipatmen. Tasol ol i no holim o sasim wanpela man.

Ol plisman i wok long askim nau Dokta Reilly na planti arapela sinia opisa bilong dipatmen long sampela wok em Helt Dipatmen i bin givim long ol kampani. Meri bilong wanpela sinia minista long gavman i bos tu bilong wanpela bilong ol dispela kampani. Ol lain bilong Nesenel Fraud Skwat i sekap tu long wanem rot em mani bilong ol provinsal helt dipatmen, haus sik na ol liklik helt senta i save go long en.

Taim em i sutim toktok long hevi bilong ol marasin na samting i sot long ol haus sik, Minista Beona i laikim tu olsem wanpela nupela opisa i mas kisim ples bilong Dokta Reilly. Em i kolim nem bilong ol sinia opisa bilong dipatmen long kisim ples bilong Dokta Reilly olsem Dokta Edward Talwat, Dokta Raka Guma, Dokta Levi Sialis o Dokta Issac Ake.

Mista Beona i bin autim dispela hevi pastaim i go long Deputi Praim Minista na Minista bilong Pablik Sevis, Ted Diro long 19 Februari. Helt Minista i bin mekim olsem bihain tasol long em i askim long wanpela wok painimaut i go insait long wok bilong dipatmen.

• i go moa long pes 2

Bogenvil Revolusineri Ami bruk nau

OL lida bilong Bogenvil Revoluseneri Ami (BRA) nau i bruk lusim bikipela grup na go long planti liklik hap.

Ol BRA lida long Kieta na Panguna i laikim gavman long bihainim ol tok orait bilong Honiara. Honiara Dikiesesen em wanpela rot gavman na ol lida bilong Bogenvil i kamapim long Honiara sampela mun i go pinis bilong bringim bek ol sevis long Bogenvil Ailan.

Sampela ripot i tokaut olsem ol lida bilong

ples nau i tekova long ol lida bilong BRA long hap bilong Buin.

Tasol Franis Ona na Sam Kauonai no laikim dispela long kamap. Ol i save raun aninit long lukaut bilong ol sekyuriti fos bilong BRA yet.

Long wankain taim tu, Minista bilong Provisal Afeas, Pater John Momis i bin bungim sampela lida long Kamarau long Buka ailan las Fraide

Ol lida i bin askim Pater Momis long kisim ol gavman sevis i go long ailan. Narapela

bikipela askim bilong ol i sut long gavman i mas larim ol narapela sip i go long Bogenvil bilong karim kakao na kopra

Ol lida i laikim tu helt sevis, skul na ol narapela sevis olsem ol beng na telipon wantaim redio i go bek long ailan. Pater Momis i amamas long wanem samting i kamap long kibung bilong em wantaim ol lida bilong Wakunai, Inus, Tinputz, Selau, Keriaka, Konua na Buka Ailan.

• i go moa long pes 1

INSAIT

• Wok bai stat long Aitape Lumi rot. P5..

• Luteran kisim nupela sip. P5....

• PNGTUC sapatim NPF. P16...

• Ol meri Momase pinisim kibung. P16...

• Salim buai na smok i tambu long Lae. P9...

• Alkahel skul progrem. P6.....

• Nupela Anderson supamaketa long Mosbi. P15.....

• Kumul painim K230,000...pes 1

• Miringke lus long Morobe lig....pes 6

• Mendi na hailans ripot...pes 7

• Mosbi ripot bilong Sande...pes 8

• LAE BISNIS SAPLIMEN

INSAIT: Ol ragbi pilaia resis long winim Kumul 5/8

TOYOTA
HILUX



NAMBAWAN
TRU LONG
PAPUA NIUGINI

ELA MOTORS
WIL BILONG
OLGETA HAP

PORT MORESBY 229400 • LAE 433655 • RABAU 921988 • MADANG 822188 • GOROKA 721844 • MT HAGEN 521888 • WEWAK 862255
POPONDETTA 297266 • KAVIENG 942132 • KIETA 956083 • KIMBE 935155 • TABUBIL 589060 • VANIMO 871254 • PORGERA 508203

EM3578

Ol diwai kakao bungim birua

Ol binatang i save bagarapim planti diwai kakao na kopra na ol kaikai bilong gaden. Na dispela i mekim ol saveman long wok egrikalsa long Papua Niugini i tingting planti.

Wanpela ripot i bin kamap i tokaut olsem planti milien kina bilong ol bisnis i lus nating bikos dispela hevi i kamap. Na Dipatmen i bosim wok bilong Egrikalsa na Laipstok (DAL) i tingting planti nau olsem ripot bilong ol arapela bagarap i no kamap yet.

Tru i gat liklik wok i kamap nau bilong daunim dispela sik, tasol ol saveman i no painim yet gutpela rot bilong pasim sik bilong ol diwai kakao na kopra na ol kaikai bilong gaden. Ripot bilong DAL i tokaut tu olsem dispela inap bagarapim saplai bilong ol kago em Papua Niugini i save i go long ovasis.

Egrikalsa i wanpela bikpela rot bilong pulim mani i kam insait long kantri. Na sapos i nogat wok i kamap long stapim kain sik bilong ol binatang olsem, kantri bai stap long bikpela hevi.

Olsem na long lukluk moa na glasim ol dispela sik na hevi, DAL i bin holim wanpela kibung long Mosbi. Moa long 37 saveman bilong egrikalsa i bin bung na toktok long rot bilong stapim sik. Tasoi bikpela lukluk bilong ol i bin sut long wanem hap bilong kisim mani bilong yusim long pait wantaim ol binatang nogut. Ol saveman i bin kam long ol kain kampani na gavman dipatmen.

Long nau, kakao i save kisim taim long 20 sik nogut. Dispela ol sik i save bagarapim kakao long kamap bikpela, long karim gutpela pikinini na long stap winim taim. Kopra na kopi tu i bungim wankain hevi nau.

Na long gaden, ol kain kaikai olsem potato, kaukau, banana, wel pam, suga na pitpit bai painim wankain birua olsem.

Bikpela toktok i sut nau long kirapim bisnis bilong rais long kantri. Dispela bisnis bai kamap na ron gut sapos ol demdem i no krungutim ol rais plantesisin pastaim. Demdem i wanpela bikpela hevi tru long Morobe na Isten Hailans provins.

Ol saveman i bilip olsem ol demdem i kam long ol kantri long Saut Is Asia. Narapela bikpela hevi bilong rais bisnis em wanpela sik bilong kon nau i stap long kantri. Ol i bilip olsem dispela sik i kam long Afrika. Ol suga long Ramu Suga i kisim taim nau long dispela sik.

Long pinisim dispela sik, gavman i mas painim hariap sampela moa saveman insait long 5-pela yia bilong lukluk long dispela hevi.

Hagen i no pipia ples



• Philip Aret na Reuben Simon i pret nogut Hagen taun atoriti i sasim ol long tromoi pipia nabaut long taun. Olsem na tupela i tromoi stret pipia i go insait long dram.

WANPELA stik masis o pipia bilong sigaret i pundaun long Hagen taun bai kosim yu K20. Sapos nogat, bai yu go kalabus inap long tupela wik long Baisu Haus Kalabus.

Nogat wanpela man, meri o pikinini i laik salim skin na baim nating K20, olsem na wanem gutpela samting bilong mekim em long tromoi stret pipia bilong yu long dram. Na ol lain husat i save go limlimbur long Hagen taun i save kisim dispela tok save pas-taim. "Nogat bai Hagen taun atoriti i mekimsave long yu."

Olsem na long poto, dispela tupela yangpela, Philip Aret husat i gat 14 krismas na Reuben Simon

(husat i gat 7-pela krismas tasol) bilong Wil Viles long Baiya Riva i kisim pinis dispela strongpela tok save i kam long papa bilong ol. "No ken tromoi pipia nabaut taim yupela i raun long taun." Na ripota bilong mipela, Riggo Nangan i bin bungim ol long Hagen taim em i raun long hap. Tupela i bihainim stret lo na tromoi pipia long dram pipia long las wik Fraide.

Tupela yangpela ya i save skul long Kingaringa komyuniti skul long Baiya Riva. Na papa bilong ol i save wok long Hagen taun atoriti. Tupela i bin kam raun long skul holide taim kamera man bilong mipela i bungim ol.

Nupela kampani laik tekova long Mussau timba long Nu Ailan

SAM VULUM i raitim

OL pipel bilong Mussau long Nu Ailan provins i no laikim lokal timba kampani, Mussau Timba Developmen Pty Ltd long wok long hap bilong ol.

Long wanpela pas i go long Seketeri bilong Fores, Michael Komtagarea, tupela mausman bilong ol Mussau pipel i tok Mussau Timba Developmen Pty Ltd i giamanim ol papa bilong graun. Ol i no kisim ol sosel sevis em kampani i promis long givim ol.

Tupela mausman ya, Samuel Marauru na Paslo Karati i bilong nupela kampani bilong ol Mussau manmeri, Aisokosokoia Pty Ltd. Mista Marauru pastaim i wok wantaim Mussau Timba Developmen Pty Ltd. Tasol kampani i rausim em bikos em i tokaut long ol samting kampani i mekim.

Tupela man ya i tok tu olsem Fores Seketeri, Mista Komtagarea i no bin harim askim bilong

ol pipel bilong Mussau olsem kampani, Aisokosokoia i mas kisim timba pemit.

Mista Komtagarea i daunim askim bilong ol na givim pemit long olupela kampani, Mussau Developmen Kop-

Komiti bilong graun bai stat

NESENEL gavman bai kisim bek graun bilong ol man na kampani husat i no kirapim ol wok long en.

Dispela em wanpela bikpela senis nupela minista bilong Lens na Fisikel Plening, Sir Hugo Berghuser i tokaut long en long Tunde.

Sir Hugo i tok wanpela komiti bai kamap long harim na skelim toktok bilong ol papa bilong ol graun em gavman i kisim.

Em i tok sapos ol i gat gutpela as bai komiti i givim bek long ol. Dipatmen bai kisim bek ol hap graun em no gat wok i kamap long ol inap long 12-pela mun. Dispela long wanem i gat planti paul pasin tru i bin kamap long wok bilong graun long ol yia bipo i kam inap nau.

Narapela bikpela senis tu em minista i hariapim nau ol Taun Plening Bod long stretim pepa bilong tupela hap graun bilong putim ol setelmen insait long Mosbi.

Ol dispela hap graun bilong tupela setelmen bai stap long Tokarara na 9-mile. Ol bai makim 800 blok long dispela tupela hap graun.

Nupela minista i tokaut tu olsem hap graun em olupela Lae ples balus i sindaun long en bai kamap olsem wanpela bisnis eria.

Sekap long Helt ...

i kam long pes 1

Ol ripot bilong dispela wok painimaut i bin go tu long seketeri bilong dipatmen i lukautim wok bilong Pesenel Menesmen, Bill Dihm na siaman bilong Pablik Sevis Komisn, Ekorome Age.

Long pas bilong Mista Beona yet, em i tok, "Bikpela mani tru i wok long lus na paul insait yet long dipatmen. Na mi sutim olgeta toktok long seketeri bilong dipatmen nau i stap long en, bikos em i save lukautim planti bikpela wok na rot bilong mani i go long en.

"Sampela sinia opisa bilong dipatmen i brukim pinis lo bilong lukautim na yusim mani aninit long Fainens na Odit Ekt. Mipela i sekap nau long dispela. Tasol bikpela toktok bai pas long seketeri nau bikos em i mas stap olsem namba wan man bilong luksave long ol dispwela samting sapos i no ron stret," Mista Beona i tok.

Minista i tokaut tu olsem bikpela toktok i kamap na sut nau long planti helt opis long olgeta kona bilong kantri bikos ol i no amamas long kain lo na tingting em i kamap long opis bilong Dokta Reilly.

Em i skruim toktok olsem wantok sistem na wansait pasin i wok long kamap insait long taim bilong givim namba na promosen long ol woka. Dispela i save kamap bikpela tru long ol lain i stap namel. Em i sutim toktok tu olsem dipatmen i no save givim gutpela helpim na sapot tumas long bikpela haus sik bilong Mosbi (PMGH) na ol arapela haus sik long kantri.

Long dispela as, ol haus sik na klinik long kantri i no save givim inap marasin na helpim gut ol sikman, meri na pikinini.

Mista Beona i tok Medikal Sosaiti bilong Papua Niugini i sapatim ol toktok bilong em.

"Dipatmen i sot tru nau long ol saveman na meri (speselis) bilong wok insait long ol haus sik long kantri. Bikpela haus sik long Mosbi i gat tripela dokta tasol bilong skulim na helpim ol man, meri na pikinini.

PLIS



RIPOT

MOSBI: Sampela man i bin sutim na kilim wanpela man Simbu long Waigani long Mande moning. Ol plisman i bilip olsem dispela birua i bin kamap bihain long dispela man wantaim ol wantok bilong em i spak insait long haus na kros i stat. Ol plisman i holim pinis tupela man bihainim dispela birua.

LAE: Ol plisman i holim na sasim pinis 14 man na meri long brukim taim tambu long siti i kam inap long Sande apinun. Na long wanpela opere-sen em i bin kamap long Wau, ol plisman i holim na sasim tu wanpela man em ol i bilip i bin bagarapim wanpela meri. Ol i bin painim na kisim tu planti samting em ol i bilip man ya wantaim ol arapela i bin stilim.

KAVIENG: Tupela brata husat i bin ranawe long haus kalabus long Nu Ailan provins las yia i givim ol yet pinis long ol plisman.

Tupel brata i bin kalabus long sas bilong kilim man. Provinsal Plis Komanda Titus Pamben i tok David na Steven Stanley i bin go long ol plisman bihainim askim bilong mama bilong tupela.

Tupela i bilong Luapul viles long Kavieng, Nu Ailan provins.

LAE: Plis ripot i tok nau i no gat bikpela hevi kamap insati long ol komyuniti. Tasol long Mande na Tunde nait, ol plisman i bin sasim 15 man long brukim taim bilong kefiu.

Ripot i no tokaut long hamas meri i stap namel long dispela grup. Asisten Komisina Pulai i tok Lae siti i no painim wanpela bikpela hevi taim kefiu i kamap. Em i tok ol plisman i wok gut long ol hap we planti trabel na hevi i save kamap.

VANIMO: Ol plisman i holim na sasim 9-pela man wantaim wanpela kepten bilong sip long stilim K1, 100 bilong Aitape Hotel long Fraide nait.

Ripot i tok ol dispela man i bin kalap long wanpela sip na ranawe i go long Vanimo taim ol plisman i holim ol.

Kepten bilong sip ya i stap nau long haus kalabus bikos ol plisman i bilip olsem em i bin kisim hap mani.

RABAU: Distrik Kot i sasim wanpela man Simbu long groim spakbrus long gaden bilong em.

Paul Keri husat i gat 30 krismas bilong Kalvir viles long Chuave, Simbu provins bai stap long kalabus inap long 4-pela mun.

Ol plisman i holim em long Sang Plantesisin long haus bilong em long Mande moning. Drag skwat bilong Rabaul i harim olsem Keri i redi pinis long salim spakbrus ya. Na ol i go holim em.

Ripot i tok Keri bai i stap long kalabus long tupela sas. Wanpela bilong groim spakbrus long gaden na narapela bilong salim spakbrus.

MOSBI: Wanpela man husat i kilim kepten bilong wanpela sip long Yule Ailan long stat bilong dispela yia i stap yet long kalabus.

Ripot i tok ol plis i askim em yet long dispela pasin. Ol plisman i lukim em insait long wanpela PMV long Hiritano haiwe long Fraide apinun na holim em.

Ol i kisim em i kam long Mosbi na givim em long han bilong Kriminol Investigesen Divisen.

Ripot i tok dispela man i bin mekim dispela pasin long Fraide 20, Mas 1991 long Yule Ailan. Kepten Naman i dai taim wanpela bilong ol 6-pela man husat i stap antap long sip i sutim em long gan.

Wanpela man Australia husat i wok tu long dispela sip i kisim bagarap tu.

Ol plisman i mekim wok painim aut yet long holim pasim ol arapela 5-pela.

• Olpela provinsol Fainens minista Mista Herman Savura i bin i dai long ka long 7 klok long Gerehu long Sande apinun.

Ripot i tok Herman husat i gat 31 krismas bilong Poi viles long West Nu Briten provins. Em i dai stret taim ka em i stap insait long en i bam wantaim wanpela PMV bas.

Ol arapela 7-pela man i stap insait long ka ya i kisim baqarap tu. Olgeta i stap haus sik nau.

Gavman givim K450, 000 bilong sapatim ol kopra na kakao groa

GAVMAN bai sapatim gem ol kakao na kopra groa long kantri. Las wik Minista bilong Egrikalsa na Laipstok, Tom Pais i givim K450,000 i go long Kakao na Kokonas Rises Institut.

Mista Pauias i givim dispela mani i go long dairekta bilong Institut, Dokta John Kola long Mosbi.

Dokta Kola na seketeri bilong Egrikalsa na Laipstok, Paul Sai i putim mak bilong tupela antap tu long wanpela pepa i karamapim tok orait bilong dispela helpim mani.

Mista Pais i givim mani na tok, "Dispela mani i kam aninit long bikpela helpim gavman i givim long karimaut wok painimaut bilong Egrikalsa insait long kantri."

Primia Nalau makim kabinet

PRIMIA Jerry Nalau i makim pinis ol wok minista long nupela namba 4 provinsal gavman bilong Morobe.

KKabinet i gat 8-pela Pangu memba, tupela Pipels Demokretik Muvmen (PDM), na tupela independen memba. Primia Nalau bai i senisim dispela kabinet long bihain.

Wanpela kibung i kamap long Mande na tokaut long kabinet bilong Primia Nalau: Jerry Nalau/Primia (Pangu-Komyuniti Gavman na Dvelopment Atoriti Minista), Mang Kembu/Deputi Primia (PDM-Fores Minista), Yaip Avini (Pangu-Minista bilong Fainens Polisi Plening na Edministresen, Morokoi Gaiwata

(Independen Memba-Woks na Trenspot Minista), Isaac Narrol (Pangu-Edukesen Minista), Titi Christian (Pangu-Helt Minista), Luke Yabong (Pangu-Minista bilong Fisaris na Marin Risoses), Gelembing Yaplen (Pangu-Minista bilong Praimeri Sevises), Kovi Wamban (Pangu-Komes Minista), Marion Lia-wong (Pangu-Minista bilong Yut na Komyuniti Dvelopment), Donald Donasu (Pangu-Minista bilong Yut na Komyuniti Dvelopment), Kaive Mauri (Independen Memba Minista bilong Lans na Mains.

Olgeta dispela minista bai i kisim opis long Mande 15 Epril, 1991.

Loya egensim ol plisman sasim Ramoi

SAM VULUM i raitim

OL loya bilong olpela memba bilong Aitape/Lumi, Gabriel Ramoi i tok ol plisman i no gat pawa long kisim ripot bilong Ombudsmen Komisn na sasim Mista Ramoi.

Pravet loya, Peter Donigi i tokim Boroko Distrik Kot long Trinde (aste) olsem ol plisman i no gat pawa long kisim ripot bilong Ombudsmen Komisn long sasim Mista Ramoi. Olplisman i mas mekim wok painimaut bilong ol yet.

Mista Donigi i tok Kot i no inap autim tingting bilong en long toktok bilong Mista Ramoi inap kot yet i painimaut sapos ol plisman i bin gat pawa long yusim ripot bilong Ombudsmen Komisn an sasim Mista Ramoi o nogat.

Tasol loya i tok tu olsem em i no gat toktok long ol sas em plisman i putim long Mista Ramoi. Dispela tupela sas em i tru. Plis i painimaut olsem Mista Ramoi i bin paulim K18,500 bilong Stet long 1988 taim em i stap yet olsem memba bilong Aitape/Lumi long gavman.

Loya i makim Stet i tok ol plisman i bihainim olgeta rot aninit long lo bilong sasim Mista Ramoi. Em i tok i tru olsem ol plisman i bin kisim helpim bilong Ombudsman Komisn tasol ol plisman yet i bin mekim wok painimaut bilong ol antap long dispela.

Stet loya i tok tu olsem Distrik Kot i no gat pawa long autim tingting bilong en long ol sas em i bin toktok long konstitusen. Sapos Distrik Kot i mekim olsem, dispela bai brukim lo. Wok bilong Distrik Kot em long painimaut sapos i gat planti samting i tru long sas bilong Mista Ramoi bai em i ken kamap long Nesenel Kot.

Na tu dispela kot bilong Mista Ramoi i bin stap longpela taim nau na i gupela long hariapim bikos ol pipel i laik save long wanem samting i wok long kamap.

Namba bilong pipel long kantri i go antap moa long 1980

Namba bilong ol manmeri i stap long Nesenel Kapitil Distrik i bikpela moa long ol narapela provins long kantri.

Nesenel populesen senses bilong 1990 i soim olsem namba bilong ol manmeri nau i go antap long 69,376 moa long 123,624 long 1980 senses. Dispela i go antap long 23 pesen.

Namba bilong ol manmeri long Enga provins i kamap namba tu wantaim 71,466 manmeri. Dispela i winim 164,534 manmeri long 1980 senses.

Wes Nu Briten, Is Nu Briten, Westen provins i kamap namba tru long lain.

Namba bilong ol manmeri long Simbu provins i bin go antap liklik tasol. Em i go antap long 3 pesen. Na Galp provins i kamap namba tu long en. Namba bilong ol manmeri i go antap long 6 pesen.

Tasol senses i no bin kamap long Not Solomons provins, bikos long hevi nau i stap yet. Tasol rekot bilong en long 1980 senses i soim olsem i gat 128,794 manmeri i stap long provins.


Tasol Morobe i go pas long ol narapela provins long namba bilong ol pipel long provins. Em i gat 357,000 manmeri na Saten Hailens i kamap namba tu wantaim 303,000 pipel.

Manus provins i gat liklik namba tru bilong ol manmeri. Em i gat 33,000 pipel tasol na Galp provins i bihainim em long 68,000.

Namba bilong ol pipel long wan wan provins long 1980-1990

	1990*	1980	Difference	Percentage increase
Western	109,000	78,575	30,425	39%
Gulf	68,000	64,120	3,880	6%
Central	141,000	116,964	24,036	21%
National Capital	193,000	123,624	69,376	56%
Milne Bay	157,000	127,975	29,025	23%
Northern	97,000	77,442	19,558	25%
Southern Highlands	303,000	236,052	66,948	28%
Enga	236,000	164,534	71,466	43%
Western Highlands	291,000	215,456	75,544	35%
Simbu	184,000	178,250	5,750	3%
Eastern Highlands	297,000	276,729	20,271	7%
Morobe	357,000	319,627	47,373	15%
Madang	270,000	211,033	58,967	22%
East Sepik	241,000	221,440	19,560	8%
West Sepik	135,000	114,250	20,750	16%
Manus	33,000	26,036	6,964	27%
New Ireland	86,000	66,628	19,372	28%
East New Britain	184,000	133,197	50,803	28%
West New Britain	126,000	88,941	37,059	42%
North Solomons	?	128,794	128,794	100%
Total	3,508,000	3,010,727	497,273	17%


Namba bilong ol pipel long wan wan provins long 1980-1990



FRI BAIBEL KOS YU KEN KISIM SKUL LONG SALIM PAS

Salim nem na edres long: WORLD BIBLE SCHOOL, Dept. VD21, P.O. Box 9346, Austin, TX 78766 USA

VD22



ALU SIGNS PTY LTD

PO BOX 7081, BOROKO PH: 25 4800 STORE: NEAR BOROKO POLICE STATION



WANTOK

NIUSPEPA BILONG OL PAPUA NIUGINI STRET

Tingim kraik bilong sik pikinini

HAUS sik bikpela samting tru long laip bilong pipel. Na olsem wanem dispela kain samting nau i kamap bihainim ripot bilong dispela pepa long pes 1. Bilong wanem bai ol bikman antap i mekim olsem?

Dispela i soim klia olsem ol lain i stap antap i tingim tasol mani, poket na pren bilong ol. Planti pipel bai askim watpo mipela i no autim nem bilong dispela meri bilong sinia minista husat em nem bilong em i stap insait tu long dispela ripot.

Sapos ol ripot bilong mani i paul i tru long Helt Dipatmen i tru, i luk olsem Papua Niugini bai lusim brek na rives nau. Bikos dispela em wanpela hap we planti pipel i save ting kain samting olsem i no inap kamap. Long wanem, wanpela bikpela tingting bilong ol man long ol lain bilong haus sik em, "Ol lain bilong tingim laip na gutpela sindaun bilong pipel". Tasol bilong wanem bai kain samting olsem i kamap?

Tasol mipela i no ken autim wankain tingting long ol lain long ol provins. Bikos i luk olsem ol i laikim tru long helpim pipel.

Patrick tingim yet famili long Buka

DAVID WAMBI i raitim

SAN i go daun pinis na taim nau em 5 klok long apinun long Buin long Not Solomons provins. Ol manmeri i hariap nau bilong go na insait long haus bilong ol.

Long dispela taim, long Kieta, pait i bruk namel long ol papa bilong graun bilong sentrel Bogenvil na ol lain sekuriti fos husat i stap long ailan.

Sampela man long tupela sait wantaim i dai na pait i stapim ol gavman sevis na ol bisnis nabaut long wok. Ol pipel i kisim tok save olsem ol i mas stap husat long haus pastaim long ples i tudak.

Long Buin yet, ol lain tasol i raun long ol rot nabaut em ol yanpela mangi husat i was nogut pait i kamap. Tasol insait long wanpela haus, wanpela yanpela man i wok mekim ol bilong em yet. Ol famili bilong em i pasim maus tasol na lukluk long em.

Pait i kamap na i mekim hat tru long yangpela ya, Patrick Bobby bilong go bek na skul long Divine Word Institute long Madang. Pait i wok long kamap bikpela long Buin na em i tingting planti olsem em bai i no inap go bek long skul.


"Mi lukim pinis trabel i stat na mi laik stap bek long ples. Tasol mi no laik kamap olsem wanpela grasrut bilong ples. Mi laik kamap wanpela bikman na helpim ol pipel bilong mi," Patrick i tok.

Long dispela nait yet, Patrick i laik tantanim tupela hap gras bilong em na mekim ol i go longpela. Em i go long bus na kisim ol lip diwai nabaut na putim long gras bilong em bilong tantanim. Dispela long wanem ol pipel bilong Buin i soim sori bilong ol long gras tantanim. Tasol Patrick i tantim tupela gras tasol long soim olsem em bai lusim famili bilong em.

Na sampela de bihain tasol long dispela, em i lusim famili na go long Madang. Dispela em i las taim em i lukim famili bilong em. Em i wari yet long famili bilong em.

Long Madang, planti man i bin soim kros bilong ol long pait long Bogenvil long em na em i pilim nogut tru. Olsem na em i lusim skul na ranawe i go stap wantaim wanpela pren bilong em long Kimbe long Wes Nu Briten.

Olgeta taim em i wok long wari olsem famili bilong em i stap yet o nogat. "Tasol olgeta taim tingting i save kam bek olsem olgeta samting bai



Patrick Bobby ... laik kamap bikman.

orait gen," em i tok.

Patrick i gat wanpela wantok tasol i stap ausait long Bogenvil, em brata bilong em i stap long Bomana seminari. Tasol long Novemba 1990, brata bilong em i go long Bogenvil wantaim ol narapela wanskul bilong em.

Patrick i tok em i harim olsem ol BRA i bin holim

brata bilong em, tasol em i gat bikpela bilip olsem brata bilong em i stap orait yet. Patrick i no bin go bek liklik bihain long em i lusim ples long 1989.

Na wanpela tingting tasol em i gat nau em long hevi long ailan i mas pinis hariap bai em i ken lukim famili bilong em yet.

Press Kaunsil bilong PNG

Sapos yu gat sampela hevi yu laik autim long Pres Kaunsil, orait salim pas i go long dispela adres: The Secretary, Press Kaunsil, P.O. Box 85, Port Moresby.

WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO
Telepon Namba: 25 2500
Feks Namba: 25 2579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

Bogenvil Revolusineri Ami i bruk nau

i kam long pes 1

Pater Momis i askim ol lida long wok bung wantaim na stretim gen ol samting long Bogenvil.

Taim em i stap long Buka, Pater Momis i lukluk raun long ol senta em ol man i stap long en na tokim ol pipel long progrem bilong gavman. Em i amamas long pasin ol pipel bilong Buka i

mekim long wokim gen ol haus na ol skul i bagarap long taim bilong hevi.

Em i tokim ol pipel long plen bilong gavman long kisim bek ol sevis long ailan, tasol em i tok klia olsem dispela bai kamap gut sapos i gat gutpela wok bung wantaim na bel isi long tupela sait wantaim.

Meri Nissan amamasim drama de

THOMAS JEFFREY i raitim

OL meri bilong Nissan ailan long Not Solomons provins i bin holim Wimens Drama Festival De bilong ol long 14 Februeri.

Dispela de em Nissan Wimens Kaunsil na Nissan yut opis i kamapim i sut long kirapim tingting bilong ol meri na helpim ol long kamap strongpela mausmeri. Olsem bai ol inap sanap strong na toktok long sait bilong ol meri na maski pret o sem long toktok.

Pasin bilong ol meri long bihainim na harim tasol toktok bilong tambu na brata i bikpela tru long Nissan. Na ol yet i no inap toktok bek long taim bilong kibung.

Wan wan liklik wimens grup i bin redim drama o pilai bilong ol yet long autim. Planti grup i autim kain pilai we i sut long hevi em ol marit i save painim long ples. Dispela em ol kain hevi bilong spak na wanem hevi em ol senis nau i kamapim insait long ol ples.

Ol arapela grup i bin putim kain pilai i stori long rot bilong stretim ol hevi na kros na pait. Na rot bilong

bung wantaim na strongim gutpela sindaun bilong ol meri insait long komyuniti.

Long dispela de, 16 drama grup olgeta i bin kamap. Tripela sas bilong i bin painim hat tru long tokaut long wanem grup i autim namba wan, namba tu na namba tri ples long pilai.

Namba wan prais i bin go long ol meri bilong Gereee wimens grup. Na tupela grup i bin winim namba tu ples. Dispela tupela grup em Belaluta na Mapiri wimens grup. Olgeta narapela drama grup husat i bin kamap tu i kisim ol spesel prais.

Long dispela de, ol meri i bin pulim samting olsem 500 man, meri na pikinini.

Mausmeri bilong ol meri Nissan na meri husat i helpim long kamapim dispela de, Martina Karen i givim bikpela tok amamas i go long olgeta lain husat i bin kamap na amamasim wantaim ol meri.

Nissan Distrik Yut opis i givim tu bikpela tok amamas i go long Quaker Peace & Service grup bilong Yunaited Kingdom long gutpela sapot na helpim bilong ol.

BIA? BIABIA GO RAUN LONG BOMANA HOS RES...

KAMON SUZI BEIBE!! WIPIM TASOL IGO!

HOSV RES BOMANA HOS RES

EM I KAMAP LONG 9-MAIL PLES MATMAT LONG 8-KILOK STRET... (KEFIU TAIM)

HA HA! BAI MI SILIP LONG HUL YA... OL POLIS I NO INAP SAVE!

EM LUKIM WANPELA HUL NA 60 INSAIT NA SILIP...

6-KILOK PINIS NA OLGETA P.M.V I NO RAUN... TARANGU BAGAROS I WOKABAUT...

BLARI G*?!! P.M.V. BAS!! MASKI, MI WOKABAUT IGO!

TASOL EM I NO SAVE OLSEM EM NUPELA MATMAT BILONG INDAI MAN...

AAAAA POLISS KAM KIEIM MI!! KARIM MI IGO LONG SEL!!

MAN, TAIM BIABIA I SAVE OLSEM EM MATMAT, EM SUT NA SINGAUTIM OL POLIS...



Wanpela grup bilong ol meri long Nissan i soim kain pilai bilong ol. Poto Sheldon Weeks.

Wara brukim graun long Bolivip viles

Ol pipel bilong Bolivip viles long Westen provins i laki tru ol ino dai taim bikpela graun i bruk las wik.

Graun i bin karamapim tasol ol gaden kaikai. Na long las wik, sampela patrol opisa, ol helt woka na plisman i bin kisim helikopta na go long hap bilong skelim bagarap.

Kodineta bilong Not Flai eria, John Kup i tok graun i bin bruk bihain long tupela bikpela raun wara (lek) antap long Maunten Paime i kapsait. Bikpela ren i bin pundaun na statim dispela.

Wara i kapsait na ron i go daun long sait bilong maunten na brukim graun nabaut. Bikpela graun i bin bruk na kapsait long nait, tasol gutpela tru nogat haus i stap stret long ples em graun i bruk long en.

Ol pipel i bin kirap long nait na ranawe i go hait long ol maunten

Wok bai stat long Aitape-Lumi rot

BEN TAUMAI i raitim

WOK bilong Aitape-Lumi rot bai stat gen long mun Me. Dispela em bihain long ol i bin pasim ol wok inap long tripela yia nau.

Primia bilong Sandaun, Egbert Yalu i bin tokaut long dispela taim em i go stap insait long bung bilong ol meri bilong Momase long Madang las wiken.

Mista Yalu i tok olsem provinsal gavman yet bai bungim K150,000 bilong stretim rot namel long Aitape na Lumi. Na ol ensinia bilong Papua Niugini na Australia Difens Fos bai go pas long ol wok bilong stretim rot.

Primia i tok wok bai go het tasol. Na sapos mani i pinis long wanem hap, hap wok bai stap gen na wetim narapela taim. Bikos nesenel gavman i no luksave long dispela rot na i no inap givim helpim.

"Olgeta pepa wok i redi pinis na mipela i wetim

tasol ol lain bilong Difens Fos long kam na statim wok."

Wok i bin stap pastaim bikos ol pepa wok i no stret, olsem na Woks Dipatmen i rausim ol masin bilong en.

Long narapela samting, Mista Yalu i tok tu olsem tingting i stap pinis long kirapim wanpela kakao opis long Aitape. Tasol nau ol i wok long painim mani na man husat i gat gutpela save bilong ranim na lukautim dispela opis. Dispela i bihainim hap tingting bilong provinsal gavman long kirapim Aitape olsem bisnis senta bilong provins.

Mista Yalu i tok tu olsem K800,000 i stap pinis bilong kirapim wok long stretim bris long Aitape. Bihainim dispela bikpela projek bilong 5-pela yia, ol bai putim tu kolta long Lumi, Nuku, Amanab na Telefomin. Tasol dispela ol samting i no inap kamap nau.

Luteran kisim nupela sip

LUTERAN Sios bai kisim namba tu sip bilong em bilong karim kontena M.V. Kuder long Fraide, 12 Epril, 1991.

Bung bilong amamasim dispela nupela sip bai kamap long Vocco Poin. Namel long ol lain bilong kamap long dispela bung em pikinini meri bilong Reveren Kuder, Maryanne Friend na man bilong em. Tupela bai makim Kuder famili.

Nupela sip ya i kisim nem bihainim Reveren Dokta Kuder husat i namba wan bisop bilong Evanjelikel Luteran Sios bilong Papua Niugini. Dispela sip i wankain long M.V. Wewak. Em i

bin kam na stat brukim solwara bilong PNG long 31 Mas.

Jenerel Menesa bilong Luteran Sipping, Terry Fuery i tok kampani i bin baim narapela kontena sip bikos planti pipel nau i save laikim long salim kago bilong ol long kontena.

Nau i gat tupela kontena sip. Olsem na ron bilong tupela bai senis liklik. Wanpela bai statim ron bilong em long Oro, Lae, Madang, Wewak na Vanimo na narapela bai wokim bilong em bihain long wanpela wik.

Nupela sip bai kamap long Lae long Fonde.

Gavana Jenerel tokaut long ol provinsal holide

GAVANA Jenerel, Sir Serei Eri i tokaut pinis long ol de em 9-pela provins long kantri bai holim ol pablik holide bilong makim ol provinsal de long dispela yia.

Ol holide bilong ol dispela provins bai stat long Julai. Namba wan provins long kisim holide em Milen Be long 8 Julai.

Ol narapela em Is Nu Briten - 15 Julai, Westen Hailans - 23 Ogas, Manus - 23 Ogas, Enga - 2 Oktoba, Wes Nu Briten - 5 Oktoba, Is Sepik - 29 Oktoba, Oro provins - 3 Disemba, Wes Sepik - 4 Disemba.

Sir Serei i bin tokaut tu olsem kibung bilong palamen bai kamap long mun Me long 2 klok apinun. Em i tok dispela i kamap bihainim askim bilong Nesenel Eksekutiv Kaunsil (NEC) olsem kibung i mas kamap hariap.



KEFIU long Mosbi na wanpela meri Goroka i draivim ka bilong em i go olsem long Waiganil. Long rot, wanpela spakmeri i stapim ka na tokim em, "Plis sir, givim mi lift bikos kefiu is coming." Long hap rot, meri Goroka askim pasindia long wanem hap em i save slip long en. Spakmeri i bagarap pinis na em bekim, "Yu nogat rum long haus bilong yu o olsem wanem?" Spakmeri i tok olsem nau na kirap holim meri Goroka. Meri Goroka i kirap tasol, stapim ka na sutim nus bilong spakmeri ya. Bihain em lusim spakmeri long rot na tekov i go long haus.

Mathew Asa, Tokarara, Mosbi.


KEPTEN bilong sip em wanpela waitman. Em kirap na tokim kru bilong em, wanpela Tari, long was na sapos em i lukim sak o wanem samting, em i mas bikmaus. Tasol Tari i no save gut long Inglis. Sip i lusim bris na katim solwara i go ausait na Tari i lukim hap diwai i drip i kam. Em kirap na bikmaus, "I can looksee a shark!" Kepten i harim liklik tasol na askim, "Where?" Boi Tari bekim, "What for?" Kepten bel kaskas olgeta na lep na rait na senta long kru bilong em.

WANPELA pilaia bilong nesenel tim husat i kamapim nem long kunai klap em golkipa bilong Mitif, Akanda Gidigia. Insait long wanpela trening long Bisini Pak, Akanda i laik sevim wanpela bal, tasol em i abrus na bamim pos. Stail bilong Akanda, samting nogut bilong Markham i pani ya. Taim em bamim pos, em i singautim kosa John Peka long stretim gol pos bilong Mosbi soka. Akanda i tok sapos em i bamim mambu, golpos bai bruk ya. Tasol laki em paip ya. Samting tru Akanda i kisim taim. Golpos bilong Mosbi i autim em.

Man Kerema i spak na wokabaut i kam long rot. I no longtaim ol manki raskel i bungim na hensapim em. Man Kerema i save olsem em i stap pinis long mak nogut olsem na em askim ol raskel manki ya olsem. "bois ya plis, mi laik joinim yupela ya". Taim ol raskel manki ya i harim olsem ol i paitim het bilong em long stik na tokim em, "Yu ting mipela i save kisim pe long dispela wok ah?". Ol i tokim em long rausim olgeta samting bilong em. Taim ol i wok long autim samting bilong em, em i wok long tok yet, "bois ya, plis mi laik joinim yupela ya". Ol manki i kisim olgeta samting bilong em pinis na man ya i as nating olgeta. Ol i tokim em long ran. Trangu hatim ran i go longwe hap liklik na em tanim na singaut i go bek long ol raskel manki olsem, "harim, yupela yupela olgeta i satan lain stret. Em tok olsem na tekov i go pinis.

Leni Zero MOSBI (Bom-X)

Bus i karamapim Wewak Timbers opis



Olpela opis na haus bilong Wewak Timbers long biktaun bilong Is Sepik provins. Nogat wok nau na opis i stap nating, bikpela bus i karamapim nau na ol yangpela manki i raitim nem na kain kain toktok nabaut. Poto na stori: Edward Meata.

Pe em liklik tru...Teis gut tru!



10t 10t 10t 10t

NO KEN PEIM MOA LONG OL STOA!

TU MINIT TINGTING

FRANK MIHALIC i raitim

TELIPON I SKULIM YUMI LONG BETEN

"Tru tumas, God i harim beten bilong mi." (Sam 66:19)

YUMI olgeta i save long pasin bilong ring long telipon. Pastaim yumi apim telipon, nau yumi tanim ol namba wantaim pinga, nau yumi harim telipon bilong narapela man i ring. Orait, nau yumi kirapim toktok wantaim narapela man o meri i stap longwe, na yumi no inap lukim em. Ol dispela pasin inap skulim yumi long lo bilong pre long God.

Nogut yumi komplek na yu tok, "Olsem wanem na mi inap beten long God sapos mi no inap lukim em?" Olgeta de yu save mekim olsem long taim yu ring long telipon. Yu no inap lukim narapela man o meri.

Orait, nau yumi bihainim pasin bilong ring long telipon na kisim skul bilong beten. Pastaim yumi apim telipon. Dispela i opim lain

bilong toktok. Orait, nau yumi tanim ol namba i ringim telipon bilong narapela man i stap longwe. Man ya i apim telipon bilong em na nau em i stat long toktok wantaim yu.

Lukim gut nau: yumi no save apim telipon na stat long toktok wantu. Nogat. Yumi mas redim telipon pastaim; yumi mas ring na bungim telipon bilong yumi wantaim narapela telipon. Nau tasol yumi redi long toktok. Long beten tu i wankain. Yumi no ken ting yumi inap singautim nating nem bilong Jisas o God o wanpela santu, na wantu em i sambai long harim pre bilong yumi. Nogat. Yumi mas redi pastaim; olsem long taim yumi ring. Yumi no save apim telipon tasol na stat long toktok wantu. Nogat.

Orait, long taim yumi laik pre, yumi mas mekim wankain. Yumi mas klaim tingting pastaim, na wet liklik na stiaim tingting i go long God. Em i kranki sapos yumi ting olsem: maus bilong yumi i ken pairap nating na autim wanpela beten, long taim tingting bilong yumi i stap longwe tru. Nogat. Beten em i samt- ing bilong maus na tingting wantaim.

Long taim yumi ringim narapela man/meri, yumi no ken toktok toktok tasol. Nogat. Yumi mas putim yau tu. Yumi save senisim toktok wantaim narapela man o meri. Long beten i wankain: yumi no ken toktok tasol na sutim olkain beten i go long God. Yumi mas opim yau na givim spes bai God i ken tok- tok long yumi tu.

Yumi wan wan i gat telipon i stap insait long spirit bilong yumi. God i save toktok long yumi long dispela telipon; yumi save kolim em tok insait. Putim gut yau long en na bai yu inap harim tok stia bilong God, na tok lukaut, na tok save i kamap long insait bilong yu yet. Em telipon bilong God tasol.

Sampela taim yumi ring long telipon na man o meri i no stap, na telipon i ring nating. O sampela taim yumi no inap ring, long wanem, man o meri i wok long toktok wantaim narapela man o meri, na dispela i pasim rot. Yumi save tok olsem: lain i bisi. Tasol long taim yumi beten long God, i no gat wanpela taim em i no stap. Na i no gat wanpela taim lain bilong em i bisi, long wanem, God em inap tok-

tok wantaim planti manmeri wantaim.

Na i gat wanpela samting moa: i no gat wanpela beten i save popaia. Nogat. Olgeta beten i save kisim wanpela ansa. Tasol sampela taim dispela ansa i no pas wantaim askim bilong yumi. Bilong wanem? Long wanem, God i save tumas na sampela taim em i senisim askim bilong yumi wantaim narapela kain bekim. Nogut yumi bin askim long wanpela samting na dispela em inap bagarapim yumi. God i save pinis, na nau em i givim narapela samting long yumi.

Em tasol. Nau olgeta taim yu lukim wanpela telipon, bai yu inap ting olsem: bai mi ring long God nau.....bai mi pre long em, nau tasol.

Wol Federesen givim K80,000 bilong helpim alkohol edukesen program

LUTERAN Wol Federesen bai givim K80,000 bilong helpim Alkohol Edukesen program. Divisen bilong Lutheran Heit Sevises long Papua Niugini i save lukautim dispela wok.

Mani i bilong helpim program inap long tripela yia long Madang, Goroka, Finsafen, Lae na Hagen.

Bos bilong program wantaim Evangelikel Lutheran Sios bilong Papua Niugini, Reveren Joshua Daniels i tok sios i save kisim bikpela helpim bilong Lutheran Sios long Bavaria na Amerika long sapatim dispela program.

Long statim dispela program, Alkohol Edukesen Opis na Hans Seidel Faundesen i kirapim pinis kos bilong dispela program. Kos bai stap inap long 7-pela wik. Kos i bin stat long Mande, 8 Epril, 1991 na i bilong ol rijnal ekstensen opisa.

Ol 10-pela opisa husat i kamap long kos bai go tu long Bukawa na Butibam viles bilong painimaut ol rot em i gutpela long skulim ol pipel long hevi bilong bia na ol strongpela dring na ol arapela kain samting olsem. Ol opisa ya bai kisim setifiket bihain long ol i pinisim kos.

Pasto sutim tok long gavman

WANTOK sistem em i wanpela gutpela pasin bilong ol tumbuna bilong bipo yet. Tasol nau olgeta samting bai i senis na planti man bai i dai nating sapos gavman i pasim lo bilong kilim man i dai.

Stiaman bilong Sadaun provinsal kaunsil ov Sios, Pasto Robert Augustine i tok kilim i dai wanpela man o meri i brukim stret lo bilong God. Na tu Papua Niugini em i wanpela kristen kantri na kain pasin bilong kilim i dai man nating bai i pretim planti gutpela manmeri bilong dispela kantri. Na tu planti manmeri bai i no inap sindaun gut.

Pasto Augustine i tok bikpela asua i bin i stap bipo yet long nesanel gavman, bikos ol i no givim mani long helpim ol sios long mekim sampela wok long helpim ol pipel. Planti loman olsem mesistret na sas bai i stap wantaim pret, bikos famili

bilong husat ol man i dai bai pretim sas na mejistret sapos ol i painimaut olsem man ya i rong long ai bilong lo.

Pasin bilong kilim dai man long kilim i dai wanpela man nating em i wanpela bikpela samting, na gavman, i mas tingting tu long laip bilong ol lo manmeri.

Wanpela bikman tu long Aitape i sapatim toktok bilong Pasto Augustine olsem gavman i mas lukluk tu long laip bilong ol pipel moa long laip bilong ol yet.

Toktok ya i bin kamap bikos ol politisen i gat ol sekyuriti long lukautim ol, sapos dispela lo i pas long palamen. Na tu wantok sistem pasin i bikpela moa insait long kantri bilong yumi.

Sapos gavman, laik pasim dispela lo, em i mas kisim tingting bilong olgeta manmeri

bipo em i go het long pasim dispela lo. Em i

tok belhat pasin i save pasim sampela gutpela tingting. Gavman i mas sindaun gut na tingting gen bihain ol i toktok.

Na tu gavman, mas givim wok i go long han bilong ol sios long stretim ol dispela hevi Pasto Augustine i tok.

OL yut bilong Martin Luther Evangelikal Lutheran Sios bilong Altmuhl Veli long kantri Jemani i laikim sampela senis i mas kamap long sios. Bihain tasol long lotu long 9 klok moning long Sande, 27 Januəri, ol yangpela i stat nilim askim bilong ol long dua bilong Santu Maria Lutheran Sios long Gunzenhausen.

Pepa bilong ol i singaut long kirapim moa samting long taim bilong lotu, tokaut stret long ol samting na no ken haitim toktok long laip bilong sios.



Wewak memba long Grail muvmen

OL Katolik meri bilong Wirui long Wewak, Is Sepik provins i gat wanpela grup em ol i kolim olsem "Wewak Grail" muvmen. Ol i bin statim dispela grup long 1989.

Meri husat i bin kirapim tingting bilong statim dispela grup em 'mama' Sheila Hawtorn. Em i kirapim dispela grup na mekim ol i kamap memba bilong Intanesenel Grail muvmen.

Ol memba i bin tokaut long namba wan wok bilong ol taim ol i holim namba wan bung bilong ol. Poto i soim ol memba bilong Wewak Grail i sindaun bihain tasol long namba wan bung bilong ol long kamap memba. Meri husat i sindaun na brukim skru em Maria Wate, presiden bilong Wewak Grail muvmen na kodineta bilong ol Ruth Crow.

OL Katolik meri bilong Wirui long Wewak, Is Sepik provins i gat wanpela grup em ol i kolim olsem "Wewak Grail" muvmen. Ol i bin statim dispela grup long 1989.

Meri husat i bin kirapim tingting bilong statim dispela grup em 'mama' Sheila Hawtorn. Em i kirapim dispela grup na mekim ol i kamap memba bilong Intanesenel Grail muvmen.

Ol memba i bin tokaut long namba wan wok

bilong ol taim ol i holim namba wan bung bilong ol.

Poto i soim ol memba bilong Wewak Grail i sindaun bihain tasol long namba wan bung bilong ol long kamap memba. Meri husat i sindaun na brukim skru em Maria Wate, presiden bilong Wewak Grail muvmen na kodineta bilong ol Ruth Crow.

Yut bilong Jemani laikim sampela senis long sios

Dispela samting i kamap bihainim kibung bilong ol yangpela sios memba na ol arapela yangpela man na meri. Planti bilong ol i bin tokaut olsem long lukluk bilong ol, haus lotu em i olsem wanpela kol haus na ples bilong ol pasto, bikman bilong sios na ol arapela memba bilong sios long bung. Insait long dispela haus, olgeta memba bai go sindaun long wanpela sia na long bihainim ol arapela long "bikpela slip."

Ol yangpela i laikim olsem i mas gat senis na nupela luk-

luk long wok bilong sios na haus lotu. Dispela em nupela rot bilong man i bung wantaim God long bilip bilong em. Wanpela yangpela kristen i tok, "Mi no amamas long oltaim harim pasto i tok olsem tingting bilong em i stretpela."

Insait long ol askim pepa bilong ol, ol yut i tokaut tu olsem sios i no ken supim ol man na meri long bihainim wanem bilip. Na sios i no ken pretim na mekim samting olsem em i bos. Ol lain husat i lusim lotu sampela taim i no

ken kamap wantaim pret narapela taim, bikos ol arapela memba bai wokim pes nogut long ol.

Ol yut i bin askim tu long glasim oda bilong ol sios sevis, kisim toktok na tingting bilong ol grup husat i stap ausait, na ol i askim tu long moa strongpela toktok long wok politik i kam long sait bilong sios. Ol i tok olsem dispela singaut bilong ol i no sut long kirapim sios bilong ol yangpela. Nogat. Dispela singaut i sut long pulim moa yangpela pipel.

NUPELA

Vitamin
Enriched



NU RICE I GIVIM YU PLANTI MOA

Taim yu kukim NU RICE, tingim na putim liklik moa wara bikos NU RICE i save solap bikpela moa na givim yu planti rice bilong kaikai


Dispela i bihainim ol wok painimaut em Kwinslen Dipatmen bilong Egrikalsa na Yunitek na Lae i bin wokim.

I stap long olgeta stua bilong Mosbi long:

T.S.T GEREHU
 BP's TOWN & BOROKO
 LINGS FREEZER-GORDONS
 GARDEN HILL SUPERMARKET
 AMBIL TRADING - KOKI
 AGUTOI TRADING - BADIL!
 NAOA TRADING - KONEDOBU
 MALAORO SUPERMARKET - KOROBOSEA
 TOMOTA TRADING - KOROBOSEA
 NOREEN & PARTNERS - TAURAMA
 MARIBOI TRADING - 6 MILE

LAHANI TRADING - WAIGANI
 GEREHU CITY MART
 TAN TRADING - HOHOLA
 BOIMAKE TRADING - KOKI
 HETURA TRADING - EAST BOROKO
 W.Y. & J. WONG - SABAMA
 G.K. LEE - SABAMA
 HOHOLA ENTERPRISE - HOHOLA
 HOHOLA CNR. SHOP - GORDONS
 TAURAMA SELF SERVICE SUPERMARKET
 - TAURAMA

Bihain long Galp Woa



Ol Kurds pipel i askim Bush long helpim ol

WANPELA yangpela Iraki manki husat i gat 20 krismas samting i wokabaut i go antap long masin gan pos bilong Amerika na givim wanpela leta i stap insait long deti braunpela karamap.

Long karamap bilong dispela leta ol i raitim adres long tok Inglis olsem "Urgent, Top Secret. To Mr President, USA." Boi ya i givim dispela leta pinis na bihainim rot i go bek, na bihain bom i pairap.

Dispela em leta bilong go stret long Presiden George Bush bilong Amerika. Tasol wanpela ami kepten i opim na i ritim. Leta ya em ol i raitim long gutpela Inglis antap long yelopela lain pepa. Kepten i ritim i go pinis na klostu em i kra.

Dispela leta i tok olsem, "Taim nau bilong mipela kisim ol kaikai long gaden. Tasol prodak i no wit, rais o plaua," em i tok. "Prodak em het bilong ol man, meri, pikinini na bebi."

Dispela leta em wanpela man bilong Iraki i raitim na sainim olsem "An Iraqi citizen, Nasiriyah". Leta i askim presiden George Bush long go insait na helpim ol. "Saddam Hussein i nogat strong egensim Amerika. Tasol em i no inap long lus taim em i sanap egensim ol pipel bilong em. Long olgeta minit yu i no kam insait long helpim mipela, planti pipel bai i dai."

Ol Amerika soldia i wari tu long birua i kamap nau long ol Kurds pipel bilong Irak. Ol i laik sanap egensim presiden Saddam, tasol Saddam i bagarapim ol nau.

Wanpela ami kepten bilong Amerika, Kepten Charley Arp i tok, "Dispela hevi i hat tru long daunim winim bilong woa."

Wanpela soldia i tok-tok na tingim ol Kurds pipel bilong Sauten Irak. Em i tok, "Ol i bagarap stret long stat bilong dispela birua. Ol i nogat pait samting bilong pait egensim soldia bilong Saddam, nogat kaikai, nogat rot bilong kisim ken saplai. Ol i laikim tru helpim."

Ol soldia bilong Irak em Amerika na Alait soldia i holim pasim ol olsem prisina o kalabusman bilong woa i ranawe tu. Saddam i no amamas long ol, na

i laik kilim ol tu. Sampela ripot i tok ol soldia bilong Saddam i lukautim nau olgeta bikpela taun long Sauten Irak. Na tu i pait wantaim sampela rebel paitman bilong Kurds long Noten Irak.

Bikpela pait namel long ol Kurds paitman na soldia bilong Saddam i kamap long Kirkuk, noten wel siti we tupela sait wantaim i bin winim pinis.

Tasol Iraki gavman i tok em i tekova na lukautim nau Kirkuk.

Wanpela bikman bilong Iraki gavman i ripot i go long Saddam olsem ami i tekova pinis long lukautim Kirkuk. Na olgeta samting ol ami i putim long oda nau.

Tasol ol rebel i tok dispela kain oda i min ol i bagarapim taun na ol manmeri nating. Ol paitman bilong Kurds i tekova long ples Kara Hanjir long las wik na i lukim bodi bilong moa long 1,500 manmeri, pikinini na bebi. Ol i bilip ol Irak soldia i kilim ol dispela Kurds pipel.


Ol sikret ami bilong Amerika i makim wanpela kem long not bilong Nasiriyah. Dispela kem em ol i bilip spesel ami bilong Amerika i lukautim. Ol i bilip ol spesel soldia bilong Irak i kilim planti manmeri bilong Kurds long dispela kem arere long wanpela wara.

Dispela i givim bikpela bel kaskas long ol Kurds manmeri. Bikos Amerika na ol Alait kantri i no helpim ol. Wanpela bikman bilong ol Kurds paitman i tok Amerika na ol Alait i givim yesa long Saddam long kilim yet ol Iraki pipel.

Ripot i tok Saddam i winim woa nau wantaim ol pipel bilong em yet. Tasol planti soldia bilong Saddam i les nau long wok aninit long Saddam.

Ripot i tok planti Iraki soldia i givim ol yet i go long ol Amerika sek poin, na tok ol i les long wok long Saddam.

Majid Faleh em wanpela soldia husat i gat 27 krismas. Em i kamap na tok, "Mi bin wanpela soldia long 7-pela ya, na pait long woa namel long Irak na Irak," em i tok. "Mi les nau long helpim Saddam long pait."



Tupela manki bilong Kedistan i joinim longpela lain long kisim kaikai na wara em ol helpim grup i givim long ol refuji husat i ranawe long presiden Saddam long Irak. (LEPHANTAP)-Wanpela bilong haus bilong ol lain Kedistan em ami bilong Saddam i bomim.

Ol Kurds i ranawe na askim: Bush i stap we nau?

PRESIDEN bilong Irak, Saddam Hussein i givim bikpela mekimsave stret nau long ol pipel bilong Kurdistan long Irak. Planti Kurdistan (Kurds) pipel i ranawe nau long Irak. Bikos ol i no laikim presiden Saddam Hussein long lukautim ol.

Na tu planti Kurds pipel husat i egensim Saddam bikos long em (Saddam) i kirapim woa wantaim Amerika na ol arapela Alait kantri na i lus.

Bihain long ol Amerika na Alait ami i givim fridom long Kuwait na i go bek long kantri bilong ol, bikpela protes i kamap long Irak. Ol pipel i no laikim Saddam olsem lida bilong ol. Ol i kamapim rebel grup na pait egensim ami bilong Sadam.

Ol i laik rausim Saddam na makim nupela gavman. Dispela kain protes i kamap bikpela stret long ol Kurdistan siti na taun. Kurdistan em wanpela provins bilong Irak.

"Wanpela man i no ken tok

olsem mipela ol Kurdish pipel i dai pinis". Dispela em hap tok sampela Kurds pipel i penim long tok Inglis antap long wanpela wel tenka.

"Bush i stap we?" em wanpela askim mipela i mas harim long 1,000 taim olgeta taim mipela i pulim lain i go antap long 3,224 mita maunten we i brukim Irak na Teki long Mande.

"Bilong wanem na em i statim sapos em i no laik pinisim", o "Bilong wanem na em i no laik pinisim Saddam?"

Dispela nem "Bush" em planti Kurds pipel i bin apim stret antap olsem wanpela King. Tasol nau ol i save bagarapim stret dispela nem.

Planti Kurds pipel i lusim Irak na ranawe i go nau long Teki. Long dispela boda namel long Teki na Irak i nogat rot. I gat klik rot tasol em ol trabel manmeri husat i save yusim donki. Tasol planti 1,000 manmeri i yusim dispela rot nau.

Bai yu lukim ol bebi i kra, ol

lapun manmeri bai i wokabaut na sindaun malolo long sait bilong dispela rot em i kamap bikpela nau.

Long bihainim dispela rot na i go hapsait long Irak bai i karamapim 5-pela aua olgeta. Ol yangpela manmeri husat i strong i ken ranawe i go olsem. Tasol ol lapun na sikman i no inap long ranawe olsem. Tupela pipel i dai pinis long de bipo mipela i wokabaut. Dispela em wanpela hap tasol ol pipel i ken ranawe long strongpela ami na plis bilong gavman.

Sampela hap ol manmeri i ken ranawe i em ol soldia bilong arapela kantri i putim was gut tru. Iran i larim ol meri na pikinini tasol i go insait long kantri bilong em.

Ol opisal bilong Teki i bilip i no long taim bai ol woa helikopta bilong Irak i bihainim ol dispela ranawe pipel.

Planti Kurds pipel husat i kamap pinis long Teki i save baim ol pipel bilong Teki long helpim karim kago bilong ol. Wan wan Kurds pipel husat i gat mani i mekim olsem.

Ol manmeri long i ki husat i save givim helpim i stap long

ol taun olsem Kirkuk na Tus Kurmatu.

Sampela manmeri husat i yusim ka long ranawe i save tromoi bikpela mani stret long baim petrol we i sot tru. Petrol em ol arapela manmeri i save salim long blek maket prais.

Planti bilong ol dispela ranawe manmeri bai i singaut olsem, "Mi lusim planti 100,000 mani bihain wantaim tripela haus na tupela ka."

Ol i ranawe na i no putim gutpela klos laplap. Planti kago ol lusim long rot. Wanpela man i dres ap long skin bilong bikpela pusiket, na long pastik bokis em i karim ol samting olsem sempo sop na marasin bilong wasim na stretim gras.

Wanpela bisnisman long olpela rabis klos laplap i kra wantaim na tok, "Ol i kilim olgeta Teki pipel long Tus Kurmatu ... taim ol i kam ol i stat long kilim olgeta Kurds na Teki pipel. Ol soldia bilong gavman i kilim kilim kilim tasol. Amerika i kamapim olgeta dispela trabel. Bilong wanem tru?"

i go moa long pes 10



■SISTA i lukim wanpela man Simbu i raun arere long banis bilong ol skul meri na em i go askim man ya, "Hey yu! Yu painim wanem long hia?" Nau man i bekim na tok, "Mi wanpela sekyuriti gad ya..." Na sista i kirap na tok, "Yu giaman ya..." Tasol bagaros i bekim na tok, "Mi no bilong gavman. Mi oposisen ya..." na em tekov!

JADAZON '91
Hohola, Mosbi.

□ WANSAIT ai bilong Kanage bagarap na ol dokta putim plasta long en. Wanpela taim em lukim TV i stap na kandre bilong em i toktok, tasol Kanage i no harim. Wansait ai bilong em na tupela yau i pas stret long TV. Nau kandre belhat na kukim Kanage long smok...tasol Kanage i no pilim liklik. Tingting bilong em i pas strong long TV yet. Kandre i belhat nogut tru na kisim hap niuspepa na pasim gutpela ai bilong Kanage. Boi belhat na kirap bikmaus..."Hey, who blary put the lights off?" Olaeta man i lap indai stret. Boss Michael Noah, Lapwing Drive, Gordons.

■TUPELA anis i go raun long wanpela longwe hap bilong painim kaikai. Tudak na tupela i laik go bek long haus. Kwiktaim tupela i lukim tupela haus tudak i stap na tupela i go insait. Moning tupela kirap na stori nau long ples slip bilong ol long nait. Namba wan anis i kirap na tok, "Ai bilong mi i slip yet. Bikos dispela hul bilong stori mi go slip long en i hat nogut tru. Long nait, hatpela win i kirap na smel nogut tu i bagarapim ples stret. Mi kisim taim i stap na i no longtaim klaut i pairap na mi ting olsem bai ren. Mi kirap sindaun i go tulait." Namba tu anis i sore pinis long poro bilong em na em tu i stori, "Mi slip gut tru long nait i stap na klostu long tulait, wanpela bikpela moran snek i kam insait na i wok long spai long mi. Taim mi kirap, em surik i go bek. Na taim mi slip, em bai surik i kam insait gen. Mitupela i wok long surik i go i kam tasol i go na moran i mas belhat long mi. Bikos em kirap na spetim mi nogut tru. Yu save em mas kaikai lip bilong wel taro ya. Olsem na spet bilong em i pas olsem glu long skin bilong mi ya."

Profesa Palai,
Gordons.

□ KANDE na Kembra i save wok long wanpela plantasin. Olgeta taim tupela i asua iilik, bos bai kotim tupela "stupid". Wanpela taim nau tupela i pasim tok long painim mining bilong dispela hap toktok "stupid". Orait Kande i tok long go na askim bos long "stupid". Em i go askim bos na bos tokim em, "Sapos yu laik save long mining bilong "stupid", orait yu go sanap long hapsait ya. Mi bai putim han bilong mi antap long simen banis na yu ron spit i kam na bamim han bilong mi." Kande i go sanap long hapsait, taitim bun na kaikaim tit na siksti i kam. Bos i rausim han bilong em long simen banis na Kande givim gutwan stret long simen na kisim taim stret. Tasol em giaman olsem em i no pilim pen, tok tenkyu tasol long bos na tekov i go. Em go kamap long Kembra na tok, "Mi save pinis long mining bilong stupid." Kembra amamas nogut tru na tokim Kande long tokim em. Em nau Kande tokim Kembra long go sanap na ron i kam paitim han bilong em. Kembra givim siksti i kam na Kande rausim han. Tasol Kembra kirap na givim stret long pes bilong Kande na Kande flai i go pundaun. Em kisim taim wantaim, kirap isi tasol na tok, "Em nau. Dispela em mining bilong stupid."

Ronnie Chang,
Lapwing Drive,
Gordons.

Atoriti strongim lo bilong salim buai na smok long Lae strit

EILEEN LLOYD i raitim

LAE Distrik Kot i sasim pinis 42 manmeri long brukim lo bilong salim buai na smok em Morobe provinsal edministreta, Tony Bais i kamapim long 1 Mas 1991.

Long 2 Epril, Lae Distrik Kot i bin sasim tupela man long baim K300 o go kalabus long tripela mun. Wanpela em Nanai Goto

bilong Gembogol long Simbu provins em kot i sasim long salim smok long taun bas stop. Em i bin brukim Sas 4 bilong rul Namba 2 long salim samting long publik ples. Nara-pela man em Frank War bilong Gembogol long Simbu provins. Em i kisim sas bilong salim buai long 8 Strit long 30 Mas. Em i

brukim rui Namba 13 long kaikai na salim buai.

Tupela man wantaim i tokaut long sinia mejistret, Jeremiah Singomat long kot olsem ol brukim lo

Mista Singomat i tok planti tok save i bin kamap pinis long dispela lo. Lo i tok long no ken salim samting long publik ples tasol sam-

pela lain i no laik bihainim.

Mista Singomat i askim tu Lae Siti Atoriti long raun long ol publik opis olsem haus kot na holim oi man o meri husat i spetim buai na tromoi pipia nabaut. Mista Singomat i tokim tupela man olsem Lae Siti Atoriti i train long kamapim gutpela wok. Tasol sampela bikhet

man i no laik harim na bihainim.

Name' long dispela 42 manmeri kot i sasim tupela meri na salim o long tripela mun kalabus. Foapela i kisim wanpela mun kalabus na 24 i baim kot name' long K50 na K100. Arapela 20 i baim stret K20 long taim o wokman bilong siti kaunsil holim o

B&H

BENSON
and
HEDGES

B&H

Government Warning
Smoking is Dangerous to Health

Ol intanesenel grup salim kaikai na blanket long ol refuji bilong Irak

BIKPELA helpim i kam long ol Intenesenel grup bilong helpim ol manmeri bilong Kurdistan husat i wok long dai long kaikai na kol taim oi i ranawe lusim Irak.

Bikpela baius bilong Amerika bai i karim blanket na kaikai bilong ol manmeri, na tromoi long ol ples em ol i ranawe na stap hait nau long en. Planti i stap hait long ol maunten na ples kol.

Planti manmeri i dai pinis long hangre na kol.

Ol manmeri i ranawe i go stap nau long kantri Teki na Iran. Ol i kamap long boda bilong dispela tupela kantri, tasol Teki i no laik larim 100,000 manmeri long kalap i go insait long boda bilong ol.

Namel long ol dispela lain manmeri, 43 em liklik na yangpela manki.

i kam long pes 8

Bush i stap we?

Em tok olsem taim meri na pikinini bilong em i wokabout arere long em. "Bilong wanem na Bush i no laik kilim Saddam. Ating Saddam i mas pren bilong Bush ya."

Dispela em sampela bilong planti pipel husat i ranawe. Ol i ranawe i go long wanpela taun, bihain ol i pretim dispela taun gen na ranawe. Planti i ranawe i go insait long Teki, Iran na Siria. Tasol planti arapela pipel husat i ranawe long wanpela taun i go long narapela bai i no inap long ranawe.

Bikos ol soldia bilong Irak i bihainim ol yet. Sapos nogat bai ol Irak soldia i bomim ol ranawe pipel ya. Dispela em long stapim ol i ranawe i go long arapela kantri. Ol soldia i bomim pinis planti Kurds manmeri husat i ranawe long rot namel long Arbil na Salahudin.

Long Sande taim mipela i lusim taun, mipela i harim kra i bilong sampela woa helikopta long Isten sait husat i bomim sampela ranawe pipel long arapela sait. Mipela ol lain long Westen sait i ranawe i go olsem long Iran na Teki. Ol refuji i harim na i pret nogut tru.

Long sampela arapela kantri ol pipel i no inap bilpim dispela. Tasol long Irak, olgeta pipel i save bilpim

Ol kantri olsem Inglen, Frans na Jemani i helpim long karim kaikai na blanket i go tromoi long ol hap em ol refuji i stap long en. Ol i bin helpim tu long muvirn ami bilong Saddam Hussein i go longwe long ol refuji.

Foren Minista bilong Jemani i tok Saddam i bin asua tru long bagarapim sindaun bilong ol manmeri.

Yunaitet Nesen

Sekyuriti Kaunsil i tok tu olsem Saddam Hussein i brukim bikpela sas tru. Olsem na dispela pasin i mas stap.

Long Brasel, NATO grup i askim olgeta kantri long bung wala laim na mekimsave long Saddam Hussein.

NATO i tok Saddam i brukim intanesenel lo bilong gutpela sindaun bilong ol manmeri.

Planti kurds i dai long hangre

MOA long wan milien Kurdis refuji i stap long boda bilong Iran. Planti i dai long hangre na kol taim ol wokabout i go long Iran na Teki refuji kem long painim gutpela sindaun.

Presiden Ozal bilong Teki i tok moa long 100,000 refuji i bin kamap pinis long refuji kem, tasol ol i nogat inap ples long lukautim ol arapela 500,000 husat bai kamap bihain.

Em i tokaut pinis long Yunaitet Nesen long stapim Presiden Saddam Hussein long mekim kain pasin olsem long ol pipel bilong em.

Long boda bilong Iran ol arapela refuji i bin wet ausait long ren na planti manki i bin dai.

Foren Minista bilong Iran Mista Ali Akba i tok boda bilong ol op long olgeta refuji husat i go insait.

Em i Yunaitet Nesen na Red Kros long helpim ol dispela refuji tu. Inglen i givim pinis 45.2 milien dola long Yunaitet Nesen long helpim salim balus na helikopta long kisim ol blanket na kaikai i go long boda bilong Iran long helpim ol refuji ya.

Amerika i tokaut pinis long givim 1

milien dola long helpim ol manki bilong Kurds. Inglen na Amerika i tokaut tu olsem ol bai i no inap pait long stapim dispela hevi.

Irak i kamapim wanpela bikpela hevi tu long holim pasim 35 Gad bilong Irak long boda. Presiden Ozal i tok Irak Presiden Hussein i laikim Yunaitet Nesen i mas putim kamap sampela operesen long stapim i em mekim pasin olsem.

Ol i mas stapim em na bringim ol dispela manmeri na pikinini i go long ples bilong ol. Bakeded i tokaut pinis long ol dispela pipel mas i go bek gen long ples bilong ol, tasol planti i pret. Bikos pait i kamap yet long eria bilong ol.


Ol man husat i kisim gan na pait long ai bilong gavman stret bai bungim sampela lo bilong Irak yet, Presiden Ozal i tok. Ol pipel bilong Kurdis i tokaut strong olsem Yunaitet Nesen i mas soim kain pasin olsem ol i bin mekim long Hussein long Kuwait.



Ol pikinini i pilai ol bikpela leta bilong wanpla hap tok kominis em ol i rausim long antap bilong wanpela kominis pati hetkwata haus long Shkoder, Albania. Disela i bin kamap bihain long wanpela protes long stat bilong dispela wik we tripela pipel i bin dai.

IRAQ'S CIVIL WAR REFUGEES

- 100,000 stranded at border; 100,000 more on the way
- After 1988 chemical weapons attacks on Kurds, Turkey took in 60,000 Iraqi refugees; half remain
- 10,000 Iraqis granted refuge since August 1990



Ami yusim bom na kilim ol refuji

KANTRI Teki, klostu tasol long Irak i no opim yet dua bilong em long planti arapela refuji bilong Kurdistan husat i kamap long boda bilong em na Irak.

Dispela ol pipel bilong Irak i ranawe lusim kantri bilong ol bikos ami bilong Saddam Hussein i laik kilim ol.

Tasol i luk olsem presiden bilong Teki tu i wok long kisim planti toktok nau i kam long planti arapela kantri long wol. Ol i laikim Ankara long kisim ol refuji.

Wanpela mausman bilong ol rebel paitman bilong ol lain Kurdistan i tok, "Ol pipel i wok long kisim taim na dai nabaut long kol na hangre. Ol helikopta bilong Irak i wok long raunim ol dispela refuji wantaim bom. Ol bebi i wok long dai long ai bilong mama bilong ol, bikos ol i gat sik, i hangre o i kol na dai."

Long las wik tasol, i bin gat ripot olsem narapela 200,000 ka bilong ol refuji i ranawe i go olsem long boda bilong Iran. Iran tu i save tilim boda wantaim olsem Papua Niugini na Indonesia.

Bikpela pret i stap nau olsem ami bilong Saddam Hussein inap kamap bungim hariap ol dispela lain refuji bilong Kurdistan na pinisim ol olgeta. Yunaitet Nesens Hai Komisina bilong ol Refuji long Kopenhagen,

Sadako Ogata i tok ami bilong Hussein inap kamap hariap na kilim olgeta man, meri na pikinini wantaim.

Bikos taim displea ol ripot i bin kamap, ami bilong Saddam i bin kisim pinis las taun bilong Suleimaniyah em i bin stap long han bilong ol rebel paitman bilong Kurdistan.

Wanpela ripot em i bin kam long Baghdad i askim olgeta man, meri na pikinini long go bek long ples bilong ol. Ripot i tok, "Ol pipel i stap long ol siti na taun em lo na oda i kamap gut nau i no ken wari long sindaun na ol samting bilong ol."

Ol lain husat bai kisim taim tasol em ol birua husat i bagarapim meri, brukim haus na stilim samting na ol lain husat i kirap holim sotgan na egensim pawa bilong gavman. Tasol i luk olsem dispela toktok i no inap grisim ol pipel long go bek. Bikos planti i gat bikpela laik na tingting nau long kirap na pait wantaim gavman.

Taim dispela hevi bilong ami bilong Saddam Hussein na ol rebel paitman bilong Kurdistan i go het, presiden George Bush bilong Amerika i tokaut strong olsem em i no amamas long wanem samting i wok long kamap.



Sampela bilong planti Kurds refuji long Irak husat i ranawe long presiden Saddam Hussein, na i brukim boda na ranawe i go insait long kantri Teki.

Painim gutpela pren

Dia Edita,

Mi bilong ples Turukau long Okopa eria bilong Sauten Hailans provins, tasol mi stap nau long Lae siti.

Mi painim yet wanpela gutpela pren bilong mi. Nem bilong em Kui O-onas Imau.

Em i bin stap long Kieta, Not Solomons provins. Tasol pait i kamap na mi no save wanem hap em i stap nau. Mi laikim bai em i mas rait i kam long dispela adres: Ese Orio Imu, P.O. Box 1921, LAE. Sapos

no gat, yu ken ringim mi long telipon namba 421011.

Yu husat manmeri i save long Kui O-onas Imau, orait, tokim em long dispela tok save.

Mi bai i amamas tru sapos mitupela i bung gen.

Ese Orio Imau LAE

Ol papa pamuk yet

Dia Edita,

Mi bilong ples Alepa long Sauten Hailans provins, tasol nau mi stap long Rabaul.

Mi laik autim hevi bilong mi long wanem samting mi bin lukim long Rabaul taun.

Rabaul i luk olsem taun bilong pamuk meri tasol. Ol marit meri tu i tanim olsem ol yangpela meri. Na ol marit man husat i papa bilong planti pikinini i save raun wantaim ol pamuk meri.

Neteng Wama RABAUL.

Asples tasol ken resis

Dia Edita,

Mi bilong Bulolo long Morobe provins. Mi gat liklik bel nevi bilong autim long *Wantok Niuspepa*.

Olgeta taim mi save lukim ol man bilong arapela provins i resis wantaim ol asples kendidet long taim bilong provinsal ileksen. Dispela pasin i no gutpela.

Yupela i no ken resis wantaim ol asples. Bikos taim yupela i stap long provinsal asembli.

Andrew Yalamu. BULOLO, MOROBE.



Gawi askim laik

Dia Edita,

Mitupela tupela manki miksres Sepik na Morobe husat i skul nau long Brandi haiskul long Wewak. Hia em nem wantaim adres na wantaim samting mitupela save laikim long mekim.

Nem: Ben Timmy

Krismas: 16

Hobis: Raitim leta, senisim ol presen, swim, mekim fani, danis na harim Sepik disko musik.

Nem: Gordon Mogu

Krismas: 16

Hobis: Danis, raitim leta, harim ol musik bilong waitman, senisim presen na ritim buk.

Adres bilong mitupela em: Margon Street, Box 361, WEWAK-East Sepik Province.

Nem: Joseph Kont

Adres: Box 302, LAE-Morobe Province.

Hobis: Mi wanpela boi bilong Hagen, West- en hHilans provins tasol nau mi stap long Lae. Mi laikim pen pren long olgeta hap bilong kantri.

Mi save laikim long lukim ol pilai, harim na singim ol lotu singsing, lukim vidio, TV, tokpilai, wokim gaden na mekim fani wantaim ol pren.

Nem: Steven Mea

Krismas: 21

Adres: PNG Pharmaceutical Pty Ltd, Box 9039, HOHOLA-NCD.

Hobis: Mi bilong Wabeg na i laikim ol yangpela man na meri olsem pen pren long olgeta hap bilong kantri.

Mi save laikim go lotu, singim ol lotu singsing, ritim Baibel na tokaut long toktok bilong God papa, pilai basketbal na volibal.

Husat i laik pren wantaim mi i ken rait i kam.

Nem: Simon Saki

Krismas: 22

Adres: C/- S.M.Leing Pty Ltd, Box 40, KOKOPO, East New Britain Province.

Hobis: Mi wanpela manki bilong Morobe, tasol nau mi stap long Kokopo, Is Nu Briten provins. Mi laikim pen pren long Manus, Sentrel na Milen Be provins.

Ol samting mi save amamas long mekim em pilai gita, lukim piksa, raitim ol pas, na lukluk long kain kain pilai.

Nem: Rex Komis Wape

Adres: Mosa Transport, P.O. Kimbe, West New Britain Province.

Hobis: Mi wanpela manki bilong ples Pinja long Mendi insait long Sauten Hailans provins.

Nau mi stap long Kimbe na wok wantaim Mosa Trensport kampani.

Mi laikim mekim pen pren wantaim ol brata na susa bilong ol eria olsem Kimbe, Mosbi, Rabaul, Finsafen, Morobe provins, Samarai, Galp provins na Kavieng.

Mi bai i amamas long bekim olgeta pas.

Nem: John Tom (man)


Krismas: 15

Kala bilong ai: Braun

Adres: Box 1876, LAE-Morobe Province.

Hobis: Mi laikim tru long mekim pren wantaim ol manmeri bilong Papua Niugini. Mi save laikim long pilai soka, volibal, harim musik, ritim ol buk, raitim leta, wokim pani, swim long wara na raun wantaim ol pren.

Another essential item for your home today is a...



REMEMBER!

- If you do not have a phone at home, call in at your nearest Telecom Business Office now and apply for one.
- If you already have a phone at home, don't let it get cut off...

Charge wantoks and friends who use your phone!



POST AND TELECOMMUNICATION CORPORATION
PARTNERS IN 1991 SOUTH PACIFIC GAMES





CAMBRIDGE

A MAJOR SPONSOR

9th SOUTH PACIFIC GAMES



Husat i asua

Dia Edita,

Mi wanpela manki bilong Madang tasol nau mi stap long Morobe provins. Mi laik egensim pas bilong brata Norman Yawur. Pas bilong em i bin kamap long *Wantok Niuspepa* Namba 870 bilong Mas 7, 1991.

Brata Norman i tok ol i save i go i kam long skul, na lukim ol gavman o kampani ka i go i kam. Ol i apim han long ol draiva stap na helpim tasol ol draiva i no save stap, na sotim rot long ol.

Brata, mi save mekim wankain pasin olsem taim mi go long skul bipo.

Tasol i gutpela sapos mipela i tingim pastaim sampela samting olsem sapos draiva i karim mipela i go na pam.

**Mrar Baung
LAE**

Ol wantok i sem

Dia Edita,

Mi wanpela manki Seim long Nuku distrik long Sandaun provins na nau mi stap long Rabaul taun.

Mi laik autim wari bilong mi i go long pasin mi lukim long ol meri long hap bilong mipela i raun na mekim long Rabaul taun. Mi lukim planti bilong ol i raun mekim nabaut na karim ol nating long rot. Planti bilong ol i no marit gut na ol i gat ol pikinini husat i no gat papa long lukautim ol.

Disela pasin i kamapim bikpela sem long mipela ol manki wantok na ol papamama na ol lain bilong yupela yet tu. Sapos yupela i pikinini meri bilong ol man orait traim na lusim dispela kain pasin pamuk na go bek long ples bilong yupela yet na maritim ol gutpela man.

Em tasol na husat i laik bekim em laik tasol.

**Peter Nam Misama
RABAUL**

Kam bek long ples

Dia Edita,

Mi laik toktok long sampela wanples bilong mi long Hailans rijon husat i save mekim ol pipia wok long Jacksons ples balus long Mosbi.

Dispela em ol wokman husat i save mekim ol pipia wok olsem klinim ples balus.

Ol i save wok hat aninit long bikpela hot san bilong Mosbi. Ol manmeri i save i go i kam na lukim ol. Trangu mi sore tru long ol.

Wanpela taim mi bin go daun long Mosbi, na i laik kam bek na lukim ol.

Taim bilong fotnait bai ol i amamas. Bikos ol i save olsem ol bai kisim pe.

Tasol pe ya i no bikpela tumas. Pe i liklik tru we ol i no inap long lukautim olgeta famili.

Sampela i gat bikpela tingting long go bek long ples bilong ol. Tasol wantaim liklik pe, ol i painim hat long baim balus na go bek.

Mi nogat toktok bilong mekim. Tasol mi laik askim sapos yupela i ken sevim sampela mani na kam bek long ples bilong mi. Mani i stap long ples bilong mipela.

**Eri Koples
GOROKA**

Lukautim Kiunga taun

Dia Edita,

Planti taim mi save lukim Kiunga taun i save bagarap long ol bruk botol long arere bilong rot na stua. Planti bilong dispela bruk botol em ol bia botol.

Mi laik bai ol manmeri long Kiunga i yusim het bilong ol na putim ol botol stret long rabis ples na i no ken brukim nabaut long rot olsem ol dok na pik i no gat het.

**Manfred Baiyage
KIUNGA**

Baim welpam groa gut

Dia Edita,

Mi wanpela manki Sepik tasol nau mi kam stap wantaim kandre bilong mi long Kavuw-garo welpam plantesin, Wes Nu Briten provins. Mi save stap long Blok Namba 1956.

Wari bilong mi i go long ol kampani husat i save baim welpam long mipela.

Planti pipel husat i kisim blok na stap nau long Wes Nu Briten i kam long kain kain hap bilong kantri. Ol blok mipela i no kisim nating, mipela i winim na i stap.

Olsem na yupela ol kampani i mas lukluk gut long dispela, na

baim mipela gut. Maski long giamanim mipela long prais bilong welpam.

Yupela ol kampani i bin toksave long redio olsem bai yupela i apim prais bilong welpam. Mipela i amamas long dispela na wokhat. Tasol bihain mipela i painimaut olsem mipela i kisim wankain mak bilong mani tasol. Ating yupela i laik mauswara long mipela tasol o?

I no gutpela long yupela i giamanim mipela ol groa olsem.

Yupela i mas save olsem mipela i stap na yupela i stap. Sapos

mipela ol groa i no stap na wok strong, kampani bilong yupela bai baim welpam we? Na yupela bai bruk daun.

Planti man long blok mipela i kisim dinau long beng long mekim sampela samting. Planti i kisim dinau long K3,000 na kam daun, na sampela mipela i kisim moa long K6,000.

Bai mipela i bekim ol dispela dinau olsem wanem sapos prais bilong welpam i no goap. Mipela bai kisim mani we long bekim hariap dinau bilong mipela.

**Linus Oki
KIMBE**



Mani lus long pos opis

Dia Edita,

Mi gat wanpela belhevi long ol wok man bilong Pos Opis olsem na mi laik autim long *Wantok Niuspepa*.

Planti taim mani save lusim mani long Pos Opis. Mi yet mi bin salim sampela mani long pren bilong mi na dispela mani i no kamap long em. Mi bilip olsem ol wokman na meri bilong Pos Opis mas kisim dispela mani.

Mi laik tok yupela ol wokman noken mekim kain pasin olsem long mipela ol grasruts. Olgeta man meri long dispela kantri i gat bikpela tingting long yupela long lukautim mani tasol tingting bilong ol i popaia.

Ating PTC i kisim ol stilman na meri tasol long wok long Pos Opis olsem na mani bilong pablik save lus.

Mi yet bilip olsem olgeta wokman i gutpela tasol ating wanpela o tupela insait long dispela grup mas raskol stret.

**Sai Song.
LAE.**

Maket i ples bilong bung

Dia Edita,

Mi laik agensim pas bilong tupela meri ya, Ruthy na Linda bin kamap long Oktoba 11 long *Wantok Niuspepa*.

Tupela i tok long ol man i save giaman long holim susu bilong ol meri taim ol i go pas wantaim ol long maket ples.

Mi laik tokim yutupela stret olsem kain ples olsem maket em ples bilong manmeri i pas pas na ol i ken pas long yu o holim skin bilong yu nating.

**Jacob Bulgu
KIMBE**

Kimbe maket nogat ples bilong sindaun

Dia Edita,

Mi wanpela manki Madang, tasol nau mi stap long Kimbe, Wes Nu Briten provins.

Kimbe maket i no gat stretpela ples bilong ol mama i sindaun na salim kaikai. Ating i nogat taun kaunsil bilong lukluk long dispela ya?

Mi laik save long wanem samting ol bos bilong taun kaunsil i save mekim long takis mani ol mama i save baim long salim kaikai long maket. Inap long yupela yusim gut dispela mani long stretim maket o olsem wanem?

Ating yupela i save yusim dispela mani long laik bilong yupela yet ya.

Yupela ol bos bilong taun kaunsil i mas tingting long sanapim nau taun maket klostu long taun yet. Na tu dispela maket i mas i gat stretpela ples bilong salim kaikai.

Mi laik toktok moa long Kimbe taun em i no luk gutpela tru, bikos i nogat ol wokman bilong klinim o olsem wanem? Traim na mekim sampela senis liklik long taun bilong mipela.

**Buged Baung
KIMBE**

Draiva na boskru brukim tambu

Dia Edita,

Mi wanpela manki bilong Mowi long Is Sepik provins, tasol nau mi stap wok long Madang.

Mi laik toktok long ol PMV bas insait long Madang taun. Ol i save putim notis long dua olsem tambu long kaikai buai na smok insait long bas.

Dispela em i gutpela. Ol pasindia i save bihainim. Tasol ol draiva na boskru i save brukim dispela tambu, na i no gutpela tumas.

Mi laik askim nau ol papa bilong bas long tokim ol draiva na boskru bilong yupela long bihainim gut ol dispela tambu.

**Joshua Sama
MADANG**

Prais bilong samting go antap

Dia Edita,

Mi laik autim bikpela wari bilong mi i go long gavman long mekim ol senis nau tasol i no tingim ol hevi em i no stretim yet.

Bikpela belhevi bilong mi long olgeta stua nau mipela i baim ol samting long bikpela mani tasol. Prais bilong olgeta samting i go antap na mipela i pret nau.

Mipela ol wokman bilong gavman i wok long kisim K40 na K60 long bipo yet kam na gavman i no tingim na stretim dispela hevi yet.

Mipela i painim hat tru long putim mani long beng na bilong baim kaikai, skul fi bilong ol pikinini na bilas samting bilong mipela yet.

Yupela arapela i ting em hevi bilong mipela yet o hevi bilong kantri?

Sapos yupela i ting em hevi bilong kantri orait gavman i mas stretim kain samting olsem pastaim long em i go het long mekim mani bilong pulapim poket.

**Tombo Kanga, Riripu Lape
MENDI**

Gavman i no wok klostu long Sios

Dia Edita,

Mi wanpela manki Kubalia tasol nau mi skul na stap long Hawaii Vokesinel senta long Is Sepik provins.

Mi no save lukim ol gavman opisa i wok klostu wantaim ol misineri. Tasol long taim bilong hevi, bai mipela i lukim gavman i askim ol sios long helpim.

Nau yet mipela i gat bikpela hevi olsem bilong raskol pasin. Mi laik bipo yupela i wok long go het long wok bilong yupela.

**Gabriel Muki
WEWAK**

**SOIM
RISPEK
LONG
OL PLIS**

Dia Edita,

Mi laik bekim pas bilong brata ToPulu Waluma bin kamap long Desemba 6 1990. Em i tok long ol plisman long Lae i save kisim bia bilong ol man i go na dringim gen.

Mi laik tokim yu olsem ating yu i nogat rispek long ol plisman bilong mipela na yu mekim ol kain tok olsem long ol.

Yu mas save olsem ol plis fos i stap na kantri bilong mipela i ron gut bihainim lo gavman i putim long lukautim yumi.

Ol plisman olsem yumi ol man tasol na ol i mas kisim sapot bilong mipela ol pablik tu long mekim gutpela wok.

Mi laik salensim ol manmeri husat i save laik agensim ol plisman olsem yupela i mas lusim dispela kain pasin nau.

**Wapu Pumas
MOSBI**



Pacific Gold MUSIC

NAMBAWAN 24 TRACK REKODING STUDIO INSAIT LONG PACIFIC

String ben na wansolwara musik i bikpela yet

PAPUA Niugini i gat samting olsem 780 tok ples olgeta. Na i winim tru planti ara-pela kantri long wol. Long musik, ol kain

kain atis i save autim singsing long tok ples bilong ol yet. Ol lain bilong Papua i save singsing long Tok Motu o liklik tok ples



bilong ol wan wan, ol Kerema i givim long Toaripi, ol Morobe i givim long Jabem o Kote, ol Tolai i autim long Kuanua na olsem tasol i go.

Na i no planti taim bai mipela i bungim ol atis i autim musik na singsing bilong ol long kain kain tok ples bilong moa provins. Ating wan wan lektrik ben tasol inap mekim olsem. Wanpela bilong ol em **Wansolwara Band**.

Ben ya i bin stat las yia tasol. Posie Popei bilong Manus, Justin Willy bilong Buka na Enji Pidik bilong Kavieng i bin statim dispela grup. Ol tripela i kam bung wantaim na autim singsing long tok ples bilong ol yet.

As tingting bilong dispela em long soim ol pipel bilong Papua Niugini olsem maski ol i bilong kain kain tok ples, ol i ken daunim dispela na bung wantaim long autim

gutpela musik. Yumi ken kolim dispela kaset tu olsem **"Wantok bilong wansolwara"**. Olgeta 10-pela singsing insait long dispela kaset i kam long Manus, Nu Ailan, Buka na lsten Hailans provins.

Justin na Enji i pilaim ol gita na Posie i singsing. Tasol long olgeta singsing, olgeta tripela wantaim i helpim na givim nek.

Sampela gutpela singsing bilong **Wansolwara Band** em SORE INA, SORE PAPA long Sait A, EGU TSOMI na GAMATUNA long Sait B. Pairap bilong ol dispela singsing i bihainim gen kain stail bilong ol wansolwara bilong Pasifik Ailan na i gutpela moa.

Sapos dispela ol singsing i painim ples, ating wanpela nambawan hap bilong harim em long taim bilong pati. Dispela em kain pati we olgeta lain i laik sin-

daun isi na harim na amamas.

Nem **Wansolwara Band** i makim stret ol tripela ben memba tu bikos olgeta i bilong ol ailan insait long kantri. Na sapos mi inap toktok, ating ol i painim stretpela nem bilong putim long dispela kaset em Pasifik Gold studio i bin katim namel long mun Ogas na Septemba, 1990 long Rabaul. Insait long kaset tu, Fabian Tadoi i bin helpim tripela ya long paitim kundu bilong ol waitman.

• **STRINGBEN** musik i stap nambawan yet long Papua Niugini. Na Pasifik Gold studio i luksave long dispela na i strongim yet wok bilong helpim na katim ol stringben musik.

Tasol i gat bikpela senis liklik nau long kain strongben musik em planti bilong mipela i save long bipo. Long bipo, stringben musik i min planti man i paitim gita na bungim nek wantaim long singsing. Na nau taim i senis. Planti stringben grup bilong ples i save yusim lektrik gita. Olgeta memba bilong grup bai bung na autim stail bilong ol long nek. Sampela hap em dispela pasin i stap bikpela yet em long Sepik wara. Fin-safen long Morobe



TKM Drifters



na ol ples insait long Wes Nu Briten provins.

Wanpela kain grup olsem i bilong ol bol Kombe husat i stap nau long Atuara klostu tasol long Malai taun long Rabaul. Ol i save kolim ol yet olsem **"TKM Drifters String Band of WNB"**. Ol

memba yet i bilong tripela viles, Tarawa, Kapo na Mulagani long Kombe.

Ol ben memba em Peter Meli husat i skrapim lid gita, Jay Kay i pilaim ritem gita, Brian Arthur i pilaim bes gita, menesa Paul Kiale i skrapim kulele

EMTV

THURSDAY 11TH APRIL, 1991
 8.00 TEST PATTERN AND MUSIC
 3.27 STATION OPEN
 3.30 KIDS KONA
 4.00 ALVIN & THE CHIPMUNKS
 4.30 TEENAGE MUTANT NINJA TURTLES
 5.00 THE FLINSTONES
 5.27 EMTV TOKSAVE
 5.29 NATIONAL EMTV NEWS BREAK
 5.30 HOME AND AWAY
 6.00 NATIONAL EMTV NEWS
 6.30 A CURRENT AFFAIR
 7.00 NEIGHBOURS
 7.30 HEY DAD
 8.22 EMTV TOKSAVE
 8.25 NATIONAL EMTV NEWS UPDATE
 8.30 21-JUMP STREET
 9.24 NATIONAL EMTV NEWS UPDATE
 9.29 EMTV NEWS MAGAZINE
 9.30 SPORTS ACTION
 10.30 CHARLIE'S ANGELS: "Attack Angels"
 11.30 NATIONAL EMTV LATE NIGHT NEWS
 11.57 MEDITATION WITH PASTOR WALO ARNI
 12.00 STATION CLOSE
 FRIDAY 12TH APRIL, 1991

8.00 TEST PATTERN AND MUSIC (G)
 3.27 STATION OPEN
 3.30 FAT CAT
 4.00 ALVIN & THE CHIPMUNKS
 4.30 TEENAGE MUTANT NINJA TURTLES: "Attack of the Big MACC"
 5.00 THE FLINSTONES (G)
 5.27 EMTV TOKSAVE
 5.29 NATIONAL EMTV NEWS BREAK
 5.30 HOME AND AWAY (G)
 6.00 NATIONAL EMTV NEWS
 6.30 A CURRENT AFFAIR
 7.00 NEIGHBOURS (G)
 7.25 NATIONAL EMTV NEWS UPDATE
 7.30 FAMILY TIES (G)
 "My Back Pages"
 8.00 AUSTRALIA'S FUNNIEST HOME VIDEO SHOW (G)
 8.26 EMTV TOKSAVE
 8.29 EMTV NEWS MAGAZINE
 8.30 SPORTS SPECIAL
 10.24 NATIONAL EMTV NEWS
 10.29 EMTV NEWS MAGAZINE
 10.30 CHARLIE'S ANGELS "Angels on a Roll" (PGR)
 11.30 NATIONAL EMTV LATE NIGHT NEWS
 11.57 MEDITATION
 12.00 STATION CLOSE

SATURDAY 13TH APRIL, 1991
 8.00 TEST PATTERN AND MUSIC
 4.12 STATION OPEN
 4.15 BONANZA:
 "The Passing of a King"
 5.15 LAVERNE & SHIRLEY (G)
 "That's Entertainment"
 5.43 EMTV TOKSAVE
 5.44 NATIONAL EMTV NEWS BREAK
 5.45 SPECIAL: (G)
 "AIDS AND THE SOUTH PACIFIC"
 6.00 NATIONAL EMTV NEWS
 6.30 HEY HEY IT'S (G)
 SATURDAY
 8.30 WACKIEST SHIP IN THE ARMY:
 "The Colonel and the Geisha" (PGR)
 9.22 EMTV TOKSAVE
 9.25 NATIONAL EMTV NEWS
 9.30 HAWAII 5-0:
 "Once Upon A Time Part 2" (PGR)
 10.29 EMTV NEWS MAGAZINE
 10.30 SPORTS SPECIAL
 12.30 NATIONAL EMTV LATE

NIGHT NEWS
 12.57 MEDITATION
 00.01 STATION CLOSE
 SUNDAY 14TH APRIL, 1991
 8.00 TEST PATTERN AND MUSIC (G)
 12.57 STATION OPEN
 1.00 WIDE WORLD OF SPORT
 3.00 BUSINESS SUNDAY (G)
 4.00 SUNDAY
 5.30 NATIONAL EMTV NEWS
 5.53 THE ROAD TO THE 1991 SOUTH PACIFIC GAMES (G)
 6.00 SPORTS ACTION
 7.26 CHIT CHAT WITH SIR PAULIAS MATANE
 7.30 60 MINUTES
 8.26 EMTV TOK SAVE
 8.29 NATIONAL EMTV NEWS
 8.30 SUNDAY NIGHT MOVIE:
 "Hot Lead & Cold Feet" (G)
 10.30 GUNSMOKE (PGR)
 "The Squaw"
 11.30 NATIONAL EMTV LATE NEWS
 11.57 MEDITATION
 12.00 STATION CLOSE

MONDAY 15TH APRIL 1991
 8.00 TEST PATTERN AND MUSIC (G)
 2.57 STATION OPEN
 3.00 KIDS KONA
 4.00 KTV
 4.30 TEENAGE MUTANT NINJA TURTLES (G)
 5.00 THE FLINSTONES (G)
 5.28 EMTV TOKSAVE
 5.29 NATIONAL EMTV NEWS BREAK
 5.30 HOME AND AWAY
 6.00 NATIONAL EMTV NEWS
 6.30 A CURRENT AFFAIR
 7.00 NEIGHBOURS
 7.30 THE YOUNG DOCTORS (G)
 8.28 EMTV TOKSAVE
 8.29 NATIONAL EMTV NEWS UPDATE (G)
 8.30 FLYING DOCYORS
 9.30 BEYOND 2000
 10.28 NATIONAL EMTV NEWS UPDATE
 10.29 EMTV NEWS MAGAZINE
 10.30 AIR WOLF:
 11.57 MEDITATION
 12.00 STATION CLOSE

TUESDAY 16TH APRIL, 1991
 8.00 TEST PATTERN AND MUSIC (G)
 3.27 STATION OPEN
 3.30 KIDS KONA (G)
 4.00 KTV
 4.30 TEENAGE MUTANT NINJA TURTLES
 5.00 THE FLINSTONES
 5.28 EMTV TOKSAVE
 5.29 NATIONAL EMTV NEWS BREAK
 5.30 HOME AND AWAY
 6.00 NATIONAL EMTV NEWS
 6.30 A CURRENT AFFAIR
 7.00 NEIGHBOURS
 7.30 THE YOUNG DOCTORS
 8.28 EMTV TOKSAVE
 8.29 NATIONAL EMTV NEWS UPDATE
 8.30 THE EQUALIZER
 9.28 NATIONAL EMTV NEWS UPDATE
 9.29 EMTV NEWS MAGAZINE
 9.30 CHARLIE'S ANGELS (G)
 10.29 EMTV NEWS MAGAZINE
 10.30 AIRWOLF
 11.30 NATIONAL EMTV LATE NIGHT NEWS
 11.57 MEDITATION WITH PASTOR WALO ARNI
 12.00 STATION OPEN

WEDNESDAY 17TH APRIL, 1991
 8.00 TEST PATTERN & MUSIC
 2.57 STATION OPEN
 3.30 FAT CAT (G)
 4.00 KTV
 4.30 TEENAGE MUTANT NINJA TURTLES
 5.00 THE FLINSTONES
 5.28 EMTV TOK SAVE
 5.29 NATIONAL EMTV NEWS BREAK
 5.30 HOME AND AWAY
 6.00 NATIONAL EMTV NEWS
 6.30 A CURRENT AFFAIR
 7.00 NEIGHBOURS
 7.30 MEKIM MUSIC
 8.28 NATIONAL EMTV NEWS UPDATE
 8.29 EMTV TOKSAVE
 8.30 GILLETTE WORLD SPORTS SPECIAL
 8.58 NATIONAL EMTV NEWS UPDATE
 8.59 EMTV NEWS MAGAZINE
 9.00 SPORTS SPECIAL
 11.00 AIRWOLF
 21.00 NATIONAL EMTV LATE NIGHT NEWS
 12.27 MEDITATION
 12.30 STATION CLOSE
 G General Exhibition

G - General Exhibition PGR - Parental Guidance Required AO - Adults Only

PLIS



RIPOT

LAE: Tupela ka i bin bam long Umi Bris long hailans haiwe na tupela man i dai. Narapela pasindia bilong wanpela ka i kisim bikpela bagarap na i stap nau long Angau haus sik long Lae. Ol plisman i painimaut yet long as bilong dispela birua.

WEWAK: Ol plisman i holim na sasim pinis tripela man long brukim wanpela haus na stilim ol samting long Kreer Heights. Ol tripela man ya em John Luke, 18 krismas bilong ples Raluana long Is Nu Briten provins wantaim David Saka (20 krismas) na Rufuk (20 krismas) bilong Koiken viles long Wewak, Is Sepik provins.

Dispela trabel i bin kamap long 3 Epril, 1991. Ol plisman i kisim bek wanpela K300 Samsung 14 ins vidio masin, wanpela K300 National vidio pilala na wanpela K265 Yamaha kibot. Ol i bilip olsem tripela man ya i bin stilim ol dispela samting.

MOSBI: Tupela ka i bin bam long Goro-Kaeaga Rot long Gerehu taim ol i laik winim kefiu aua. Birua ya i bin kamap long Sarere apinun we wanpela man i dai na 6-pela arapela i kisim bagarap na i stap nau long haus sik.

Man husat i dai em David Ambia (35 krismas) bilong Tambunum viles long Is Sepik provins. David i bin draivim wanpela liklik ka na i laik traim long abrusim narapela ka taim em i bamim wanpela PMV bas i siksti tu i kam. Ol plisman i painimaut moa yet long dispela birua.

LAE: Ol plisman i holim na sasim pinis 4-pela man husat i bin laik pretim na stilim K10,000 sek long wanpela draiva bilong Coastal Shipping. Ol plisman i bin kamap stret long taim dispela birua i laik kamap na holim ol dispela 4-pela man. Ol i sasim ol long karim wanpela sotgan em ol yet i wokim, wanpela giaman pistol na ol katres.

HAGEN: Ol plisman bai sekap nau long ol liklik klab bilong salim bia long ol ples insait long Westen Hailans provins. Dispela i bihainim askim bilong Deputi Plis Komisina Bob Nenta i go long Primia Lukas Roika long pasim bia long taim bilong kefiu. Em i tok planti ol liklik klab long ples bai yusim dispela taim bilong kefiu long kisim moa mani.

Sapos ol plisman i kisim ripot bilong dispela kain blak maket bisnis i kamap, ol bai holim ol operesen na sasim ol dispela lain. Ol plisman wantaim provinsal gavman i bin askim pinis ol pipel bilong wan wan komyuniti long luksave long dispela na bihainim lo.

Telek na Tambaran go long Australia

FRANCIS ULIAU i raitim

TRIPELA biknem musikman bilong Papua Niugini i bin lusim kantri long Sande, 7 Epril na go long Australia.


Ol bai poromanim *Not Drowning, Waving* (NDW) ben bilong Australia na raun pilai long ol konsert long Nu Saut Weis, Viktoria, Kenbera, Kwinslan na Tasmania inap long 6-pela wik olgeta.

Ol tripela man ya em George "Telek" Mamua bilong Moap stringben bilong Rabaul, Pius Wasi na Ben Hakalitz bilong *Tambaran Culture* long Mosbi.

Not Drowning Waving ben bilong Australia i bin kam raun long Mosbi na Rabaul tupela mun i go pinis. Long dispela wokabaut bilong ol, ol tripela ya i bin pilai wantaim ol.

Tasol pastaim long dispela, George Telek i bin poromanim gut tru NDW namba wan taim ol i kam long Papua Niugini. Long dispela namba wan wokabaut bilong ol, NDW i bin kam na katim wanpela kaset bilong en "Tabaran" long Pasifik Gol studio long Rabaul. Na long dispela kaset, Telek i bin pilai na singsing wantaim ol.

Orait Ben na Pius i no bungim ol memba bilong dispela Australia ben inap long mun Februari long dispela yia. NDW i bin kam gen long



• Long lephan i go long raithan em George "Telek" Mamua, Ben Hakalitz na Pius Wasi. Ol tripela i stap nau long Australia. Poto: Ivan Bayagau.

Mosbi na bungim Pius na Ben wantaim olgeta arapela memba bilong *Tambaran Culture* na ol arapela ben bilong Mosbi.

Dispela em i namba wan taim bilong Telek long go na pilai long ovasis.

Wokabaut bilong ol tripela tu i bikpela samting stret long wok bilong ol olsem ol musikman. Bikos ol i wokabaut

aninit long kontrak na i no olsem grup. Nau ol i wokabaut bilong ol yet.

"Dispela em i namba wan taim bilong ol wan wan musikman bilong Papua Niugini long go na pilai aninit long kontrak long ovasis. Olsem na mipela bai bihainim tasol lo bilong Australia i karamapim wok bilong musik (Copyright Laws) long hap," Pius i tok.

Em i tok dispela wokabaut

bilong ol long 5-pela bikpela taun bilong Australia bai helpim tu long salim "Tabaran" kaset bilong NDW em ol i bin katim long Pasifik Gold studio long 1988.

Pius, Ben na Telek i redim tu sampela musik na singsing bilong ol long pilaim taim ol i stap long Rabaul. Ol bai yusim garamut, kundu na mambu flut long autim dispela ol musik na singsing.

Tripela nupela bas bilong Mosbi

I GAT tripela moa nupela bas 8 na 14 i ron nau long Mosbi.

Dispela tripela nupela Isuzu BL 25 sita bas i bilong Kove Somane bilong Morobe provins. Bas 8 bai ron namel long Morata, Waigani, Kilakila na taun. Na bas 14 bai helpim ol pasindia bilong 4 Mail, Hohola, na Tokarara bihainim Waigani Draiv. Kove i tok em i bin traim ol arapela bas tasol em i no amamas tumas.

Nupela supamaket bai helpim kastoma

DAVID WAMBI i raitim

ANDERSON Foodland Supamaket long Koki bai helpim gut tru ol pipel bilong Mosbi.

Long Tunde 9 Mas, 1991 Praim Minista Rabbie Namaliu i bin opim dispela nupela stua. Kos bilong wokim haus bilong stua ya em K2 milien. Wanpela kampani bilong Papua Niugini yet, *Kumul Builders* i wokim long las yia tasol.

Dispela nupela stua i kamap long Koki bikos las yia menesmen i bin pasim narapela brens bilong em long Boroko. Dispela em i wanpela samting Anderson famili na Is Nu Briten provinsal gavman kampani i tingting long kamapim kamap long dispela yia.

Is Nu Briten Developmen Kopresen i gat bikpela sea long Anderson Foodland long Rabaul, Lae na Madang. Long 1946, dispela kampani i stat long Rabaul long Malaguna rot. Man husat i go pas long dispela stua em Alfred Anderson.

Bihain long 10-pela yia, Is Nu Briten Developmen Kopresen i memba long en, tasol wok bilong menesmen i stap aninit yet long lukaut bilong ol Anderson famili.

Aninit long wanpela tok orait, Anderson Foodland i tingting long givim moa trening long ol wokman na meri bilong Papua Niugini long bihain taim.

Nau yet Anderson Foodland i givim wok long ol arapela 77 wok manmeri insait long Mosbi.

Praim Minista Namaliu i tok dispela i soim olsem nesenel gavman i mas tingting long wok bilong em yet, na i no ken tingting long toktok long bisnis bilong provinsal gavman.

Anderson Foodland Supamaket i gat frisa dipatmen, groseri dipatmen, strongpela dipatmen, hosel dipatmen, jenerel mesendais dipatmen na marasin dipatmen.

Olgeta dispela dipatmen i stap aninit long lukaut bilong David Anderson yet.

Papua Niugini Nesanel Ileksen, Me-Jun, 1992

Nem bilong ol olupela na nupela kendidet bai kamap bilong resis long ol sia long olgeta ilektoret. Dispela em i bikpela samting olsem na olgeta man na meri bilong Papua Niugini i mas save gut tru long olgeta samting bilong mekim long taim bilong ileksen.


Sapos yu laikim helpim, go lukim ol Distrik Menesa, na ol Distrik Opisa-In-Sas (DOIC).

Askim ol long wok bilong ileksen em yu no klia long en.

Tingim gut, ol gutpela lida i kamap long stretpela vot

TASOL HUSAT I KEN VOT?

Ol Papua Niugini man na meri husat i givim nem tasol long 1992 ilektorel rol bai tromoi vot. Na dispela i min olsem olgeta sitisen husat em krismas bilong ol i winim 18 yia na i bin stap insait long wanpela ilektoret moa



Authorised by Reuben Kaiulo, Electoral Commissioner Papua New Guinea

long 6-pela mun na mama i bin karim em pastaim long 27 Jun, 1974 bai tromoi vot.

Sapos yu winim olgeta dispela toktok na i no givim nem yet, pulimapim wanpela fom long Provinsal Ilektorel Opis, Distrik Menesa o Opisa-In-Sas long hap bilong yu.

Tingim ... lo i tok olsem olgeta Papua Niugini man na meri i mas givim nem bilong vot.

OL NUPELA LAIN BILONG VOT

Sapos mama i bin karim yu pastaim o long 27 Jun, 1974, yu mas givim nem bilong vot. Yu i no inap vot long neks yia sapos nem bilong yu i no stap long ileksen rol.

Go long Provinsal Ilektorel Opis i stap klostu long hap bilong yu na pulimapim wanpela fom bilong vot nau!

Tingim gut, givim nem nau! Olsem bai yu gen vot long 1992 ileksen.

Sir Serei autim PNG atis long Australia



Gavana Jenerel bilong Papua Niugini, Sir Serei Eri i lukluk raun long Kenbera Skul ov At wantaim Dairekta David Williams long lephar na Gavana Jenerel bilong Australia Bill Hayden. Dispela lukluk raun i bin kamap long taim ol i opim wanpela so ol i kolim long "Contemporary Arts from PNG."

PNG tred yunien kongres sapotim NPF long toktok bilong menesing dairekta

YAKAM KELO i raitim

NESENEL Providen Fan (NPF) i wok gut nau bihain long em i autim planti wokman na holim tasol 80 i stap.

Jenerel seketeri bilong Papua Niugini Tred Yunien Kongres (PNGTUC), Lawrence Titimur i tok wok bilong NPF nau i moa gutpela long bipo. Pastaim NPF i gat moa wokman na wok i no ron gut. NPF i lusim bikpela mani nating bikos i gat planti wokman na i no gat gutpela wok i kamap.

Mista Titimur i tok NPF nau i gat 80 wokman tasol na wok ol i mekim i winim wok bilong bipo. "Wok bilong ol 80 woka i tupela taim moa gutpela long wok bilong planti woka long pastaim."

Bikpela wok i stap nau long stretim na kliaim ol hevi i bin kamap pastaim. Mista Titimur i tok ol bai stretim na rausim ol hevi i stap banisim rot bilong NPF long wok. Sapos dispeia rot i klin insait long tupela o tripela mun, wok bai i ron gut tru long

bihain taim.

Ol bod memba bilong NPF i no amamas taim nesanel gavman i makim olupela menesing dairekta bilong Invesmen kopresen, Eliakim ToBolton long kamap Menesing Dairekta bilong NPF.

Bihainim laik bilong ol bod memba bilong NPF, Mista Titimur i tok Mista ToBolton i gat rekot nogut pinis. Na em i no save long wanem as na gavman i makim em gen. Mista Titimur i tok NPF i bikpela fan bilong 70.000 wokman na meri long kantri. Na NPF i mas ron gut. Mar husat i no inap long mekim gut wok bikos em i gat sik i no ken wok moa.

Presiden bilong PNG Fores Wokas yunien long Bulolo, Cleopas Yawal i sapotim toktok bilong NPF bod na Mista Titimur. Mista Yawal i tok ol lain bilong PNG Fores i memba wantaim NPF na ol i no laik bai kain hevi olsem i bagarapim fan bilong ol. Em i tok sapos gavman i laik makim menesing dairekta bilong NPF, ol i mas skelim em long save na rekot pastaim.

PNGTUC i no amamas long skul bilong Leba dipatmen

YAKAM KELO i raitim

PNG Tred Yunien Kongres i askim ol yunior memba bilong em long no ken sindaun long woka. Eksesen program em Dipatmen bilong Leba na Emploimen grup pas long kamapim long Tabubi. Kosi i bin stat long Tunde 9 Epril na bapim long fonde. 11 Epril 1991.

Dispela program i sindaun kamapim gutpela wok na sindaun kamapim long ol bisnis na komuniti.

Dipatmen bilong Leba na Emploimen moa dispela program bilong skul ol yunior long wok na sindaun kamap nau insait long ol bisnis na industri.

Jasa Papua Niugini Tred Yunien Kongres (PNGTUC) i no amamas long dispela program bilong Leba na Emploimen dipatmen.

Jenerel Seketeri bilong PNGTUC, Lawrence Titimur i tok ol i no amamas bikos i no gat gutpela wok tu. Wantaim i bin kamap bilong holim dispela program.

Mista Titimur i tok gavman i bin tokaut las ya long ples sampela man i go long helpim PNGTUC. Na dispela i bilong holim ol kain program olsem bilong ol yunior memba long kantri.

Long dispela las, PNGTUC i mas bosim na tokaut man i bilong mekim ol dispela kain wok bilong helpim na was long ol yunior memba.

Mista Titimur i bin kirap nogut long Leba na Emploimen dipatmen tabusim PNGTUC na go ket long raim dispela program. Mista Titimur i bin kirap gutpela tokok i bin kamap namei long PNGTUC na Leba na Emploimen dipatmen long dispela skul nau. Kamap long Tabubi.

Dispela PNGTUC i winim pap 4 pela ya nau na pap 10 pela ya kem. Mar em tu 45 yunior grup na pap 1000 pela ya nau. 1000 memba.

Dispela Wokas kait program i laik kamap namei long industri woka husat i stap long yunior memba kamap kain long yunior.

Refuji dai bihain long pait long meri

WANPELA man Irian Jaya i bin dai na tupela arapela i stap nau long haus sik bihain long ol i pait long meri.

Dispela birua i bin kamap bihain long wanpela man i sutim tok long arapela olsem em i paulim meri bilong em. Birua ya i bin kamap tupela wik i go pinis long is Awim refuji kem.

Noi Fia Provisinal Polis Komanda Suprintenden Thomas Perka i tok Wepe Tago, husat i gat 35 krismas bilong Wamena Kalubaga viles long Wamena Distrik bilong Irian Jaya i bin kisim bagarap long diwai na i dai bihain tasol long pait.

Atapela tupela brata husat i bin stap insait tu long dispela pait i kisim bagarap na i stap nau long haus sik. Ariso na Towe Wanemapo i stap long haus sik long wankain bagarap.

Yut Ista baibel kem i bin kamap gut tru long Ramu

TRIPLELA de Baibel kem bilong Ista wiken i bin kamap long Ramu Suga long Morobe provins stat long Fraide 30 Mas i go inap long 1 Epril.

Dispela kem i bungim samting olsem 300 yut na bikpela man na meri bilong Luteran na ol arapela sios.

Bung i bin stap long Sen Joseph kongrigesen bikos i no gat arapela nap bilong holim dispela Ista bung. Ramu Suga grup yet i go pas long stretim ol samting bilong holim dispela bung na mekim em i go gut. Ramu grup yet i kamapim K300 bilong lukautim ol manmeri long dispela taim.

Ol ples olsem Bora, Lanu na Waria i bin kmap long dispela yut kem. Ol yut bilong ol arapela sios tu i bin bung wantaim ol lain bilong Luteran Sios.

Het tok bilong dispela yut kem em, "7-pela las Stori bilong Jisas long Diwai Kros". Ol manmeri husat i go pas long ranim dispela yut kem em Eddie Zeriga, Eddieman Kaiyamba, Nelson Yaling, Yang Ngalau Misis Zeriga, Mis E. Kauhat na Pasto Kedadok.

Bikpela tok tenkyu i go long gutpela wok bilong yupela long ranim dispela yut kem.

Ol meri Momase pinisim kibung long Mande

BEN TAUMAI i raitim

BUNG bilong ol mama insait long Momase rijon i bin pinis long Madang las wiken. Na nesanel minista i bosim wok bilong yut, spots na ol meri. Mathew Bendumb i bin kamap na autim toktok long las de bilong bung.

Em i tokim ol mama, "Yupela mama i mama tru bilong dispela kantri, na yupela i no mama nating. Nogut, Yupela i gat bikpela wok bilong mekim long helpim na kirapim Papua

Niugini."

Minista i tokaut klia tu long ol mama olsem planti gavman bilong bipo i kam inap nau i no save helpim na sapotim tumas wok bilong ol meri. Na em i tok tu olsem bikpela wok i stap long ol mama yet.

"Mi sapotim wok bilong ol mama long Momase na ol arapela tripela rijon bilong kantri. Tasol namba wan samting i stap long han bilong ol mama yet. Yupela i mas go pas long ol wok. Na mi bai kam bihain na givim

helpim." Mista Bendumb i tok.

Momase Wimen Asosiesen i wanpela bilong ol bikpela grup tru i memba wantaim Nesanel Kaunsil ov Wimen (NCW). Presiden bilong NCW, Maria Kopkop i tokim ol meri long dispela taim long no ken sindaun tasol long lukluk long ol man i mekim wok. "Yupela i mas kirap na traun na resis wantaim ol." Mis Kopkop i tok.

"No ken kisim kain tingting bilong bipo olsem yupela ol meri i samting nating."

Mis Kopkop i bin singaut tu long ol primia bilong olgeta provins long lukiuk na helpim wok bilong ol meri.

Long dispela taim yet, Mista Bendumb i bin givim tu K1,000 i go long Momase Wimens Asosiesen na narapela K1,000 i go long Riwo Wimens grup bilong Madang yet.

Ol meri husat i bin stap insait long dispela bung i kam long Madang, Morobe, na is Sepik. Sindaun tasol no bin salim mauseri bilong ol long bund.



DUNLOP LONG HAGEN NAU I STAP KLOSTU TASOL LONG HAGEN RAIS TEMINEL

I NO TAIA TASOLI!

I TOK WELKAM LONG NUPELA HAP BILONG MIPELA

HAGEN - TELIPON NAMBA 52 2966, 52 2950, 52 2987. FAX: 52 2964



Watpo meri les long bia?

Dia Laipain,

Mi na pren meri bilong mi i bin laik marit. Mitupela i toktok na amamas long dispela tingting.

Nau mi save spak tumas na pren bilong mi i tok em i no gat laik moa long mi. Mi promis long lusim bia tasol em i les yet long lukim mi.

Nau mi wanpela i stap na mi no amamas tumas. Inap long yupela i helpim mi o nogat?

LONESOME:

Dia Pren,

I gutpela na dispela kain hevi i kamap pastaim long yutupela i marit. Bikos planti gutpela marit i save bruk taim man i dring na spak tumas.

Em i gutpela olsem yu luksave long wanem kain hevi bia i ken bringim long laip bilong yu. Na nau yu tingting long senisim pasin pastaim long yu marit.

Pren meri bilong yu i bihainim stretpela rot bikos em i no laik bai yu promis nating long stapim pasin bilong dring tumas.

Em i laikim olsem yu mas soim em stret laik bilong yu. Planti Papua Niugini man i no save lusim bia bikos ol i ting bia i gutpela long laip bilong ol.

I gat planti grup i stap bilong helpim yu long stapim pasin bilong dring na spak tumas. Ol dispela lain i stap long Lae, Mosbi, Hagen na ol arapela bikpela taun bilong Papua Niugini.

Ol i save holim kibung long wanpela wik bilong toktok na helpim ol kain lain olsem yu.

Na sapos yu laikim moa tok save long stapim pasin bilong dring, yu ken toktok wantaim Laipain long telipon 26 0011. Yu ken toktok wantaim wanpela pasto o wokman bilong sios.

No ken raun wantaim ol pren husat i save dring tumas, sapos yu laik kisim gen pren meri bilong yu.

Nau yet yu mas traim long bungim ol toktok wantaim pren meri bilong yu.

Sapos yu no lukim em, yu mas rait, o ringim em na traim toktok wantaim em long stapim dispela hevi.

Dispela i ken supim em long senisim tingting na kam bek long yu. Tasol yu yet i mas bihainim tu wanem samting yu bin toktok long mekim.

Mi Laipain

Tupela marit i kros na klaut i pairap

LONG bipo i gat wanpela man na meri bilong em i stap long wanpela ples. Tupela i bin stap longpela taim tasol ol i no gat pikinini.

Tupela i save stap longwe long ol narapela manmeri na tupela i no save painim hevi o sot long wanpela samting. Tupela i gat planti gaden na abus bilong kaikai.

Wanpela taim tupela i laik go long bikbus bilong painim abus. Kwiktai meri i go long gaden na kisim sampela kaikai i kam bungim long haus.


Tupela i go long gaden na bungim ol kaukau, taro na ol arapela kaikai bilong gaden. Nau tupela i redi long go painim abus.

Long bikmoning tru, tupela i kirap redim sampela kaikai bilong karim i go long bus. Olgeta samting i redi pinis na tupela i lusim ples na wok-abaut i go insait long bikbus.

Tupela i go kamap long wanpela longwe hap nau na man i tokim meri bilong em long bihainim wara na em yet bai bihainim bus i go. Orait meri i stat bihainim wara i go na man i katim rot bus.

Insait long bus, man i kilim planti kapul na pulapim long bilum. Em i painim planti kiau bilong welpaul na mumutim i stap. Man ya i painim abus i go na ples i wok long tudak nau.

Meri tu i no pilai long pis, malio na kindam long wara. Em i bagarapim ol stret. Em bihainim wara i go tasol apinun nau na em i go pas long haus na wetim man bilong em i stap.



Meri i wok long wet i go na ples i tudak olgeta nau na em i wari na stat long krai long man bilong em. Meri ya i bagarapim stret krai taim man bilong em i no soim pes. Em i kisim tingting nau olsem birua i mas painim man bilong em long bikbus. Na man bilong em i mas dai pinis.

Klostu tula i laik bruk nau na tewel bilong man i kam kamap long haus tasol meri i no longlong long dispela kain samting. Em i save olsem dispela em tewel na i no man tru. Olsem na meri ya i tokim tewel man olsem bai tupela i go long bikples.

Tupela wokabout long rot i go na man ya i tok em i laik go pispis. Tasol meri i tokim man bilong em olsem tupela i mas wokabout pastaim. Tupela wokabout i go na man

ya i toktok long go pekpek. Long dispela taim nau na meri i save olsem man em tewel.

Tewel tu i kisim tingting bilong meri i laik traim em na em i tokim meri long go tokim ol man long ples i go karim bodi bilong em long bus na kam planim arere long bikples.

Meri ya i krai wantaim i go na tokim ol man long ples. Na olgeta i go karim bodi bilong man bilong em i go planim long bikples olsem tewel i laikim long en.

Planti mun i go lus na wanpela taim meri ya i laik go givim kaikai long tewel bilong man bilong em. Em wokabout i go na bungim wanpela tewel long rot. Meri ya i pretim dispela tewel na givim olgeta abus i go long em.

Bihain dispela tewel i askim

meri ya long wanem samting em i painim na i kam long bus. Meri ya i tok olsem em i painim man bilong em. Em nau tewel i tokim em long wanem hap man bilong em i stap. Meri ya i bihainim i go na bungim man bilong em.

Tupela i stap inap long tupela wik na meri i laik go bek long ples, tasol man bilong em i strong olsem tupela i mas stap. Tupela i toktok na bikmaus i go i kam inap man i strong nau na tupela i stap olgeta.

Olsem na sapos i gat bikpela ren, klaut i save pairap na lait i bruk long skai. Dispela em tupela marit ya i wok long kros na paitim toktok i go i kam long dispela nupela ples bilong tupela.

Kay. M. Toiyugini
Kauwo village, Pangia
Saten Hailans.

Namba wan pikinini bilong Munima-Maya Habia Babe


KOWA DAIYE i raitim

DE em Fraide, 8 Februeri, 1991. Long Yunivesiti bilong Papua Niugini long Mosbi, bikpela bung i kamap gen bilong makim 36 greduesen bilong ol studen long hap.

Namel long ol bikpela lain man, meri na pikinini i bung i gat 4-pela lapun man bilong Munima wanpisin long Tari. Ol 4-pela ya i paitim han strong tru na wara i kapsait wantaim long ai bilong ol taim ol i kolim nem bilong wanpela pikinini bilong ol, Maya Habia Babe. Bikos dispela em i namba tu taim bilong Habia long greduet long yunivesiti na i kisim pepa bilong Greduet Diploma long Edukesenel Plening.

Ol tripela lapun ya i bin lusim ples na kam olgeta long Mosbi bilong bungim na amamasim dispela de wantaim pikinini bilong ol. Stori bilong Habia i go olsem:

Long 1965, Habia i bin statim komyuniti skul bilong em long APCM Misin skul. Maski ol tisa i bin givim strongpela kanda long Habia na em i no klia long planti toktok long Inglis, dispela i no pasim em. Habia i stap strong long skul i go na pinisim olgeta. Bekim bilong dispela olgeta hatpela taim i karim kaikai na Habia i go long Tari Haiskul long 1973 na pinis long 1976. Klostu taim Habia i laik pinisim gret 10 long haiskul, em i tingting nau long kamap wanpela tisa. Tingting bilong em i no stap long mani na gutpela wok taim em i laik kamap tisa. Nogat. Habia i



• Maya Habia

mekim olsem bikos planti arapela studen tu i laik kamap tisa.

"Long dispela taim, olgeta lain i laik kamap tisa, na mi laik painimaut wok tisa i wanem samting," em i tok. Orait em i winim spes bilong go skul tisa long Gaulim Tisa Koles long Rabaul na stap inap long tupela yia, 1977 na 1978.

Bihain long em i lusim tisa koles, Habia i go na wok tisa long Isten Hailans provins long Okapa na bihain em i go skulim gen ol pikinini long Magarima long Saten Hailans provins. Long hap em i luksave olsem wok tisa i no wanpela rot tasol bilong laip. Orait Habia i aplai long go skul gen long yunivesiti na kisim Ats Faundesen long 1982.

Habia i skul strong long 4-pela yia na long 1986, em i kisim pepa bilong BA long Politikals na Pablik Edministresen.

Wanpela bikpela bilip bilong Habia em long winim samting long stretpela rot na i no long ol krangki na gridi pasin.

Komowagi bihainim basis bilong Langemak

PLANTI man, meri na ol lektrik ben grup i gat as tingting bilong ol singsing em ol i autim. Sampela i singsing long laip bilong yangpela man na meri, sampela i singsing long wok bilong ol meri long kantri, sampela i singsing long pasin bilong bipo, wanem bagarap i kamap, na ol arapela i save sutim singsing bilong ol long gutpela ples em ol i gat long en.

Wanpela bilong ol dispela kain lektrik grup em Komowagi Ben bilong ples Kamlawa Long Finsafen, Morobe provins. Na ol memba bilong dispela ben i bilong ples stret.

Namel long mun Desemba, 1990 na Janueri, 1991, 6-pela boi bilong Kamlawa i lusim Finsafen wantaim ben menesa Taelabu Liwi na go katim namba wan kaset bilong ol wantaim Tumbuna Tracks Studio long Madang. Wantaim gutpela helpim bilong Maniot Okole, Chris Seeto na Fred Wasseem, ol i katim 10-pela singsing na putim long kaset. Dispela kaset i stap nau long planti gutpela stua long kantri. Wanem stua i save salim CHM kaset bai salim tu ol dispela gutpela kaset bilong Komowagi Ben.

Kamlawa viles i slip insait tasol long naispela basis bilong Langemak be. Ben i save pilai raun long dispela hap eria olsem wanpela stringben. Tasol wantaim gutpela helpim bilong ol lain long studio, ol i tanim na putim ol lektrik gita na kibot na dram i go insait long musik bilong bungim wantaim nek bilong Jeremiah Amos na autim narapela kain kik olgeta. Amos i singim planti singsing long tok ples Jabem.

Long Sait A, singsing NAE PEKA i stori long wanpela yangpela man husat i save so op tumas na liptimapim nem bilong em yet. "Nae" long tok ples i min 'nem'. Na taim papamama i givim nem "Peka" long manki ya, em i bikhet moa yet.

Namba tu singsing GAWING NOC bai kamapim sampela bel wari liklik. Bikos em i toktok long man husat i lusim ples na i go stap long longwe hap. Dispela boi Kamlawa i stap i go na ples i no swit moa olsem bipo. Em nau bikpela wari i kisim boi ya na em i tingim switpela ples bilong em long Kamlawa, insait long basis bilong Langemak.

REGIUMA i bihainim kain nek bilong ol lapun long Siassi na Sio i save sindaun taim ol i nogat wok na singsing isi tasol. Dispela singsing i swit moa yet long gutpela apinun na arere long paia, bikos dispela em i namba wan taim bilong ol lapun long supim hap paiauwat na mekim save long singsing ya.

Wankain stori i sut tu long singsing BOL BOL LAKIAWA, we i bihainim kain stail bilong ol duadua o long Tok Inglis, mipela i save tok olsem "The Folk Songs".

Las singsing LULUMBO long Sait A i bihainim tu kain nek na pairap bilong ol tumbuna singsing long Finsafen. Olsem namba 4 singsing, em tu i kisim kik bilong duadua bilong pulim nek na mekim singsing i go swit. Gutpela bekap nek bilong ol arapela ben memba i helpim tru Jeremiah long statim na pinisim gut dispela singsing.

Long Sait B, namba wan singsing MESIBU i stori long pikinini husat i lusim papa na mama bilong em



• Ol manki Kamlawa laik bihainim stail bilong Langima

WANTOK

NIUSPEPA BILONG OL PAPUA NIUGINI STRET

PABLIK NOTIS

Sapos yu laik advertais, telepon 25 2500 na askim long

MIRI AJORI long Ext 203
JOHNATHAN BOMEPE long Ext 215
KOSINTO FOSAGU long Ext 216

Christian Books Melanesia

Mipela wokim pinis wanpela naispela buk bilong helpim yu kisim save moa long tok bilong God. Lukim ol gutpela kala kala foto na piksa.

Ol gutpela buk bilong yumi



Yu ken baim dispela buk long Kristen buk stua long hap bilong yu.

Prats em t
K4.95

TOK SAVE

Ol lain husat i save yusim rot long Ramu Haiwe bilong go long Lae, Madang o ol hailans provins i mas save olsem mipela i bin pasim rot long hap bilong Nuru-Tapo, 30 kilomita longwe long Madang stat long Tunde, 19 Mas, 1991. Rot bai pas olgeta de long ol dispela taim: 8 klok moning i go inap long belo na 1 klok i go inap long 5 klok apin-un. Dispela i kamap bikos mipela i laik stretim ol hap bilong dispela rot em i ren na bikpela wara i bin bagarapim. Dispela wok bai stap inap long tripela wik. Mipela bai tok save gen taim olgeta wok i pinis.

Dispela tok save i kam long opis bilong Woks Dipatmen long Madang.

Westpac Bank - PNG - Limited

**MAK EM WESTPAC
BAI GIVIM DINAU
MANI BILONG BAIM
HAUS**

Stat long 15 April 1991, Beng bai i daunim 1 pesen Interes long ol dinau moni bilong baim haus. Na dispela bai bringim mak i go daun long

12.50% pesen long Wanpela Yia



Westpac Bank - PNG - Limited

**MAK EM WESTPAC BAI
GIVIM DINAU MANI**

Stat long 15 April 1991, Beng bai i daunim .5 pesen Interes long olgeta ovadrav na dinau mani. Na dispela bai bringim mak i go daun long

12.25% pesen long Wanpela Yia



TOKSAVE

Sapos Kepo Bumbi bilong Bonga viles long Morobe Provins i ridim dispela toksave yu mas rait i kam long dispela adres:

The Share Register,
Bougainville Copper Limited,
Mogoru Moto Building,
(P.O. Box 1274) Port Moresby.

WANTOK

NIUSPEPA BILONG OL PAPUA NIUGINI STRET

PABLIK NOTIS

Sapos yu laik advertais, telepon 25 2500 na askim long

MIRI AIORI long Ext 203
JOHNATHAN BOMEPE long Ext 215
KOSINTO FOSAGU long Ext 218

NATIONAL HOUSING CORPORATION

OPIS BILONG MENESING DAIREKTA

PABLIK NOTIS

Nesenel Hausing Kopresen i laik tok save long olgeta papa bilong ol kampani, ol Fan bilong Helpim ol Pipel (Benefit Funds), ol Fainensal Institusen Wokas Yunien na ol arapela kain grup na oganaisesen na olgeta pipel bilong dispela kantri olsem mipela i stretim nau ol wok bilong kirapim sampela Hausing Fainens Skim aninit long Nesenel Gavman Intagreted Hausing Developmen Plen.

Na long stretim ol toktok na wok bilong dispela, mipela i toktok nau wantaim ol lain bilong Tred Yunien Kongres, Pablik Employis Asosiesen, ol Beng, Bod bilong Pablik Opisa Supaenuesen Fan na Nesenel Providen Fan. Olsem na mipela i laikim ol arapela aganaisesen na grup long toktok tu wantaim mipela na autim tingting bilong ol.

Long dispela as, mipela bai amamas tru sapos yupela inap salim pas i kam long mipela na tokaut long grup/oganaisesen bilong yupela; wanem ol as tingting em yupela i save bihainim, ol memba i save stap na wok olsem wanem na hamas lain i stap nau na bai kamap long bihain taim.

Yupela i mas save olsem skim i bilong helpim yupela long hevi bilong haus na isi rot bilong kisim ol hausing skim bilong helpim yupela yet, ol famili bilong yupela na ol lain husat i nogat haus. Dispela bai helpim tu long daunim kos bilong haus olsem bai olgeta lain i gat haus bilong ol yet. Olsem na wanem tingting na toktok bilong yupela bai inap helpim hausing fainens long kamap gutpela tru.

Salim olgeta pas i kam long:

The Managing Director,
National Housing Corporation,
P.O. Box 1550,
Boroko, N.C.D.

Long save moa, toktok wantaim mi long telipon namba 24 7262 o Mis Madeline Paulisbo long telipon namba 24 7280 o Mista Henry Newton long telipon namba 24 7234 o Mista Luke Kegho long telipon namba 24 7310.

I gat Tok Orait bilong: JAMES V. SIMET
Menesing Dairekta.



SOFTBAL

Bomana op sisen resis kik op

Bata i mas popaia ya!

... tasol resis bai i gat moa senis long en

HELEN TARAWA i raitim

BOMANA Wimens op sisen softbal resis ausait long Mosbi siti bai i kik op long Sande 14 Epril, 1991 long dispela wiken.

Dispela resis i bin kamap long tupela yia i go pinis, na bai i kamap tu long dispela yia. 1990 sisen i pinis long pinis bilong mun Ogas long las yia na i sapos long kik op bihain long gren fainal bilong Mosbi resis.

Tasol menesmen i skruim dispela resis i kam long dispela wiken bikos long sampela kain asua.

Dispela kompetisen i givim taim long ol softbal pilaia long taun i stap fit, na wetim sisen tru bilong Mosbi siti long stat. Tasol klab long dispela resis em ol meri na pikinini bilong ol plisman i statim.

Nau yet pablisiti opisa, Andrew Moe i wok long bungim ol meri long kikim op dispela resis. Bipo i bin gat 8-pela sinia klab, na 4-pela junia klab. Bikos ol meri i save pilai long dispela resis i kam long McGregor na Bomana Plis Bareks tasol.

Tasol Moe i raitim pas i go pinis long ol arapela plis bareks olsem Godens, Kilakila na Gerehu, na askim sapos ol meri long hap i laik pilai insait long

dispela resis. Bikos long dispela na namba bilong ol klab bai i goap i go long 10 o 12-pela long dispela yia.

Moe i tok long dispela sisen, resis bai i gat wanpela raun tasol. As bilong dispela em long pinisim sisen hariap bipo long 1991 Saut Pasifik Gems i kamap. Gems bai i kamap long Mosbi na Lae siti long 7-21 Septemba.

Moe i tok tu olsem long dispela sisen, ol sinia tim tasol bai i pilai long resis. Na ol junia bai i pilai bihain long Gems stat long Novemba.

Moe i tok tu olsem bikos long wok na tu long SP Gems, ol i putim i go bek resis bilong ol junia long Novemba. Dispela bai i givim inap taim long Moe long pinisim gem bilong ol sinia, na bihain statim bilong ol junia.

Ol pilaia wantaim klab i no inap wari long baim fi na pilai long dispela resis. Bikos as bilong kamapim dispela resis em long amamasim tasol ol meri pikinini long plis bareks.

Tasol namba bilong ol klab i goap long dispela yia, na Moe bai kibung wantaim sampela meri long kamapim aidia bilong baim fi long pilai.

GASA bai i kam bek long 1992 sempionsip wantaim moa pawa

GAZELLE Amatua Softbal Asosiesen (GASA) i soim ol arapela nem senta long

1991 Benson & Hedges Nesanel Softbal tonamen long Mosbi olsem em bai i kam bek strong long 1992 sempionsip.

Dispela yia em i namba wan taim bilong dispela nupela asosiesen bilong

Kokopo, Is Nu Briten provins long pilai insait long sempionsip. Planti pipel i nogat bilip long GASA tim. Tasol ol i pait strong wantaim stail na pilai i go insait long gren fainal egensim Mosbi long resis bilong ol man. Dispela em bihain long ol i autim

1990 sempion Rabaul tim bilong ol man.

Trena na stapa bilong ol man, Sammy Dim i tok GASA i no lusim wanpela samting long dispela sempionsip.

Planti pilaia insait long GASA tim em ol nupela pilaia tasol. Dim tasol i bin pilai long kain sempionsip bipo. Dispela em long taim em kepten long Awara tim long 1988 sentpionsip.

Dim i tok ol i lukim ol arapela tim long Pul B olsem isi tim bilong salensim, na ol i ken winim.

Dim i tok moa olsem gren fainal egensim Mosbi em ol i inap long winim. Tasol ol pilaia bilong em i mekim wan

wan asua olsem i no ketsim gut bal.

Olsem na ol dispela liklik asua i helpim Mosbi long winim ol.

"Mosbi em ol i sempion bilong 1991. Tasol neks yia taim GASA i kamap long sempionsip, em bai i narapela stori olgeta," em i tok.

Ol meri GASA i kamapim strongpela pilai tu long sempionsip. Tasol ol i lus long ol meri Goroka 15-7 long semi fainal.

Ol meri Goroka i bin bungim Mosbi long fainal na i lus. Olsem na ol i go daun pilaim GASA na winim sans long bungim gen Mosbi long gren fainal.

Tasol pawa bilong ol i no strong, na ol meri Mosbi i bagarapim sindaun bilong ol. Dispela yia tupela taitel wantaim bilong ol man na meri i hangamap long Mosbi.

Ol meri GASA i tok dispela semi fainal gem egensim Goroka i no wanpela samting long ol, tasol ol i lus bikos long sampela liklik asua ol pilaia i kamapim long ketsim na tromoi bal gut.

Ol meri i givim tok lukaut olsem ol bai i pait strong gen long 1992 Benson & Hedges Nesanel sempionsip long winim dispela taitel.



Wanpela bata bilong Mosbi i sindaun gut na sambai long betim bal. Op sisen nau na mipela bai lukim gen kain stail long neks yia resis.

Mosbi winim planti prais long sempionsip

MOSBI i winim planti prais long 1991 Benson & Hedges Nesanel Softbal sempionsip em i bin kamap long Mosbi long Ista wiken.

Debbie Taylor na Peter Urari, tupela wantaim bilong Mosbi i kisim namba wan prais olsem namba wan pilaia bilong tonamen. Joan Toliman na Patrick Pilak i kisim prais olsem namba wan pitsa bilong tonamen.

Cloudy Mission, infilda bilong Gazelle Amatua Softbal Asosiesen (GASA) i winim tupela tropi long resis bilong ol meri. Wanpela em bilong namba wan bata, na narapela

i bilong namba wan aut filda.

Allan Taule bilong Lae i kisim prais bilong namba wan bata bilong tonamen long resis bilong ol man.

Wendy Katusele i kisim prais olsem namba wan infilda long resis bilong ol meri. Wendy em wanpela studen bilong Lae provinsal haikul.

Long resis bilong ol man em Tupap Poraporo bilong Rabaul i autim prais bilong namba wan infilda.

Laka Matapare bilong Tabubil i kisim namba wan autfilda prais long resis bilong ol man.



BENSON and HEDGES

Hevi bilong mani skruim Ista tonamen-10 Jun

VANIMO RIPOOT

FELIX RAMRAM i raitim

HEVI bilong mani i skruim bikpela soka resis bilong Vanimo Ista tonamen.

Gems kaunsil komiti husat i oge naisim dispela tonamen i go long Kwins Betde wiken long Jun 10, 1991.

Dispela tonamen i bilong ol wan wan distrik insait long Sandaun provins long salim tim i kam kik. Tasol asua bilong mani i mekim na ol tim i no kamap.

Narapela samting em Vanimo taun i nogat planti bikpela bisnis we tonamen ya i ken kisim helpim long sait

bilong sponsasip. Gems kaunsil komiti husat i oge naisim dispela tonamen i raitim planti pas i go pinis long ol kampani long sponsarim ol tropi na prais mani bilong tonamen. Tasol nogat wanpela bekim i kamap yet.

Antap long dispela hevi em Ista wiken i sotpela taim tumas long ol ausait tim long bungim inap mani.

Bikos wanpela rot tasol bilong planti ausait tim long kamap long Vanimo taun em long balus. Na pe bilong baim balus i kam em bikpela tumas. Olsem na ol ausait tim i mas kisim longpela taim moa long bungim inap mani.

Nau yet em samting olsem 10-pela tim i tokaut pinis long kam kik. Tasol sampela i no toksave yet. Olsem na Gems kaunsil komiti i bilip moa long 10-pela tim bai i kam kik long tonamen.



SP Gems skruim taim bilong Morobe Kantri sempionsip

YAKAM KELO i raitim

1991 Morobe Kantri sempionsip bai i kam ap long Oktoba, 1991 bihain long 1991 Saut Pasifik Gems long Septemba. Gems bai i kamap long Mosbi na Lae.

Dispela tonamen i save kamap olgeta yia long Kwins Betde wiken long Jun. Tasol bikos SP Gems bai i kam ap na ol opisal i srukim i go long Oktoba. Dispela em wanpela mun bihain long Gems.

Presiden bilong Morobe Kantri Soka Asosiesen, Ludwig Peka i tok em wantaim ol arapela opisal bai i sindaun na toktok long dispela tonamen pastaim. Dispela em long redim

o wokim program bilong tonamen.

Ludwig i tok wanem program ol i save kamapim long ranim Morobe Kantri tonamen i save bihainim kalenda bilong Lae Futbol (Soka) Asosiesen (LFA).

Na kalenda bilong LFA tu i save bihainim bikpela kalenda bilong nesenel soka bodi, Papua Niugini Futbol Asosiesen (PNGFA). Olsem na wanem bikpela tonamen i kamap olsem bilong Morobe Kantri i mas bihainim stretpela program.

Ludwig i tok tonamen bai i kamap, tasol ol opisal bilong Morobe Kantri i mas bung na stretim taim na program gut. Sapos ol program i kamap stret bai tonamen i kamap long Oktoba olsem em i makim.

GSA Kap resis bai kamap namel long sisen propa

GOROKA RIPOOT

GOROKA Soka Asosiesen (GSA) bai i pilaim resis bilong winim GSA Kap namel long sisen propa resis.

GSA i wokim dispela resis olsem prisisen. Tasol ol i no inap painim gutpela mak long kirapim pilai olsem ol i skruim dispela resis namel long sisen.

As bilong dispela em sofbal resis i yusim wanpela pilai graun tasol bilong Nesenel Spot Institut (NSI) em Goroka Soka Asosiesen i save yusim.

Nau yet em sofbal resis i pinis na sisen propa bai i kik op long wiken bilong Epril 21. Na resis bilong GSA Kap bai i kik op long tu o tripela wik bihain long Epril 21.

Ol opisal i makim olsem dispela resis bai i pinis long Ogas bipo long sisen propa resis i pinis. Olgeta 11-pela klab bai i kik insait long dispela resis.

GSA presiden Peter Siba i tok resis bilong GSA Kap bai i no inap bagarapim sisen propa resis long sampela kain we. Bikos em (GSA Kap) bai i bihainim program bilong em yet we wanpela gem bai i kamap long wan wan wiken. Ol gem bilong GSA Kap bai i kamap tu long sem fil.

As bilong kamapim dispela resis em long lukim husat bai i kamap sempion bilong soka long Goroka. Na tu bai i helpim ol pilai long kisim moa gutpela stail bilong pilai.

Klab resistresen fi i stap wankain olsem K200, na pilai resistresen fi em K15. Ol studen na pilai husat i no wok bai i baim K8 tasol.

GSA i makim olsem ol klab i mas baim afliresen fi bipo long tupela wik taim.

Nau yet em tripela nupela klab i joinim pinis resis bilong 1991 sisen. Ol dispela nupela klab em Tarangau, PTC na UNITECH. UNITECH em klab bilong studen bilong Goroka Tise Kiles na Goroka Teknikel Koles.

Dispela senis i bringim namba bilong ol klab i goap long 11-pela olgeta.

Wewak soka rausim ol ausait tim

LEO WAFIWA

WEWAK taun Soka Asosiesen i pasim

tokorait pinis long rausim ol tim bilong ausait distrik.

As bilong kamapim

tokorait em long diveiopim soka wantaim ol arapela spot long ausait distrik tu

na i no long Wewak taun o distrik tasol.

Maningula tim bilong Angoram distrik em namba wan tim asosiesen i rausim bihainim dispela tokorait.

Maningula bin pilai long prima divisen resis long las yia, na bin kamap m strong-pela salensitu long ol nem tim bilong taun olsem Wewak Yunatet.

Nau yet asosiesen i no bin oraitim sampela ausait tim bilong Wes Kos eria. Wanpela mausman bilong asosiesen i David Pandi i tok sampela tim bilong Wes Kos eria i laik kik insait long asis, tasol asosiesen i no oraitim o.

Olsem na namba bilong ol tim long 1991 yisen i go long nau long 25 o geta ol distriketa tim bilong olgeta bikpela em olgeta namba wan taun i andanda 16 taun wanpela divisen bilong taun.

Long ol insait samting em Wewak Soka Asosiesen i stap nau long taim arapela bilong Is Soka Provincial Spot Klaba. Spot Kaunsil i givim pinis K2,500 go long asosiesen long statim wok bilong em.



Klia long em!

• Mosbi- Tupela kas no gut i kirapim das stret long Bisini soka Graun long las wiken.

LFA laik senism vais presiden

HELEN TARAWA i raitim

LAE Futbol Asosiesen (LFA) i tingting nau long makim wanpela man long kisim posisen bilong vais presiden Vince Hagufe.

LFA i kamap long dispela tokorait bikos Hagufe i stap nau long wanpela yia kos long Mosbi, na bai i no inap helpim presiden John Peka wantaim opis wok bilong LFA.

LFA i laik makim nupela man long kisim ples bilong Hagufe long wanpela yia tasol. Bihain long dispela yia bai Hagufe i ken kisim bek posisen bilong em.

Ileksen bilong makim nupela vais presiden i sapos long kamap long tupela wik i go pinis. Tasol nogat inap opisal i bin kamap long kibung. Olsem na ol i skruim dispela kibung i kam long bihain taim. Presiden John Peka i bin stap tu long Mosbi long trening nesenel tim long namba wan trening kem.

Peka bai i go bek long Lae long neks wik na ileksen i ken kamap.

Peka i tok ol i stapim dispela ileksen long kamap bikos ol opisal i no save long wanem nupela man bilong makim.

LFA seketeri Philip Awak i tok em i gat planti wok nau long

opis.

"Peka i no stap na mi gat planti wok nau long mekim. Na tu ol i makim mi olsem veniu soka dairekta bilong

SP Games long Lae na mi mas mekim planti arapela wok. Olsem na mi pilim olsem ileksen bilong vais presiden i mas kamap."

Givim aidia na sapotim nesanel tim long SP Gems

LONG olgeta prektis soka gem bilong PNG soka skwat wantaim ol tim long Mosbi, em PNG skwat i winim. Ol dispela prektis gem i kamap insait long trening em bilong skwat long las mun i kam inap long las wik.

Ol dispela win bilong ol i min wanem?

Long yau bilong ol manmeri husat: no lukim ol prektis gem, ol bai i ting olsem PNG tim i gat gutpela sans long winim namba wan o namba tu ples long Saut Pasifik Gems.

Dispela tok em i tru liklik tasol. Kosa bilong tim, John Peka wantaim namba tu bilong em, Sau Gure tupela i gat planti ol gutpela pilaia. Ol dispela gutpela pilaia inap winim namba wan o namba tu prais.

Trening bilong ol long Mosbi em i orait. Namba tu trening gem bai i kamap ong Lae.

Planti ol manmeri i bin lukim dispela skwat i kik long ol prektis gem i tok, ol i gat bikpela moa wok trening bilong helpim ol long i

no ken sot win, na trening bilong soka stail o teknik em i orait.

Bikpela wok nau i stap long kari-maut dispela ol aidia insait long pilai graun stret. Na bikpela wok tu em i bilong tim i kik gut na kamapim gutpela tim wok. Long ol prektis gem i go bin i gat planti gutpela tim wok o i 'buildup' i go i inap gol i kamap.

Planti ol gem bilong skwat i luk wankain tasol olsem wanpela tim bilong Mosbi o wanpela tim nating. Kosa bilong tim yet i luksave long dispela. Olsem na long trening gem i kamap long Lae, em i laikim olsem olgeta manmeri bilong Lae i mas helpim skwat.

Skwat bilong PNG i mas gat planti moa prektis gem. Ol bai i mas wok hat insait long ol tru tru pilai. Dispela bai i strongim tingting na save bilong olgeta pilaia long klia long ol wan wan. Olsem tasol, bai stat bilong tim wok i kamap na stail bilong skwat i ken kamap tu.

Olsem na i gutpela sapos olgeta tim bilong Lae i mas redi na



KIKBEK

wantaim
RAINSAU

givim nem long John Peka i redim wanpela taim bilong kik egensim skwat long trening kem bilong ol.

Wanpela arapela samting tu, em i olsem husat man o meri i go lukim ol skwat trening o i kik na i luksave i gat wanpela asua, mobeta yu toksave long John Peka o Sau Gure kwik. Dispela tingting bilong yu bai i inap helpim tupela long stretim wanem asua tupela ol skwat i mekim na redim gut tim bilong yumi long Saut Pasifik Gems.

Dispela tok i go tu long ol pilaia. Wanem pilaia i gat bel hevi o wari o gutpela aidia, yu toksave long tupela o menesa, na bai ol i traim stretim. Dispela skwat em i samt-

ing bilong yumi olgeta bilong PNG olsem na wanem ol aidia yumi autim, em bai i helpim long apim nem bilong soka long PNG.

OL KOSA
I gat sampela toktok bilong ol kosa i flai raun nambaut long ol niuspepa. Mi yet mi no ting dispela ol toktok em i bikpela samting.

Namba wan samting PNGFA i bin i gat ol kosa posisen we i no gat man. Em i skelim gut ol dispela posisen na kamapim ol wok o, duti, stetmen bilong ol.

Kamapim pinis, orait, em i edvetaisim ol posisen. Planti ol man i aplai. Husat man em ol saveman bilong PNGFA i makim long mekim wok, ol i mas mekim dispela ol wok.

PNGFA i mas karimaut wok sekap klostu klostu olsem 6 mun 6 mun. Dispela em i bilong sekim sapos ol dispela man em i makim ol long wok i wok long bihainim tru step bilong wok em i raitim. Na tu em i bilong sekap sapos dis-

pela 'Gol' o' objective' we em i laikim wan wan kosa long kisim em ol kosa i wokabaut i go klostu nau o nogat.

John Peka tupela Sau Gure i gat 'Duti stetmen' bilong tupela. Wanem kain wok sekap PNGFA i mekim em ol yet i ken makim. Tasol, bikpela samting em i bilong John Peka, Sau Gure na PNGFA i bilong givim gol medal o silva medal long PNG.

Dispela em i gol o objective we tupela kosa na PNGFA i mas kisim. Sapos ol i no kisim dispela gol, bikpela wok sekap i mas kamap na olgeta manmeri long PNG i mas save watpo yumi i no kisim dispela gol.

Yumi i no ken wari tumas sapos Sau Gure, John Peka, o Kolis Pombvai bai i kisim wok. Sapos PNGFA i rong long makim ol dispela man, yumi olgeta i mas askim ol long kisim man we i gat save long wok rikrutmen long stap insait long ol saveman bilong PNGFA long taim ol i makim kosa bihain.


Air Niugini klab kisim nupela helpim

AIR NIUGINI soka klap bilong Mosbi Soka Asosiesen (PMSA) i kisim pinis nupela sapot i kam long Hyundai kamapani long Fraide 5 Epril, 1991. Klab i pilai nau long namba wan divisen.

Hyundai kampani i sponसरim klab wantaim ol yunifom bilong pilai na K300 mani. Kampani i helpim tu long baim afiliesen fi bilong klab i go long PMSA.



• Air Niugini soka klap i kisim sponsa long Hyundai wantaim nupela jesi. Luke Pomeleu i kisim long Tom Jones. Tega i sanap namel.



Bulolo soka op long 4 wik

YAKAM KELO i raitim

BULOLO soka resis insait long Morobe provins bai i statim sisen propa resis bilong em long 4-pela wik taim. Dispela em bihain long resis i pinis.

Presiden bilong Bulolo Soka Asosiesen, Atis Vinas i tok asosiesen i pilaim nau pri sisen resis. Na taim pri sisen resis i pinis bai ol i statim sisen propa resis.

Long primia divisen i gat 6-pela klab i resis nau long pri sisen. Nem bilong ol dispela tim em Mopi, BFC, APCAT, Lengoi, River Hills na Makam.

Long resis nau em Mopi wantaim BFC i go pas long poin lata

Bulolo em wanpela senta insait long Morobe provins we i save kamapim strongpela soka resis namel long ol yangpela.

Bulolo i gat nem long autim Morobe Kantri taitel long sampela yia i go pinis. Nau yet em i redi gen long autim taitel bilong dispela yia.

1991 Morobe Kantri sempionsip bai i kamap long Oktoba bihain long 1991 Saut Pasifik Gems. Dispela tonamen i save kamap long olgeta yia long Kwins Betde wiken.

Tasol dispela senis i kamap bikos long SP Gems.

PORT MORESBY SOCCER LADDER

Port Moresby Football (Soccer)							Tarangau								
Association Inc Week 6							P/Reserve Division Ladder								
Premier Division Ladder							Women Division Ladder								
Division	Played	Win	Draw	Lose	For	Against	Points	Golo	5	3	2	1	1	5	1
Guna	6	4	2	-	11	2	14	Westpac	6	3	3	-	9	2	12
University	6	4	1	1	18	6	13	Kurti-Andra	6	2	4	0	4	4	10
GFC	6	3	3	-	9	3	12	Amalpak M.U	6	2	3	1	7	5	9
Amalpak M.U	6	4	-	2	13	12	12	B/Kumuls	5	2	3	-	6	4	9
Rapatona	6	1	5	-	7	4	8	Sobou	6	2	3	1	4	4	9
Sobou	6	2	1	3	13	13	7	University	5	1	4	-	8	5	7
Golo	6	2	1	3	11	11	7	Rapatona	5	1	1	3	6	8	4
T. Defence	6	2	1	3	10	16	7	Guria	5	1	1	3	4	6	4
Kurti-Andra	6	1	2	3	10	14	5	GFC	5	1	1	3	6	10	4
Westpac	6	1	2	3	7	13	5	T. Defence	6	-	2	4	8	14	2
B/Kumuls	6	1	1	4	9	16	4	Verave	5	-	1	4	1	5	1
Verave	6	1	1	4	6	14	4								
First Division Ladder							Under 19 Division Ladder								
Maset	5	4	1	-	10	5	13	Rapatona	6	5	1	-	25	4	16
Koupa	6	3	3	-	12	6	12	Ba-o-Mitas	6	4	2	-	11	6	14
Ba-o-Mitas	6	3	2	1	11	9	11	Sobou	6	4	-	2	14	7	13
BFC	5	3	1	1	8	5	10	Westpac	6	4	-	2	9	7	12
Air Niugini	5	3	1	1	10	7	10	Kurti-Andra	5	3	1	1	11	5	10
Kula	6	2	2	2	11	9	8	GFC	6	2	2	2	10	11	8
Milne Bay	6	2	1	3	12	12	7	T. Defence	5	2	1	2	5	4	7
STC	5	1	2	2	9	9	5	Verave	5	1	4	-	7	5	7
Nali	5	1	2	2	5	7	5	B. Kumuls	6	2	1	3	7	6	7
Buresong	5	1	1	3	5	9	4	Guria	6	1	1	4	6	11	6
Wanzesi	5	-	1	4	5	11	1	University	5	1	2	2	5	10	5
Tarangau	5	-	1	4	8	15	1	Amalpak M.U	4	1	1	2	7	11	4
								Buresong	6	1	-	5	5	10	3
								Golo	5	-	-	5	3	18	0

B&H

BENSON and HEDGES

B&H

Strong bilong Guria bungim moa salens egensim GFC long wiken

MOSBI RIPOT

LEO WAFIWA i raitim

KOMPETISEN lida bilong Mosbi primia divisen soka resis, Guria i strongim go pas bilong em long poin lata las wiken egensim strongpela salens i kam long yangpela Golo tim. Guria i win 1-0.

Tasol kompetisen lida bai i bungim narapela strongpela salens gen long wiken egensim GFC.

GFC i autim Sobou 1-0 las wiken, na i ran long namba 4 ples nau (lukim poin lata-pes 22), bihain long Yunivesiti na Morobe Yunaitet.

GFC wantaim go pas bilong John Forova bai pretim stret Guria. Tasol sapos beklain bilong Guria wantaim go pas bilong intanesenel Adam

Lema i strong yet olsem las wiken, Guria bai i winim dispela gem long liklik skoa. Sapos nogat bai tupela i dro.


Narapela strongpela kik bai i kamap namel long namba tu na 3 top tim, Yunivesiti na Morobe Yunaitet. Sapos Yuni i winim Morobe na Guria i lus, Yunivesiti bai i senisim Guria na bosim lata.

Tasol Morobe Yunaitet em i wanpela strongpela tim nau. Em i winim 4-pela gem pinis na i ken winim Yuni.

Yuni i gat strongpela beklain wantaim go pas bilong intanesenel Joe Turia. Turia em planti taim i save go antap long fran lain na sapotim ol fowat. Olsem na beklain bilong Morobe Yunaitet i mas sanapim strongpela beklain.

Sapos Morobe Yunaitet i laik winim dispela gem orait em i mas strongim beklain bilong em.

PNGFA makim nesenel golkipa olsem nesenel anda 23 asisten kosa



• Wangu ... namba tu golkipa long kosim nesenel tim.

PNGFA i makim pinis nesenel golkipa, Adam Wangu olsem asistem kosa bilong PNG Anda 23 tim.

PNGFA vais presiden Michael Vee i tokaut long dispela long wiken. Wangu bai helpim Paul Sowni long redim tim long Osenia sempionsip em bai i stat long Me egensim Nu Silan, Fiji na Australia.

PNGFA i makim Wangu bihain long Sau Gure i wok olsem nesenel asisten kosa bilong nesenel tim.

Ol eksekutyutiv bilong PNGFA bai i kibung long Sarere na tokorait long dispela senis.

Dispela em namba wan taim bilong Wangu olsem kosa bilong wanpela nesenel tim. Em i bin wanpela nesenel pilaia long 1985 yet i kam inap nau.

Wangu bai bringim nau long ol yut planti save bilong pilai em i lainim long ol yia i kam, na tu olsem golkipa. Dispela em olgeta samting em i lainim long ol kosa olsem Joachim Fige, Adolf Hanasby, Paul Sowni, Andy Seward, John Peka, Kolis Pombuai, Posman Kisakui, Chalapan Kaluwin na Robert Popat.

"Dispela em bikpela salens bilong mi. Long ol yia i kam, planti golkipa i no kisim stretpela trening ol i lainim. Stat wantaim yut tim, mi bai i traim hat long trening ol golkipa bilong bihain taim," Wangu i tok

olsem bihain long ol i makim em.

Bikpela eria Wangu bai i wok long en em long painim inap gutpela golkipa long makim kantri.

"Ol kosa mipela save makim long kosim nesenel tim i save long aidia bilong pilai tasol. Tasol i nogat wanpela asisten kosa bilong ol golkipa," Wangu i tok.

Namba wan taim PNGFA i makim wanpela golkipa kosa em long 1987. Kosa ya em olupela intanesenel Robert Popat.

"Golkipa em wanpela namba wan pilai long fil. Em i mas kisim gutpela trening long wanpela kosa husat i gat save olsem wanpela kosa long bipo. Na i no long wanpela kosa husat i gat save tasol bilong pilai.

"Mipela i save tingim bikpela as na wok bilong golkipa long fil. Mipela i ken mekim golkipa i go pilai olsem straika, midfilda o long beklain. Tasol wanpela straika o midfilda i no inap kamap wanpela golkipa," Wangu i tok moa olsem.

Wangu i makim olsem planti golkipa long kantri i no save ritim gut pilai long fil.

"Ol i ting tasol olsem wok bilong ol em long sevim gol. Golkipa em namba wan lain bilong birua, na namba wan lain bilong difens o banis. Olsem na em i mas redim em yet long tingting wantaim.

"Em i mas gat wanpela kosa bilong em yet husat i gat save long golkipa wok. Man husat i kosim em i mas tingting olsem em, na helpim tingting bilong em, na i no long trenim bodi tasol.

"Long planti ovasis kantri tude, i gat tupela asisten kosa i save helpim het kosa. Na wanpela bilong ol dispela asisten kosa em kosa bilong golkipa.

"PNG i ken go long longpela rot sapos mipela i stat tingim ol dispela samting long kamapim strong nesenel tim," Wangu i tok.

Wangu i bilip dispela senis i mas bihainim na PNGFA i mas makim moa golkipa kosa long bihain taim.

"Mi laik kisim dispela salens long helpim kamapim ol pilaia bilong mipela long yut level, bai ol i ken redim ol yet long nesenel gem long bihain taim.

"Mipela i ken lukim nau olsem PNG i nogat gutpela golkipa long sinia level. Mipela i gat ol golkipa, tasol ol dispela golkipa i no save ritim gem na tingting. Wanpela golkipa i mas tingting i go mas long birua bilong em long win. Sapos dispela i no gat, birua i ken winim yu na skoa," Wangu i tok.

Luteran na Bismark wetim fainal

RAMU RIPOT

LUTERAN Yut na Bismark em tupela sempion bilong Ramu Soka (Football) Asosiesen pri sisen resis long Pul 1. Tupela i wetim nau tupela top tim bilong Pul 2 long egensim insait long fainal long narapela wiken.

Long resis bilong las wiken, tupela yet i bung na i dro 2-2 long wanpela strongpela kik. Namba wan gol bilong gem i kam long Eddieman Kamamba bilong Luteran Yut, wantaim helpim bilong Ali Vaurie na ol midfil pilaia olsem Augustine Wally, Goma Kopi, Nelson Yaling na Boabi.

Ol beklain pilaia olsem Philip Mathias, Young Ngalau, Kipsy Mitiang na Turuseng Kamamba i sanapim strongpela banis tru.

Namba wan gol bilong Bismark i kamap bihain tasol gol bilong Eddieman. John Mave i skoarim dispela gol wantaim helpim bilong Rudolf Piko na France Kusunan, husat i pulim pilai long beklain i go antap long franlain long traim brukim banis bilong Luteran Yut.

Tupela i dro 1-1 long

hap taim. Namba tu gol bilong tupela i bin kamap long 20 minit samting bilong namba tu hap. Augustine i givim gutpela bal na Eddie Kamamba i kikim namba tu gol bilong Luteran Yut, na Rudolf i kikim namba tu gol bilong Bismark gutpela sapot bilong John Mave.

Dispela wiken bai resis bilong Pul 1 tasol i kamap long painimaut tupela wina bilong bungim Luteran Yut na Bismark. Kapindi husat i winim Buresong 4-0 long las wiken bai i givim wankain skul long Momase. Momase i bin lus long Manai 3-2 las wiken.

Na Buresong bai bungim strongpela salens i kam long Dampier.

Spot administresen kos kamap long Mande

IS SEPIK spots administresen kos bai i kamap gen stat long Mande, 15 Epril, 1991 na i no olsem toksave bilong pastaim.

Mausman bilong Is Sepik spots opis na

wanpela man husat bai i go pas long dispela kos, Clemence Paime i tok kos i no inap kamap nau bikos ol lain bilong stap insait i no kamap.

Ples bilong holim dispela kos em long klasrum bilong ol haus sik wokman na meri long Boram Haus sik. Kos bai i stat long 8 klok moning long Mande.

PNGFA makim tupela nupela kosa

i kam long pes 24

nesenel tim long Mosbi.

Nesenel kosa John Peka i tok em i amamas long Gure i stap klia long dispela hevi, nau bai i wok klostu wantaim em. John Peka i tok em i makim Gure bikos em i save gut tru long Gure.

Mista Peka i tok moa olsem em wantaim Gure i save gut tru long tupela yet long bipo i kam inap nau. Dispela em long wok bilong lukautim na ranim pilai.

Olsem na em i pilim gutpela long wok bung wantaim Gure.

RAMU SUGAR (FOOTBALL) SOCCER ASSOCIATION DRAW POOL ONE

WEEK 4: SUNDAY APRIL 14, 1991.

Pool 1:
2.30pm Pre G2 Kapindi vs Momase
4.10pm Pre G2 Buresong vs Dampier
bye Manai

Note: Luth/Youth and Bismark will have to wait for the winners of Pool One to play in the finals.

WEEK 3: SUNDAY APRIL 7th, 1991 (PRE-SEASON) "RESULTS".

Kapindi def Buresong 4-0
Manai def Momase 3-2
Luth/Youths vs Surinam 2-2
Surinam def Aigob 5-2

RAMU SUKA SOKA ASOSIESEN POIN LATA

Primia Divisen 08/04/91

Team	P	Win	L	D	G/f	G/A	Pts
Luth/Youths	3	2	-	1	15	2	5
Bismark	3	2	-	1	10	4	5
Surinam	3	1	2	-	7	12	2
Aigob	3	-	3	-	2	16	0



SOKA

WANTOK



PNGFA makim tupela nesanel kosa

Kas bilong tupela yet ya!



Mosbi soka stall bilong las wiken. Foto: Misako Elemlah

YAKAM KELO i raitim

ASISTEN anda 23 kosa, Sau Gure i kisim ples bilong Kolis Pombuai na i kamap asisten nau'bilong nesanel kosa, John Peka. Tupela kosa ya bilong Lae bai i wok bung wantaim long trening tim bilong 1991 Saut Pasifik Gems em bai i kamap long Mosbi na Lae siti.

PNGFA i bin tokaut long dispela senis long las Sarere long bung bilong pasim namba wan trening kem bilong nesanel tim. PNGFA vais presiden, Michael Vee i tok senis long asisten nesanel anda 23 tim i kamap bikos Pombuai i gat planti wok tumas.

Bihainim dispela senis PNGFA i makim nem PNG golkipa, Adam Wangu olsem asisten anda 23 kosa.

Wangu em wanpela nem olupela pilaia bilong sempion nesanel klab long Mosbi, Guria.

Wangu bai i helpim namba wan bilong em, Paul Soweni long trening Osenia Anda 23 tim bilong go pilai long Australia long Me, 1991. PNGFA vais presiden i tok ol i oraitim aplikesen bilong Wangu bikos, Wangu em i wanpela olupela nesanel pilaia na i gat planti save long kosim tim. Bihain long vot i nogat bilip na nupela eksekutiv bilong Peter Mommers i kisim PNGFA opis, ol i makim John Peka olsem nesanel kosa. Orait Peka i makim Gure olsem namba tu bilong em.

Tasol bihain long wanpela wan wik Osenia FIFA yut kosa kos long Mosbi, PNGFA i makim Gure olsem asisten anda 23 kosa, na Pombuai bilong Mosbi olsem asisten nesanel kosa.

Tasol save i stap olsem Peka i gat bikpela laik long Gure olsem namba tu bilong em. Olsem na em i kisim Gure i kam wantaim em long namba wan trening kem bilong

i go moa long pes 23

MOSBI SOKA ASOSIESEN (PMSA) WIK 7 DRO

SARERE 13 EPRIL, 1991.

Taim	Divisen	Graun	Pilaia	
9.00	Res	B1	University	v Amalpak M.U
10.30	2nd	B1	BFC	v Oruka
12.30	1st	B1	Ba-o-Mitas	v Koupa
2.00	1st	B1	Buresong	v Kula
4.00	1st	B1	BFC	v Milne Bay
9.00	2nd	B2	Tarangau	v Koron
10.30	Wom	B2	GFC	v Guria
12.30	1st	B2	Air Niugini	v Maset
2.00	Pre	B2	T. Defence	v Sobou
4.00	Pre	B2	University	v Amalpak M.U
10.00	U/19	G.F.C.	B/Kumuls	v Amalpak M.U
11.30	U/19	G.F.C.	University	v Buresong
1.00	Wom	G.F.C.	T. Defence	v University
2.30	2nd	G.F.C.	Wanzesi	v Mana
4.00	2nd	G.F.C.	Sulem	v Elcom
12.00	U/19	Defence	GFC	v Sobou
1.30	Wom	Defence	Kuri-Andra	v Wanzesi
3.00	Res	Defence	T. Defence	v Sobou
4.30	Res	Defence	B. Kumuls	v Westpac



SANDE 14 EPRIL, 1991.

Taim	Divisen	Graun	Pilaia	
9.00	Res	B1	Guria	v GFC
10.30	2nd	B1	Cloudy Bay	v Buresong
12.30	1st	B1	Wanzesi	v Tarangau
2.00	Pre	B1	B. Kumuls	v Westpac
4.00	Pre	B1	Guria	v GFC
9.00	2nd	B2	Losegu	v Ba-o-Mitas
10.30	Wom	B2	Kuia	v Sobou
12.30	1st	B2	Nali	v STC
2.00	Pre	B2	Golo	v Kuri-Andra
4.00	Pre	B2	Verave	v Rapatona
10.30	U/19	G.F.C.	Golo	v Guria
12.00	U/19	G.F.C.	Kuri-Andra	v Rapatona
1.30	Wom	G.F.C.	Koupa	v Amalpak M.U
3.00	Res	G.F.C.	Golo	v Kuri-Andra
4.30	Res	G.F.C.	Verave	v Rapatona
10.30	U/19	Defence	T. Defence	v Ba-o-Mitas
12.00	U/19	Defence	Verave	v Westpac
1.30	Wom	Defence	Milne Bay	v B. Kumuls
3.00	2nd	Defence	Gala United	v Maniata
4.30	2nd	Defence	Amazon Bay	v Ba-o-Mitas

INSAIT

- Vanimo skruim Ista tonamen p21
- Morobe sempionsip i senis p21

• Wewak soka rausim ausait tim p21



KIKBEK
wantaim
RAINSAU

- p22

• Ramu/Luteran na Bismark wetim fainal... p23

• Bulolo kik op long 4-pela wik taim p22

• Mosbi Guria bai bungim strongpela salens p23

Madang soka i no inap baim K1,500 fain mani

YAKAM KELO i raitim

MADANG Soka Asosiesen (MSA) bai i no inap baim K1,500 fain mani em PNGFA i sasim em long baim.

Tasol PNGFA i givim tok lukaut olsem sapos MSA i no bihainim sas em (PNGFA) i mekim, MSA i no inap pilai aninit long nem bilong PNGFA.

PNGFA i bin sasim MSA long baim K1,500 fain mani, na ol Nabassa pilaia long tim lis bilong 1990 Benson Hedges Nesanel Klab sempionsip long noken pilai long tupela yia. Dispela em bihain long bikpela part we ripot i tok ol Nabassa pilaia na sapota i go pas na bagarapim ol opisal na pilaia bilong Manus Leipon long Laiwaden oval, Madang.

Gem Kodineta bilong MSA, Danny Gabong i tok Nabassa soka klap i bin resista na afiliet long MSA olsem klab bilong Madang. Olsem na oigeta pilaia bilong Nabassa i stap aninit long pawa bilong MSA.

Printed and published by Anna Bernadette Solomon, of Bitten Place, Gordons, at Allotment 2, Section 209, Hohola.

Olsem na MSA bai i sapotim Nabassa soka klab long dispela hevi em i bin kamap long sempionsip.

Mista Gabong i tok asosiesen bai i no inap long harim tok bilong PNGFA long karimaut dispela sas. Bikos MSA i bilip dispela i no asua bilong Nabassa.

PNGFA vais presiden, Michael Vee i tok Nabassa soka klap i ken go het long apil. Tasol em i mas apil i go long Osenia Futbol Konfederesen (OFC) pastaim. Bikos PNGFA i no inap long harim dispela apil long wanem em i no papa long dispela sas.

Mista Vee i tok moa olsem MSA i mas bihainim na karimaut wanem sas PNGFA i putim long han bilong em. MSA i kam aninit long PNGFA, wankain olsem ol arapela asosiesen insait long kantri. Wanem lo o oda PNGFA i salim, ol asosiesen i mas karimaut.

Mista Vee i tok wanpela rot i stap long ol asosiesen husat i no bihainim tok o karimaut wok gut em PNGFA i keh rausim ol.

Em i tok moa olsem wanem oda PNGFA i givim pinis long han bilong MSA bai i stap olsem tasol na i no inap long senis.

SEKIM MOSBI SOKA LATA

-PES 22

B&H

BENSON
and
HEDGES

B&H



RUGBY

Namba 9

Fonde Epril 11, 1991

NIUS

Kumul tim painim K230,000

... bilong go pilai raun long Frans na Inglen long Yurop

PNGRFL i laik karimaut nau wok bilong bungim mani long helpim salim Kumul tim i go pilai long Inglen na Frans long dispela yia.

Raun bilong Kumul i go long Yurop bai i stap long 5-pela wik olgeta. Insait long dispela 5-pela wik, Kumul bai i pilaim 5-pela gem long Inglen na 4-pela long Frans. Dispela bai i namba wan taim bilong Kumul long go long Wels we ol bai i pilaim namba wan gem egensim Wels nesanel tim long Swansi. Nau yet planti ragbi yunien pilaia long Wels i senis i go pilaim ragbi lig. Olsem na i gat bilip olsem Wels tim bai i gat planti ragbi yunien pilaia. Na dispela bai i wampela strengpela gem bilong Kumul.

Ol arapela tim Kumul bai pilai egensim long Inglen bipo long Tes Gem em tim bilong Hull/Hull Konston Rovers, Cumbria, Anda 21 tim bilong Inglen, na Wigan long Sentrel Pak. Wigan em wampela top tim bilong Inglen husat i gat planti pilaia long nesanel Inglen tim, Lions.

Long televisen bilong Inglen bai yu lukim Kumul i pilaim provin-sal tim bilong Avignon, Toulouse na Saint

Gaudens bipo ol i pilaim Frans long Car-cassone siti.

Pe bilong kisim tim i go na i kam bek bai i stap olsem K230,000. Olsem PNGRFL i askim nau pablik wantaim ol bisnis kampani long helpim.


Nau yet em PNGRFL i salim laki tiket long K1. Wina bai raun i go long London, biktaun bilong Inglen wantaim mani bilong raun na ples bilong slip. Dis-

pela bai i kamap taim Frans Roosters i kam pilai long PNG long Jun, na bai ol i tokaut long wina long Wol Kap Tes Gem egensim Australia long Oktoba, 1991.

PNGRFL i askim tu long sapot bilong moa long 200 praivet kampani long givim sapot long sampela mani. Keith na Yvonne Gill bilong Spic-N-Span Londri kampani em namba wan praivet kampani long givim sapot. Kampani ya i givim K600.

Ol pilaia na opisal bilong Kumul tim em wan wan bai i helpim wantaim K500 levi fi.

• Prop bilong Tarangau James Naipao i ran abrusim ol Paga Panthers pilaia. Tarangau i winim Paga 38-20 long dispela gem. Poto Ivan Bayagau.


INSAIT

MEJIK MAN

Aquila Emil bilong Mosbi Brothers i resis long winim Kumul faiv eit posisen egensim ol arapela nem Kumul na faiv eit pilaia

- pes 3

Winfield League '91

Moa sapot long PNG mas gat tim long Sidni Lig

Dia Edita,
Mi wanpela strongpela ragbi lig sapota long Lae. Olgeta wik mi save baim *Ragbi Lig Nius (RLN)* long painimaut wanem developmen i kamap long ragbi lig insait long kantri. Insait long *RLN* bilong las wik (Fonde 14 Mas, 199), mi bin lukim wanpela pas aninit long het tok, "PNG mas i gat wanpela tim long Sidni Lig."

Mi amamas long sapotim dispela pas em husat brata i raitim.

Sapos ol eksekutiv bilong nesanel ragbi lig bodi, Papua Niugini Ragbi

Futbal Lig (PNGRFL) i pait strong long kamapim dispela, ating dispela bai i helpim tru PNG Kumul tim long kamapim wankain strongpela stail bilong pilai olsem Kangaroos tim bilong Australia.

Mi save tu olsem dispela bai i hat liklik long sait bilong mani na ol arapela samting, tasol mipela i mas mekim.

Biko dispela em i wanpela rot bilong developim stended bilong ragbi lig insait long Papua Niugini.

Tepo M. Kui
LAE

Raiders bai winim pri sisen taitel-Tau

WAU/BULOLO RIPOT

SAM YAKAM i raitim

WAU/BULOLO Ragbi Lig bai piraim gren fainal bilong pri sisen resis long dispel: wiken, Seketeri Leo i tok.

Dispela sotpela taim i kamap bihain long wanpela bikpela kibung ol eksekutiu bilong Papua Niugini Ragbi Futbal Lig (PNGRFL) em i bin kamap long dispela wik long Lae.

Mista Leo i tok long Tunde olsem ol eksekutiv bilong Wau/Bulolo Lig bin kibung long tokaut long wanem as na ol i sotim taim bilong gren fainal.

Leo i tok wankain samting bai i kamap long

olgeta memba senta husat i pilain pri sisen resis yet.

Long dispea wiken gren fainal bai Raiders A gret tim i salensim Forcol Brothers. Na dispela gem bai i wanpela gutpela na strongpela gem long lukim. Brothers i gat gutpela nem bikos em i winim olgeta gem bilong em long pri sisen resis.

Long las wiken ol i bin winim Norths 26-8. Na tu ol bai i lukluk long winim Raiders long wankain skoa long dispela wiken.

Nau yet Brothers, mas senisim stail na gem sapos ol i tingting long winim gen fainal ya, bikos Raiders i gat nem long Wau/Bulolo Lig pri sisen resis tu ya.

Raiders kepten na fouat pilaia, Tasu Tau i tok em i gat bikpela bilip long ol boi bilong em. Nau yet Tau i tok em i gat ol wankain pilaia long olgeta posisen. Na i gat bilip olsem dispela gren fainal em Raiders bai winim .

Insait long fowod pek em Tau yet bai kisim sampela helpim long Gabi Simbu, na Berry Bezigi. Long beklain em ain man yet, George Katua wantaim John Sikari na Dimeri Arere bai putim kamap strongpela banis long autim dispela pri sisen taitel long Forcol Brothers.

Tau i tok Raiders em i brata tim bilong Forcol Brothers bikos olgeta pilaia ya i bin lusim Brothers long las yia tasol long strongim Raiders. Tasol Brothers i gat planti gutpela pilaia yet olsem Joe Jaretave, Yawing Joseph (olpela rep bilong Hailans Son), Sione Tonga na Bula Kua.

Long wanpela pri sisen gem namel long Brothers na Raiders Brothers i winim dispela gem 23-12.

Nau yet Raiders bai i pilai strong long strongim olgeta posisen bilong em long Brothers.

Ol arapela gren fainal tim long kamap long dispela wiken em B gret Panthers bai salensim Brothers, na Anda 19 Tigers bai salensim Brothers gen.

Long ol arapela gem bilong las wiken nupela tim Zenag Roosters i bin winim wanpela olupela tim, Tigers 26-24.

Dispela i soim olsem roosters bai givim het pen stret long ol arapela olupela tim long dispela sisen.

Strongpela Difens tim salim kaikai long Hawks

VANIMO RIPOT

FELIX RAMRAM i raitim

YANGPELA Hawks tim i soim olsem pawa bilong las yia i no dai bihain long em i autim strongpela Difens tim 18-10 las wiken. Tupela i bin bung long bikpela gem bilong las Sande, em i bin kamap long Peter Cole oval we planti sapota i kamap na lukim.

Dispela i bin wanpela gutpela strongpela gem stret we olgeta pilaia long tupela tim i kamapim gutpela stail bilong pilai. Tromoi bal bilong tupela i gutpela aninit long traipela hotpela san. Na ol winga bilong tupela i ran olsem smok balus stret taim ol i kisim bal.

Referi Bernard Mongituo i lukautim gut dispela pilai i go inap ful taim.

Long namba wan gem bilong Sande em Vanimo Fores i bungim Works Tigers.

Ol pilaia bilong Vanimo Fores i putim kamap strongpela pilai na win 24-16. Referi Nelson Kassi i lukautim gut dispela pilai.

Namba tu gem em Goru bilong Difens i bin lukautim namel long Sea Eagles na Tarakum. Dispela i no wanpela gutpela gem bilong Tarakum. Ol pilaia i pilai gut, tasol ol i hevi tumas long ran.

Tarakum i gat ol gutpela pilaia olsem kepten Marous Cullinan, Leo Hura na Clement Opiba. Clement em wanpela nupela pes insait long tim. Ol dispela tripela pilaia i putim trai bilong Tarakum, tasol hatwok bilong ol i lus nating.

Tarakum i no save long kain stail bilong ol Niugini Ailan manki bilong Eagles. Ol save sait step klostu klostu na Tarakum i sot win stret long holim pasim na takolim ol.

Ol pilaia bilong Tarakum tu i paia tasol ol i no strong inap long winim dispela gem.

Wanpela opisal bilong Vanimo Lig, Daniel Maskim i tok RLN olsem las Sande i bin wanpela gutpela de tru bilong olgeta tim. Bikos olgeta klab i resistarim ol yet pinis na kisim fil long pilai. Na tu olgeta pilaia i resistarim ol yet pinis.



Winfield League '91

MEJIK MAN BILONG WINIM GEM

Aquila Emil bilong Mosbi Brothers resis long winim Kumul faiv-eit posisen

PETER MIVA i raitim



Aquila Emil

OLGETA taim Twisties Brothers i pilai long Mosbi Winfield Lig kompetisen, na taim tim i bungim strongpela salens na i luk olsem bai i lus, wanpela pilaia husat bai mekim mesik na helpim tim long win em Aquila Emil.

Emil husat i gat 23 krismas nau na i bilong Nu Ailan provins

Ei bin kamapim gutpela stail bilong pilai long pri sisen na sisen propa resis. Sapos kain stail na strong bilong em i stap yet i go inap long taim bilong Kumul seleksen, em bai i stap wantaim tu long pilai egensim Nu Silan Kiwi na Australia Kangaroo long Septemba, 1991.

Emil i bin pilai long Sauten Son sait na putim kamap strongpela pilai. Na bikpela bilip i stap olsem em bai i winim faiv eit posisen bilong Kumul tim long pilaim Nu Silan na Inglen long las yia.

Tasol Aquila i lusim dispela sans. Bikos long dispela taim

em i go pilai wantaim Tracy Village Sharks tim long Dawin, Australia.

Nau yet em i lukluk long stap insait long PNG Kumul. Taim Aquila i kam bek long PNG, em i bin stap insait long Sauten son tim. Em i pilai long faiv eit posisen, na Stanley Haru bilong Mosbi Kone Tigers i pilai long hap bek (namba 7).

Tasol wanpela wik bipo long seleksen bilong Kumul tim long pilaim Nu Silan Kiwis, Aquila i kisim bagarap long Madang taim em i pilai long Sauten son egensim Noten son. Aquila i pamim het

olsem Kumul faiv eit, Opae Soga bilong Goroka, Stanley Haru, na tu noken lus tingting long ol arapela yanpela faiv eit pilaia husat i kamapim gutpela pilai nau olsem Tuksy Karu bilong Mosbi West, na Elias Paiyo bilong Mosbi Tarangau.

Aquila em i wanpela gutpela pilaia husat i bin pilai long faiv eit posisen stat long 1985 yet olsem wanpela anda 17 pilaia bilong Mosbi Brothers.

Bihain long tupela yia em i goap i go pilai long A gret tim. Long dispela taim em i bin stap tu long Sauten Son tim long faiv eit posisen. Dispela

Kumul faiv eit jesi.

Aquila i gat kain stail bilong brukim banis na ran i go aut long ples klia olsem hap bek bilong Australia, Allan "Alfie" Langer. Aquila i liklik long sais, tasol em i ken pilai na takol strong olsem wanpela bikpela masel man.

Aquila i tok i nogat wanpela samting i stapim ol yangpela manki long dispela kantri long kamap gutpela pilaia. Ol pilaia i mas putim taim na trening olsem kaikai bilong ol long olgeta de.

Aquila i makim olsem Mosbi West na Sauten Son huka, Danny Moi em i wanpela



Opae Soga

bilong em long skru bilong wanpela Noten son pilaia, na ol i karim em i go aut long Ron Albert oval. Olsem na em i no winim sans long Kumul tim.

Nau yet Aquila i mas pilai strong long winim faiv-eit posisen long ol arapela pilaia



Stanley Haru


taim i gat ol nem faiv eit pilaia olsem Kumul faiv eit, Dairius Haili.

Nau yet Aquila i laik givim bikpela tok tenkyu i go long Allan Hicks, husat i bin kosim em long anda 17 na bringim em i kamap wanpela pilaia husat i resis nau long kisim



Danny Moi

kendidet bilong namba 9 jesi bilong Kumul tim long dispela yia. Em i tok Moi em i wanpela gutpela pilaia long Mosbi resis husat i save laikim long pilaim gutpela ragbi. Aquila i lukim i nogat as na ol selekta bilong Kumul tim i no makim Moi long las yia.



Tarangau mas banisim beklain bilong West

BIKPELA gem bilong Mosbi Winfield Lig long dispela Sande bai i wanpela gutpela gem stret bilong lukim. Fairdeal West bai i bungim Fairstar Tarangau. Tupela bai i bung long 4 klok apinun (4.00pm) long Sande 14 Epril, 1991.

Las Sande planti manmeri i kamap na lukim West i winim Kone Tigers. Mi bilip ol West pilaia na sapota i mas amamas stret long dispela win.

Taranagu na West wantaim i gat ol gutpela beklain pilaia husat i save pilaim "open" stail bilong tutbal. Tarangau i gat ol bikpela hevi fowat pilaia wantaim go pas bilong Ben "Big Foot" Biri, Terry Longbut na James Naipao. Long beklain em Richard Wagambie bai i go pas long ol junia pilaia olsem Danny Eri, Gairo Pepena na Darius Raki.

Beklain bilong West wantaim go pas bilong Michael Toivita, Obert Batia na Joshua Kouoru i save winim gem bilong West. Strong bilong West i stap long ol dispela pilaia. Sapos Tarangau i no banisim ol gut, West bai i lap tasol.

Tarangau i lusim wanpela bilong 5-pela gem ol i pilaim pinis. West i winim 4-pela gem ol i bin pilaim. Long Trinde nait ol i pilaim kompetisen lida, Brothers long mid wik gem.

Long 1990 Tarangau i stapim sans bilong West long go insait long gren final. Olsem na dispela bai i wanpela strongpela gem stret.

Ating planti bilong yupela long Mosbi i no save long wanem as na i gat ol mid wik gem. Isi ansa em Souths i go insait nau tasol long resis, na i bagarapim dro bilong pilai. Olsem na bai i gat ol mid wik gem long narapela 12-pela wik.

I gutpela long lukim olsem nupela tim, Waliya na Royals i pretim nau ol nem tim. Las wiken Brothers na Air Niugini i laki long win egensim dispela tupela tim.

Souths ating bai i kamapim gutpela stail bilong pilai klostu. Ol i lusim planti gutpela pilaia i go long ol arapela tim long stat bilong dispela yia.

I gutpela long lukim olsem ol referi i luksave long wanem samting mipela i toktok long we ol i save lukautim pilai long fil. Presiden bilong ol referi long Mosbi, Tom Pelis i toktok long mi na amamas long sampela samting mi na sampela sapota i toktok o i no amamas long en.

Dispela em i gutpela pasin. Mipela i mas welkamim ol tok bek long stretim wok bilong mipela long fil.

Nem Papua Niugini referi, Graham Anuri i givim mi kopi bilong wanpela leta em i raitim na salim i go long referi asosiesen. Insait long dispela pas Graham i makim olsem ol referi bilong em i mas stap fit, na tu long stadi gut long rul buk wantaim ol sain ol i save mekim long han taim ol i lukautim pilai long fil.

Graham em i wanpela bilong ol top referi long Wol. Olsem na i mas gutpela long mipela i luksave long wanem samting em i makim o toktok.

Sapos yu laik bihainim na kisim gutpela nem olsem Graham, orait traim na bihainim gutpela rot em i go long en.

Sampela wik i go pinis long dispela kolum, mi bin toktok long SHRM 7 asait resis olsem rul bilong pilai i no kamap hariap long ol kosa. Tasol rul i bin go aut long ol kosa na eksekutiv 6-pela wik bipo long kompetisen i kik op. Na tu ol tim husat i pilai long semi final long pul i winim tupela gem tasol, na i no tripela.

Sans bilong kikim op 1991 sisen i hangamap long han bilong Tarangau na Works klab

WEWAK RIPOT

OL OPISAL bilong Wewak Ragbi Lig i no save long wanem kain samting bai i kamap sapos tupela klap, Tarangau na Works i no resistarim ol pilaia bilong tupela bipo long Fraide 12 Epril, 1991.

Presiden Joe Mande i tok Wewak Lig i laik kikim op pri sisen long tupela wik i go pinis, tasol hevi i kamap g n long Tarangau na Country klap. Olsem na em i stapim gem long go het long las wiken.

Ol opisal bilong Wewak Lig bai i kibung long dispela wik na lukluk long dispela hevi.

Sapos olsem wanem bai ol opisal i pasim tokorait tasol long stapim resis long dispela yia. Na dispela bai i namba 3 yia bilong Wewak Lig i stap long tudak.

Nau yet presiden Mande i stap long Lae wantaim ol arapela eksekutiv bilong Papua Niugini Ragbi Futbol Liq (PNGRFL).

Ol bai i kibung long toktok bilong sisen propa resis wantaim ol arapela hevi bilong lig insait long kantri.

Mande i tok bikpela hevi bilong ragbi lig long Wewak i stap long han bilong ol eksekutiv bilong wan wan klap. Olgeta pilaia i laikim long pilai, tasol les pasin bilong wan wan klab eksekutiv i mekim dispela hevi i go bikpela.

Nau yet Mande i putim wok i stap long

han bilong olgeta klap opisal long stretim resistesen bilong ol pilaia pastaim.

Wewak Lig bai i no inap long kikim op sisen propa wantaim tupela o tripela tim tasol. Bikos dispela bai i brukim lo bilong PNGRFL, Mande i tok.

Na tu sapos olgeta pilaia i resistarim ol yet pinis, ol opisal bai i lukluk long statim sisen propa dro. Bikos nau yet em taim i sot pinis long Inta Siti resis na ol arapela bikpela resis insait long kantri.

Narapela hevi tu i stap long yunifom bilong pilai. Dispela

em wanpela bikpela hevi olgeta klap long Wewak i mas lukluk tu long en.


Sapos wanpela gutpela ansa i no kamap bihain long dispela wik, ol eksekutiv bai i kibung gen na pasim

tokorait long stapim resis long namba 3 yia.

Mande i tok olgeta afiiisen fi bilong Lig wantaim pilaia resistesen na klab afiiisen fi bai i stap aninit long lukaut bilong PNGRFL inap neks yia. Dispela em sapos ol eksekutiv i pasim tokorait long stapim resis long dispela yia.



Pilaia bilong Paga Panthers i bungim strongpela takol bilong Tarangau stret long las wiken.



• Mosbi/Tupela Kone Tigers pilaia i holim pasim gut Michael Toivita bilong West. Tupela tim ya i bung long bikpela gem bilong las wiken na West i win 32-24. Poto Ivan Bayagau.

Souths o Eels bai resistarim namba wan poin long lata?

MOROBE RIPOT

SAM YAKAM i raitim

MOROBE Kantri Lig i statim pinis sisen propa resis bilong em long las wiken. Na Souths na Eels bai i bung long strongpela gem bilong A gret resis long dispela wiken.

Souths em wanpela tim husat i gat planti yangpela pilaia. Tasol las wik ol i bin putim kamap wanpela gutpela strongpela gem egensim ARC Titan West.

Tasol ol i lus long liklik skoa tasol, 8- 16. Dispela em namba wan gem tasol bilong sisen propa ya. Olsem na ol i no wari tumas.

Eels tu i bin lusim namba wan gem bilong em long las wiken egensim K United.

Olsem na tupela tim wantaim bai i lukluk long winim namba wan gem bilong sisen propa long dispela wiken.

Eels i gat ol olupela pilaia olsem kepten Eddie Mark Mak i bin putim kamap wanpela strongpela pilai long las wiken.

Mark bai kisim gutpela sapat i kam long ol arapela pilaia olsem Kuma Manoba, Berry Onagama na Pagi Pake. Bilip bilong Eels long resistarim namba wan poin long poin lata i hangamap long han bilong ol dispela pilaia.

Ol arapela A gret gem bilong dispela wiken bai yu lukim Bulldogs i kamapim strongpela salens egensim Brothers, ARC Titan West bai lukluk long namba tu win bilong em egensim Hawks, na United bai i kisim tupela isi poin egensim Mosquitoe.

Mosquitoe i gat bikpela hevi long pilaia resistresen fi. Dispela i stapim ol long pilai long resis bilong dispela yia.

Seketeri Nelson Deniel i tok hevi ya i kamap bikos ol man husat i go pas long ogenaism Mosquitoe klab i lus long wanpela sia long Morobe provinsal gavman ileksen.

Dispela pasin i bin kamapim bikpela hevi stret long ol opisal bilong Morobe Lig.

Nau yet dispela hevi bai i stap long han bilong ol nupela eksekutiv bilong Morobe Lig long lukluk long en. Ol nupela eksekutiv i kisim opis bihain long wanpela vot i nogat bilip em i bin kamap long las wik.

Mirengke i lus long vot i no gat bilip

MOROBE RIPOT

SAM YAKAM i raitim

MOROBE Kantri Lig i gat ol nupela eksekutiv nau bihain long vot i nogat bilip em i bin kamap long las wiken.

Dispela vot i kamap bikos ol nupela eksekutiv i bilip olsem olupela eksekutiv i no mekim gutpela wok. Dispela em bihain long ol i komplem olsem eksekutiv em presiden Roy Mirengke i go pas long en i no givim mani ripot bilong yia 1990.

Vot i no gat bilip i kamap na i karim kaikai.

Ol nupela eksekutiv husat i lukautim opis nau em presiden Kuma Manobva, vais presiden Herry

Rambi, seketeri Nelson Deniel na tresera Brian Korah.

Tupela arapela nupela opisal em Brian Onagamo na Philip Zafanke husat bai i wok olsem resistresen na kwalifikesen eksekutiv.

Nau yet ol nupela eksekutiv i askim Mista Miringke na ol olupela eksekutiv bilong em long givim mani ripot bilong 8 Epril, 1990-21 Epril, 1991.

Long ol arapela samting em nupela seketeri, Nelson Deniel i tok nau yet ol i lukluk long putim kamap gutpela 1991 sisen propa resis.

Nelson i makim maus bilong Morobe Kantri Lig na i givim bikpela tok tenkyu i go long South Pacific Machinery kampani long sponsarim 1991 pri sisen na sisen propa resis.

Ragbi Lig Nius (RLN) i no inap long kisim ripot bilong Mista Mirengke long dispela senis.



• Mosbi/Ben Bire bilong Tarangau i abrusim ol Paga Panthers pilaia.

Magani winim namba wan pri sisen gem

KIUNGA RIPOT

MAGANI Klap long Kiunga i bin winim namba wan gem bilong em long pri sisen resis bilong dispela yia.

Magani i winim United 15-8 long bikpela gem long Sande apinun. Tupela tim wantaim i no pilaim gutpela pilai long namba wan hap, tasol long namba tu hap gem i go strong, na tu i gutpela moa na anamasim ol sapota.

Insait long namba wan hap, United i putim namba wan trai na konvesen bilong dispela trai i no go na putim ol i go pas long skoa. Magani i bekim dispela trai taim prop Joe Aua i ran 40 mita insait long mak bilong United long putim namba wan trai bilong Magani aninit long pos. Konvesen kik i gutpela na bringim skoa bilong

ol i goap 6-4 long hap taim.

Long namba tu hap tupela tim i kam aut wantaim stail na strong bilong ragbi lig. Planti gutpela stail i kamap long dispela taim na kirapim stret bel bilong olgeta sapota long givim moa sapota. Insait long namba tu hap bilong dispela gem, Magani i putim tupela pilaia long beklain long strongim pilai.

Dispela senis i helpim Bandeirante Pewamu (winga) na Norphly

Jubi (ful bek) long putim tupela trai long putim skoa i goap long 14.

Tasol dispela tupela trai i no stapim ol yangpela bilong United long pilai strongpela gem. Ol dispela yangpela pilaia i bin putim kamap strongpela gem insait long teritori eria bilong Magani.

Dispela i kirapim bel bilong ol yangpela bilong United long salim Wai Onao long putim las trai bilong United long bringim skoa go 8-14.

Man husat i go pas long United fowod, fowat lain, lok Thomas Tumba i givim het pen stret long Magani long klostu long pinis bilong gem.

Long pinisim skoa bilong dispela gem, hap bek pilaia bilong Magani Roba Jeipi i kikim wanpela fil gol long bringim skoa i goap long 15-8 inap ful taim.



• Mosbi/West pilaia long aninit i laik kirap isi isi bihain long strongpela takol bilong Kone Tigers pilaia. Tasol West i winim dispela gem 32-24. Poto Ivan Bayagau.



• Mosbi/Joe Madidu bilong Paga Panthers i bungim strongpela salens bilong Tarangau. Tarangau i paia long las minit na winim dispela gem 38-20.

Fainal Inta Siti tim kamaut long neks wik

MENDI RIPOT

PETER MIVA i raitim

MENDI Ragbi Lig i stat pinis long makim tim bilong 1991 SP Inta Siti resis long wik i go pinis.

Ol opisal i makim 30 pilaia husat i statim trening long 6-pela wik i go pinis.

Ol opisal bai putim kamap tupela tim bilong dispela 30 pilaia long pilaim ol yet long Tente Oval long Sande 21, Mas 1991.

Bihain long dispela resis bai ol opisal i

makim 20 gutpela pilaia long makim Mendi long strongpela Inta Siti resis.

Lig presiden, Joe Keviamé i tok Mendi em namba wan taim bilong ol long pilai insait long dispela resis em i bin stat long las yia. Olsem na em bai i namba wan taim bilong ol Mendi pilaia long pilim strongpela salens

bilong dispela resis.

Keviamé i tok tu olsem planti bilong ol 30 pilaia em ol nupela pilai.

Tasol i gat sampela olupela nem pilaia olsem Hailans Son rep, Kore Seeto, Mathias Kombra, Michael Yai, Kone Keri, na Francis Aba long strongim tim.

Bihain long gem bilong Sande 21 Mas bai

Mendi i tokaut long fainal 20 pilaia tim long makim em.

Nem ol i makim long tim long long makim Mendi em Curtain Star Mendi Muruks. Tim ya bai i makim Mendi aninit long lukaut bilong kosa Andy Yakivi, trena Mathias Kombra na tim menesa Andrew Meles.

Mendi bai i resis wantaim 5-pela arapela strongpela senta olsem Mosbi, Lae, Goroka, Hagen, na Kundiawa. Mosbi i bin winim dispela resis long las yia aninit long lukaut bilong kosa John Wagambi egensim Hagen.

Madang na Rabaul tu i bin stap long dispela resis tasol ol i no bin resistarim ol yet long de Papua Niugini Ragbi Futbol Lig (PNGRFL) i bin makim.

As bilong dispela em tupela senta ya i no painim wangepela sponsa hariap long resista tim tupela. Olsem na PNGRFL i kamap long tokorait olsem tupela i no inap pilai.

Presiden Keviamé i tok Mendi bai i lukluk long putim kamap wankain gem olsem ol i bin putim kamap bipo na winim ol senta olsem Kundiawa na Goroka long Hailans Son resis.

Nau yet Keviamé i gat bikpela bilip olsem ol pilaia bilong em bai i stap insait long semi na gren fainal bilong 1991 SP Inta Siti resis.

Vanimo bilip long autim Noten zon taitel

PRESIDEN bilong Vanimo Lig, Mark Martin i gat bikpela bilip olsem Vanimo i ken autim Noten son resis bilong dispela yia. Bikos nau yet Lig i gat ol gutpela pilai long 6-pela memba tim.

"Taim mipela i kik op long Mas 10, 1991, mi lukim stended bilong gem i gutpela tru, na i winim bilong las yia. Planti pilaia i gat strongpela tingting bilong pilai ragbi lig.

"Tupela nupela tim, Tarakum na Vanimo Forest i kamapim gutpela pilai stret. Mipela ol eksekutiv i luksave long dispela, na bai makim tupela i go pilai long sisen propa resis.

"Wantaim ol dispela senis i kamap, mi bilip sapos tim bilong Vanimo i go long Noten son resis, Vanimo skwat bai kamapim bikpela sori tru," Mista Martin i tok.

Presiden i bin lusim Vanimo long Sande 7 Epril na go long Mosbi. Na bihain bai em i lusim Mosbi na go long Lae long stapim insait long kibung bilong Noten son resis em bai i kamap long Sarere 13 Epril, 1991.

Insait long dispela kibung bai ol i pasim tokorait long wanem senta Noten sion resis bai i kamap. Mista Martin i laikim olsem dispela resis i mas kamap long namel ples olsem Lae o Madang.

RLN i save olsem nau yet ol opisal bilong Vanimo Lig i makim pinis wangepela tim bilong pilai insait long dispela resis. Tasol ol eksekutiv i no inap tokaut long nem bilong ol pilaia.

Lig tresera John Lokosi i tok Vanimo Lig i gat "lik lik mani" tasol long lukautim wok bilong em. "Na long mekim wokabout bilong go stap long ol pilaia bilong Noten son, mipela mas i gat sampela man moa. Mi no save dispela K600 i stap nau bai inap o nogat?"

Long ol arapela samting em ol eksekutiv i bin pasim tokorait long kibung long dispela wik Trinde na glasim sisen propa dro.

Strongpela Difens tim salim kaikai

i kam long pes 2

Na dispela i soim gutpela mak bilong statim 1991 sisen propa resis.

Fainal bilong pri sisen bai i kamap long dispela Sande. Long bikpela gem em Hawks bai i bungim Tarakum. I gat bikpela bilip olsem Hawks bai givim wankain skul gen long Tarakum.

Ol namba wan gem bilong Sande bai yu lukim Difens i traime olgeta strong long winim Works Tigers, na Sea Eagles i autim Vanimo Forest Pro-dak.



• Mosbi/OI Paga Panthers pilala i karamum long wangepela Tarangau pilala.

Tarangau i mas katim op beklain bilong West sapos em i gat laik long skruim win bilong em

TARANGAU i mas katim op beklain bilong West sapos em i laik strongim win bilong em taim tupela i bung long bikpela gem bilong Mosbi Winfield Lig long dispela Sande.

Dispela bai i wanpela gutpela strongpela gem, na i gat bikpela bilip olsem planti sapota bai i pulapim Lloyd Robson oval long lukim dispela gem.

Tupela tim wantaim i

go pas nau long poin lata bihain long 4-pela gem. West i go pas wantaim 8-pela poin wantaim Brothers, na Tarangau i sindaun long namba 3 ples wantaim 6-pela poin.

West i gat ol gutpela namba wan beklain pilaia husat i gat moa spit wantaim go pas bilong Joshua Kouoru

MOSBI RIPOT

LEO WAFIWA i raitim

na Obert Batia long senta wantaim tupela winga, John Namaliu na Michael Toivita.

Ol bai kisim sapot bilong fulbek na kepten

Joe Mirisa, husat em olgeta taim i save joinim wanem gutpela muv beklain i mekim.

Faiv eit Tuksy Karu husat i kamapim gutpela pilai nau wantaim hap bek, Walter Taule bai i bungim pilai wantaim beklain.

Taranagu i mas banisim ol gut tru sapos em i laik winim dispela strongpela gem.

Long fowat em pilai bilong tupela tim bai i wankain. Tupela

Kouoru brata, Gideon na Haoda wantaim Felix Hurei bai i go pas long fowat lain bilong West egensim "bikpela" Ben Bire, Terry Longbut, James Naipao, Tara Korae na Kaibek Kanaka, husat i no bin pilai long las wiken.

Faiv eit Elias Paiyo na hep bek Gairo Pepena

bai bungim stail wantaim ol beklain pilaia olsem Danny Eri, kepten Richard Wagambie na stail winga Michael Jim.

Jim em wanpela ain man stret ya. Las wiken em i salim tripela pilaia bilong Paga panthers i go ausait long fil.

HAGEN RIPOT

Nogat inap referi bilong lukautim pilai

LEO WAFIWA i raitim

OL OPISAL bilong Mt Hagen Ragbi Lig i glasm nau hevi bilong referi long 1991 sisen propa resis.

Sisen propa resis i bin kik op long las wiken. Tasol bikpela hevi nau i stap long ol inap referi long lukautim pilai.

Ol opisal i askim pinis pablik long husat ol olupela pilaia o man nating i laikim givim taim bilong ol long lukautim pilai i ken kamap na helpim.

Nau yet Mt Hagen Lig i gat 7-pela resista referi i stap long lukautim ol pilai bilong dispela yia. Tasol tripela o tupela tasol i save kamap long lukautim 12-pela gem long wanpela wiken.

Dispela i kamapim bikpela hevi stret long lig.

Ol eksekutiv bilong Hagen Lig i askim tu ol sapota na pilaia long rispektim o luksave long wok bilong ol referi, na tu givim sapot long ol.

Bikos dispela kain wok em wan wan man i save givim taim bilong ol yet long mekim.

Mt Hagen Lig i statim pinis sisen propa resis tasol nau yet ol i lukluk long stretim sampela arapela hevi bilong lig. Wanpela ripot i tokim RLN olsem afiliesen fi bilong wan wan klap wantaim resistresen fi bilong wan wan pilaia i pinis.

Tasol lig bai i gat hevi yet sapos wanpela man i no kamap long mekim trening long mekim wok olsem referi.

• Mosbi/James Naipao (raithan) bilong Tarangau i takolim pilaia bilong Paga Panthers. Tarangau i winim dispela gem 38-20. Poto Ivan Bayagau.



Winfield League '91

ESTA GO LONG KITSEN
NA KARIM HATWARA I GO..

HE! HE! HE!
YU LAIKIM
HATWARA?
ORAIT!




EM TINGTING LONG
KAPSAITIM ANTAP LONG
MAIK...

YU SILUP NA
AMAMAS I STAP...
BAI YU PAIA STRET,
LES MAN!



NAU ESTA KAPSAITIM HAT
WARA... TARANGU MAIK I
BIKMAUS KRANCI TRU...



EM KIRAP NA RON I GO
LONG TOILET...


AAA
EEEE
KOL
WARA
NES?

HA! HA!
HA! HE! HE
HE! HE



HARIAP TRU EM OPIM
WARA NA WAS WAS...

OOOH!




MAIK I BELHAT NOGUT
TRU LONG ESTA...



YU GK?!
BAI DAI!!

Yu laikim seving bilong yu i go antap hariap?



Opim akaun bilong yu na winim spes bilong narapela Bonusaver Laki Dro.

- Bonusaver Laki Dro i save kamap long olgeta tripela mun - na seving bilong yu inap go antap hariap tru!
- Long winim spes, putim K100 i stap long Bonusaver akaun bilong yu wanpela mun pastaim long olgeta Dro.

- Long olgeta tripela mun, interes mani bai go long Bonusaver akaun bilong yu (olsem na yu bai kisim moa mani).
- Opim Bonusaver akaun wantaim K10. Na mipela bai rausim tasol mani long pe bilong yu. Olsem na yu bai i no inap hatwok long sevim mani.

The more you save, the more you can win	
Save K100 - K199	WIN K100 (4 prizes)
Save K200 - K299	WIN K200 (3 prizes)
Save K300 - K399	WIN K300 (2 prizes)
Save K400 and above	WIN K400 (1 prize)



TASOL REBO I WIN MOA YET... LIKLIK SPES TASOL NA EM PUTIM TRAI...



OLGETA PILAIAS BILONG EM RON I GO NA HOLIM EM...



NAU EM STRETIM BAL LONG KONA STRET NA KIKIM... EM I NO POPAIA... BAL I GO STRET INSAIT LONG GOL POS...



BOS BILONG REBO TU I STAP NA WOK LONG SAPOTIM TIM BILONG EM I STAP...



REBO KISIM BAL NA KIKIM I GO LONG GOL POS BILONG OL WESPAC...




JOE GIVIM SIKSTI I GO NA SEM TAIM BAL I GO INSAIT LONG TRAI LAIN... HARIAP TRU JOE I KALAP IGO INSAIT NA HOLIM BAL...




OL SAVEMAN BILONG BISNIS YUSIM OL!


Lister




L1 5 KVA
● TOTALLY PORTABLE ENERGY SOURCE
● IDEAL UNIT FOR VILLAGE LOCATIONS



TS2 8.5 KVA
● 3 PHASE OR SINGLE PHASE POWER
● COMPACT AND EFFICIENT



HR3 26.25 KVA
● IDEAL COMMERCIAL BACKUP SYSTEM



CS6 58 KVA
● INDUSTRIAL CAPACITY
● WILL HANDLE MAXIMUM DEMAND FOR POWER ANYTIME

Brian Bell Stores

● BOROKO — 25 5411
● LAE — 42 7877
● GOROKA — 72 1098


● MT. HAGEN — 52 1999
● RABAUL — 92 1966




Bilong wanem na yu putim dispela hangisip?
Sori Kenel. Mi gat kus ya.



Yu longlong... liklik taim ol i painimaut
A...noken wari..



Long Mawitaan...ol pipel i bung long lukim Presiden Luaga...



Antap long skai em Phantom wantaim lida bilong birua husat i laik kilim Luaga...
Mi lusim hap aua long kism ges, tasol mipela i kamap nau!
Yu let pinis.



"10-pela mail longwe long Pales nau. Ka bai i no inap...



Mi laikim wangepela helikopta hariap!



Mi mas go hariap long Pales, na laikim dispela helikopta.
Yu husat tumberan man?
Kolim Kenel Worobu. Jangel Patrol.. Tokim em Komanda i stap hia nau>



Em i tok em i Komanda, na i laikim Kenel Worobu.
Kenel i no stap. Komanda i save ring tasol long X Ben redio. Holim pasim dispela man.

MOA NEKS WIK

Flash Gordon



Flash tekov long holim pasim Cheever Jonas.

Em bai go long Mongo, Zarkov! Long salim plen em i stilim!



Antap long sip bilong Ming...

Jonas i kamap long vidio. Em i tok em i holim plen mipela i painim.



Ol plen? Ol i baqarap pinis!
Nogat, mi gat plen ya! Tasol mi laikim helpim bilong yupela!



Flash! Em i tokim pinis sip bilong Ming long helpim em!
Zarkov! Lukim sip bilong Cheever ya! Namba wan samting pastaim!



Laser paia!



bek na bihainim mi... nogat bai mipela sut gen!




Woa sip bilong Ming! Em kamap klostu!
Ok. Flash! Wanem samting yu tok!



Mak i redi!
Olgeta sot gan... paia nau!

MOA NEKS WIK

MICKY MOUSE



O, Dia!




Wanem kaim spesek kaikai bai mi kukim long nait?
RECIPES



Mi no save Minnie. Tasol mi stretim lek bilong tebol long rum bilong kaikai ya.



Frans stail? Italian stail?
Mi katim lek bilong tebol sot tumas!



Darn! Dispela i sot tumas!
Mnim... Meksiken Swedis?



Bihan...
Stail kaikai bilong ol Japan! Yu kism dispela gutpela stail bilong kuk we, Minnie?

GO WANTAIM



Twisties
yu inap

WIN
na go long

GREN FAINAL
long **SIDNI!**

WINIM
5-PELA TRIP
BILONG TUPELA MAN!
80 ARAPELA DRO PRAIS
LONG OLGETA MUN!
• BMX BIKE
• WALKMANS
• T-SHIRT NA KEPI!



Raitim nem na atres bilong yu long pepa bilong resis na pulimapim insait long wan wan emti Twisties paket wantaim na putim long ENTRI BOKIS long stoa! Em isi tru!

PEPA BILONG
RESIS I STAP
NAU LONG OL STOA!

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.